明 文秉

●序

烈皇昔由藩邸入继大统, 毒雾迷空, 荆棘满地, 以孑身出入于刀锋剑芒之 中,不动声色,巨奸立扫,真所谓聪明睿智,神武不杀者耶!仪监于殷,尽彻 诸内奄,政事俱归于外庭,诚千载一时也。然而逆珰遗孽,但知力护残局,不 复顾国家大计,即废籍诸公,亦阅历久而情面深,无复有赞皇魏公其人者。且 也长山以改敕获戾,而上疑大臣不足倚矣。未几,乌程以枚卜告讦,而上疑群 臣不足信矣。次年,罪督以私款偾事,而上疑边臣不足任矣。举外廷皆不可恃 , 势不得不仍归于内, 适又有借不测之恩威, 伸具瞻之喜怒者, 事权乃尽归于 内而不可复收。嗟乎!赫赫师尹,颠倒豪杰者乃尔。即后先臣以讲筵荷蒙圣鉴 , 超拔政府, 真有虚已以听之意, 而两月揆地, 一语招尤, 致负圣明特达, 无 以报称,天乎,人乎,岂气运使然乎! 先臣罢而韩城、武陵辈进,虽圣主日见 其忧勤, 而群上日流于党比, 痼疾已成, 不复可药矣。不肖于十七年中, 备集 烈皇行事,以志尧舜吾君之恩,又以志有君无臣之叹,集成巨帙数十册,可备 一朝史料。因遭家难,同世藏书翰墨等项,误行寄托,遂不可问,致烈皇遗迹 ■55A 行,湮没不彰,当亦有志所共痛心疾首者也。年来屏迹深山,间有客相 过从, 询及旧事, 尚有一二仿佛胸臆间, 窃恐失此不传, 后悔无及。又承同志 或一人一事相示,因纂抄成册,名曰《烈皇小识》,共八卷,意四方君子,当 有识其大者。虽所纂者十不得二三,然以备修史者之采择,亦未必无小助。迨 至天不祚明,帝星告殒,守正不屈,宁以身殉,辄悲愤填膺,扼吭欲绝,涕泗 滂沱,几执笔而不能下矣。竹坞遗民文秉,书于考槃之煮石亭。111111

●卷一

烈皇帝为光庙第五子,孝纯刘太后所出,而抚育于李庄妃。天启二年九月,册封信王。七年二月,出就外邸,成婚,册妃周氏。熹庙病危,魏忠贤遣腹奄涂文辅迎上入宫。上时自危甚,袖食物以入,不敢食宫中物。是夜秉烛独坐,见一奄携剑过,取之,留置几上,许给以赏。悯逻者欲以酒食,问左右何从取给,左右对:"宜取之光禄"。因传令旨遍犒之,欢声如雷。周后在外邸,祷卜无虚晷,亦虞入朝有他变也。

上既即位,廷议改元,礼部拟进者四:"永昌"、"绍庆"、"咸宁"、"崇贞"。御笔改"贞"为"祯",点用之。

上即位后,追尊刘后孝纯皇太后,迁祔庆陵,加李庄妃谥号,立周后为皇后,尊张后为懿安皇后。孝纯母年七十五,封瀛国太夫人。侄刘文炳,封新乐

【十万古书秘笈】www.fozhu920.com

侯。周后周奎,授左都督。次年,册立太子,封奎嘉定伯,懿安父张国纪,封太康伯。凡四大朝廷臣,俱用朝冠朝服,内奄则否。惟除岁祭中霤之神,司礼监掌印太监代行祭礼,奏请祭服服之,大朝止磕头呼万岁而已。逆贤擅政,凡遇大朝,自王体乾至牌子等,俱僭用朝冠朝服,于乾清宫大殿朝内,照外廷仪行庆贺山呼礼,赞礼内奄,一如鸿胪班首,亦致辞焉。后魏良卿晋封,逆贤改戴貂蝉冠,班列王体乾上。及上登极,逆贤仍照熹庙行礼,继惮上英明,止用本等服色,回众叩头呼万岁。

逆贤用事,动以立枷示威,前后毙者以千计。上一日问及逆贤,时与王体乾侍侧,体乾对曰:"大奸大恶,法所不能治者用之。"上蹙然曰:"虽如此说,殊觉太惨,非国家盛事也。"逆贤默然,众共叩头,呼万岁而退。

上既登极,所以优容客、魏者,一如熹庙,而信邸承奉,尽易以新衔,入内供事。后将李朝钦、裴有声、王秉恭、吴光成、谭敬、裴芳等,次第准其乞休,逆贤翼羽,剪除一空。复散遣内丁,方始谪逐逆贤。肘掖臣奸,不动声色,潜移默夺,非天纵英武,何以有此。时阁臣四员黄立极、施凤来、张瑞图、李国普,皆逆贤爰立也,上首放立极,而亟允枚卜之请,特点华亭钱龙锡、吴江周道登、萧山来宗道、高邑李标、长山刘鸿训、晋江杨景辰六员。后宗道以礼部题崔呈秀父恤典,有"在天之灵"等语,景辰以掌院率诸翰林公疏颂美逆贤,俱为科道劾奏,次年,与三旧辅俱次第斥放回籍。

上谕兵部: "各处镇守内官,一概撤回。凡相机度宜,约束吏士,无事修备,有事却敌,俱听督抚便宜调度。无复委任不专,体统相轧以藉其口。各镇督抚诸臣,及大小将领,务提起精神,殚靖忠画,以副朕怀!"

上谕户部:"封疆多事,徵输甚烦,朕殊悯焉。苏松等处织造,朕不忍以 衣被组绣之工,重用此一方民,其俟东南底定之日,方行开造,以称朕敬天恤 民至意!"

上谕吏部: "魏忠贤、崔呈秀天刑已极,臣民之愤稍纾。而诏狱游魂,犹然郁锢,含冤未伸,着该部院九卿科道,将已前斥害诸臣,从公酌议,采择官评。有非法禁毙,情最可悯者,应褒赠即与褒赠,应恤荫即与恤荫; 其削夺牵连者,应复官即与复官,应起用即与起用; 有身故捏赃难结,家属波累羁囚者,应开释即与开释,勿致人淹,伤朕好生之心!"

上谕礼部:"朕览《会典》'自宫禁例'一款:'民间有四五子以上,许以一子报官奄割,有司造册送部院收补日选用。敢有私自净身者,本身及下手之人处斩,全家发烟瘴地面充军,两邻歇家不举者治罪。'我祖宗好生德意,真至周密,故立法严明。近来无知小民,希图财利,私行奄割,童稚不堪,多至殒命,违禁戕生,深可痛恨!自今以往,且不收选,尔部可宣布朕命

,多列榜文。谕到之日为始,敢有犯者,按法正罪。仍许诸色人等,当时首告本地方官司奏闻。邻右歇家不举,从重治罪;有司知而不禁,并行穷处。倘有强奄他人,希图诬赖的,讯明反坐,决不徇纵。布告中外,恪行遵守!"

御史杨维垣疏参崔呈秀后,拟与群奸共收余烬,力持残局。时已差河东巡盐河南掌道御史安伸,题请留佐大计,削籍诸臣,虽屡奉起用之旨,维垣一手握定,百方阻遏。新参萧山、晋江,系彼同志,协力护持。监生胡焕猷疏论:"黄立极等四人,谓当逆贤擅权,揣摩意旨,专事逢迎,浙直建碑立祠,各撰文称颂,宜亟行罢斥!并乞查究督抚按之建祠者。"又言:起废不公不广,维垣特出疏参驳,且请下法司究问,指使萧山已票严旨,御笔批:"胡焕猷虽必有贿使之者,但不必苛求以滋葛藤,"珰党咸俯首丧气,中外颂大圣人举动出寻常矣。

时言路皆逆贤余孽,上特下考选之令,先后授曹师稗、颜继祖、宋鸣梧、 瞿式耜、钟炘等为给事中,吴焕、叶成章、任赞化等为御史。咸以纠弹珰党为 事,而朝端渐见清明矣。

崔呈秀子崔铎北榜中式,周应秋子周录南榜中式。虽经褫革,而衡文者尚 逃指摘,南京国子监助教施元徵上疏劾之。于是中书林萃芳、江阴知县岑之豹 俱下部议罢斥。主考时徐泰、陈其庆等,各疏辨,以糊名为辞。萧山辈力庇之 ,有旨免议。

崇祯元年戊辰正月,大计天下吏。主计者吏部尚书房壮丽、左都御史曹思诚、考功郎中李宜培、吏科都给事中魏炤乘、掌河南道御史安伸,佐计者杨维垣也。是举也。为圣天子第一新政。宜将媚珰诸奸,痛加扫除。房壮丽等皆珰孽也,互为容隐,咸逃吏议,人心颇为不平云。

江西巡抚杨邦宪,由陕西布政升任。当今上正位之后,犹进厂臣功德巍巍之疏,拆毁名贤子羽祠,并毁祠旁民居千余家,为造逆祠地。河南右参政周锵,造逆祠于开封,建标祠所,僭书大工,且致书魏良卿欲为逆贤造渗金像。四川右参政郭士望补官一疏,痛诋应山,其谀颂逆贤也,令人发指。江西副使李光春,已例转矣,犹疏论福清,备极丑诋。及申详逆祠,司道张福臻、王化行等,概置格外。即云抚按不行,开送科道,拾遗疏独不可纠举耶?伸与维垣不足道,炤乘亦漫无短长耶?按:炤乘于甲子冬升吏坦长,见珰焰方张,遂力请告归里,似乎有品骨者。今临事如此,前后若两截矣。然炤乘虽非珰孽,而长垣一胍,渊源有自。后入政府,构黄解之狱,其生平已见于此。

翰林院编修倪元璐奏世界已清,方隅未化疏,略曰:"近攻崔、魏者,必引东林为对案。一则曰邪党,再则曰邪党,何说乎?以东林诸臣为邪党,人将以何名加之崔、魏之辈?崔、魏而既邪党矣,向之首劾忠贤,参提呈秀者,又

邪党乎哉? 且天下之议论, 宁涉假借, 而必不可不归于名义, 士人之行已, 宁 存矫激,而必不可不准诸廉隅。自后之君子,以假借矫激深咎前人,于是乎豹 虎之徒,公然起而背畔名义。毁裂廉隅矣,于是乎连篇颂德,匝地生祠矣。夫 颂德不已,必将劝进;生祠不已,必且呼嵩。而人犹且宽之曰: '无可奈何 ,不得不然'耳。嗟! 充一'无可奈何,不得不然'之心,又将何所不至哉 ? 然今日之持议者,能以忠厚之心,曲原此辈,而独持已甚之论,苛责吾徒 , 亦所谓'悖'也。臣又伏读圣旨, 有'韩爌清忠有执, 朕所鉴知'之谕。深 仰天聪,旷然知人则哲如此。而近闻廷臣之议,殊有异同,可为大怪。爌之相 业光伟,他不具论,即如'红丸'议起,举国沸然,维时与事大臣,皆蓄缩闵 默,而爌独侃侃条揭,明其不然。夫孙慎行,君子也,爌且不附,况他人乎 ? 而今推毂不及, 点灼横加, 则徒以其票拟熊廷弼一事耳。夫廷弼固自当诛 ,在爌不为无说。封疆失事,累累有徒,而当日之议,乃欲独杀一廷弼,岂平 论哉?此爌之所以搁笔也。然究竟廷弼不死于封疆而死于局面,不死于法吏而 死于奸珰,则又不可谓后之人杀廷弼,而爌独不能杀之也。又如词臣文震孟 , 正学劲骨, 有古大人之器。其乡人之月旦, 比于陈实王烈。三月居官, 昌言 狱罪,人又以方之罗伦、舒芬。而今起用之旨再下,谬悠之谭不已,甚有加以 窝盗之名者, 岂以数十年前, 有其兄某不逞之事乎? 夫人知其有某之不逞, 以 为之兄, 而不知有某之至德、某之特行, 以为之祖父。且愚贤相越, 舜象已然 ,世不闻柳下惠膺盗跖之诛,司马牛受向魋之罚,文震孟何罪,遭此嫌讥!将 无'门户'二字,不可重提,聊用更端以相遮抑耶?"

时众论咸推蒲州旧辅,及先文肃、钱公谦益、姚公希孟等,户部员外王守履疏荐蒲州,奉有"韩爌清忠有执,朕所鉴知"之旨。而杨维垣一手障天,于蒲州、先文肃尤力行贬驳,舆情不平甚,故倪公出此疏。维垣随出"词臣持论甚谬,生心害政可虞"疏驳之。倪公亦出"微臣平心入告,台臣我见未除"疏,略曰:

"臣读杨维垣入告诸疏,深讶其不能仰副圣心,且若力欲与皇上相反者。 盖皇上之谕,一则曰:'分门别户,已非治徵'。一则曰'化异为同'。一则 曰'天下为公'。而维垣之言则曰'孙党、赵党、熊党、邹党。'皇上于韩爌 、文震孟曰'清忠有执,'曰'已着起用'而维垣于二臣曰'非贤,'曰'不 检。'是皇上于方隅无所不化,而维垣于正气实有未伸;皇上事事虚公,而维 垣言言我见。臣窃惑焉。据维垣折臣,盛称东林之尊李三才而护熊廷弼也,然 亦知东林有首参魏忠贤二十四罪之杨琏,及提问崔呈秀欲追赃拟戍之高攀龙乎 ?且当日之议,其于三才也特推其挥霍之略,未尝不指之为贪。其于廷弼也 ,特即西市之诛,未尝不坐之以辟,则犹未为失论失刑也。若以今日之事例之

,以魏忠贤之穷凶极恶,积赃无算,而维垣犹尊之曰: '厂臣公'、'厂臣不 爱钱"、'厂臣为国为民。'而何况李三才以五虎、五彪之交结近侍,律当处 斩, 法司奉有严谕, 初拟止于削夺, 岂不如骄儿护之? 维垣身系言官, 不闻驳 政,又何尤昔人之护熊廷弼者乎?而以臣为谬,臣不受也。维垣又折臣,盛称 韩爌。夫舍爌抵触逆珰,及抗疏撄祸之迹,而加以说情罔利'莫须有'之言 , 已非定论矣。即如廷弼一事, 爌但票免一枭, 未尝赦而欲用之也。至廷弼行 贿之说, 自是逆珰借此为杨、左诸人追赃地耳。逆珰初拟用'移宫'一案杀杨 、左诸人,及狱上,而以为难于坐赃,于是再传覆讯,改为封疆之案,派赃毒 比,此天下共知者,维垣奈何尚守是说乎?至不附'红丸'与孙慎行君子之说 ,臣言原非矛盾。盖慎行清望,与王之寀不同,议论深刻,亦不失春秋赵盾之 法, 使后之人加慎焉可耳。夫董狐不为卖直, 赵盾未尝贬贤, 而以臣为谬, 臣 不受也。维垣又折臣,盛称文震孟。夫震孟,臣不更论,即如王纪清正素著 ,以参沈?忤逆珰而谴斥,文则以救王纪而降削,均之得罪于逆珰者也。至以破 帽策蹇傲蟒玉驰驿,此说胡可全非。夫刑赏于出朝廷,而荣辱因之。若王纪之 时,已半是魏忠贤之刑赏矣,维垣试观年来破帽策蹇之辈,较之超阶躇级之俦 , 谁为荣辱? 自此义不明, 于是畏破帽策蹇者, 相率而颂德建祠; 希蟒玉驰驿 者,遂至呼父呼九千岁而不顾,可胜叹哉!至批炤告公祖之谤,吴人尽能辩之 。当朱童蒙官吴时, 偶一犯杖毙, 其妻贫不能殓, 乞丐里中, 文震孟从众题助 二金。事止此耳,有何把持放肆?而以臣为谬,臣不受也。维垣又极力洗发臣 '矫激假借'四字。夫臣之为此言,正为人之诋真狂狷为假名义者发也。当崔 、魏之世,人皆任真率性,相与颂德建祠,使有一人矫激假借,而不颂不祠 , 岂不犹赖此人哉? 认臣抑扬之辞, 为一成之论, 而以臣为谬, 臣不受也。乃 若维垣之持论,臣心未安者三:维垣以为真小人,待其贯满,可攻而去之,而 臣以为非训也。即如崔、魏之贯满久矣, 使不遇圣明御宇, 谁有能攻而去之者 ? 维垣到底以无可奈何之说,为颂德建祠者解嘲。假令崔呈秀舞蹈称臣于逆珰 ,其余诸臣,便亦以为无可奈何而尽舞蹈称臣乎?又令逆珰以兵劫诸臣,使从 叛逆,诸臣亦以为无可奈何,俯首从叛乎?维垣又言今日之曲直,不当以崔、 魏为对案。而臣以为正当以崔、魏为对案也! 夫人意见不同, 议论偶异, 总不 足以定真邪。如宋臣苏轼、程颐,交诋为邪,而两人并自千古。我朝大礼之争 论者,亦而贤之,而惟至品节,大闲一失,遂成霄壤。夫品节试之于崔、魏而 定矣,故有东林之人,为崔、魏所憎,恨其抵触,畏其才望,而必欲杀之逐之 者,此正人也。有攻东林之人,为崔为魏所借,而劲节不阿,或远或逐者,亦 正人也。以崔、魏定邪正,譬之以镜别妍媸,维垣不取案于此而安取案乎? 总 之, 东林取憎逆珰独深, 受祸独酷, 在今日当曲原其高明之概, 不当毛举其纤

寸之瑕,而揭揭焉反代逆珰分谤,斯亦不善立论者矣。"

疏入,上为心动,维垣辈之毒网始破。人谓倪公二疏,实为廓清首功云。 光禄寺阮大铖,上《合算七年通内神奸疏》,略曰:

"汪文言以徽州库吏逃罪投王安幕下,引左光斗入幕移官之疏,纷纷迎合。此内外谋倾宫闱之始。御史贾继春疏揭立争汪文言等嗾台省谀王安,佐杨涟、左光斗,而继春削籍。此中外谋杀言官之始。吏部尚书周嘉谟雅重熊廷弼,复任经略,而重处姚宗文、冯三元。此中外谋危封疆之始。汪文言处霍维华以谢王安,逆贤效之,逐戚畹,撼中宫。此中外谋危母后之始。"

后御史毛羽健劾其比拟不伦,党邪害正。有旨: "阮大铖前后反覆,阴阳 闪烁,着冠带闲住去!"盖长山所票也。

二月,会试天下士,命施凤来、张瑞图为考试官,取中曹勋等三百五十人 。

时群奸力持残局,海内正人,概不得登启事,翰林必由内阁题请。元城既逐,平湖当国,亦力持不可。及是,平湖、晋江,以会试主试入闱,高阳特题起升先文肃、姚文毅、虞山、朱继祚四人,兼及□者,以避嫌也,人谓老高阳耸涌成之。

- 三月,廷试策士,赐刘若宰、何瑞徵、管绍宁等进士及第出身有差。时上 留心策士,进呈三十六卷,并贮名金瓯中,以金箸夹之。凡三夹,皆得若宰
- ,遂定为状元。前是枚卜,华亭少所推毂者,吏都垣魏炤乘系华亭丙辰所取士
- , 故与会推。上亦贮名金瓯, 用金箸决之, 首夹即得华亭。

然两公勋业德望, 俱无闻焉, 何以邀有天幸乃尔?

御史吴焕,疏参漕运太监崔文升,略曰:

"文升引进李可灼,漫投寒之药,以致光庙宾天,实坐不赦之辟。而日为 逆珰腹心,总督漕运,控扼江淮要害,与刘忠选恣为纵肆,剥君虐民,几激大 变,应行逮问!"

疏入,文升拉同伴宫门,哭声达帝。上立拿倡首二奄,同文升各杖一百,俱降净军发孝陵。焕疏留中。

倪元璐疏请毁《三朝要典》,略曰: "臣观'挺击'、'红丸'、'移宫'三案,议关清流;而《三朝要典》一书,成于逆竖,其义不可不兼行,其书不可不速毁!请详其说:盖当事起议兴,盈廷互讼,争'挺击'者,力护东宫;争疯癫者,计安神祖。主'红丸'者,仗义之言;争'红丸'者,原心之论。主'移宫'者,弥变于几先;争'移宫'者,持平于事后。六者各有其是,不可偏非。以为忠悃,则皆忠悃;以为明见,则皆明见。总在逆珰未用之先,群小未升之日,虽甚水火,不害损篪。此一局也。既而杨琏二十四罪之疏发

,魏广微此辈门户之说兴。于是逆珰杀人,则借'三案';群小求富贵,则借'三案'。经此二借,而'三案'之面目全非矣。故凡推慈归孝于先皇,犹夫称颂德功于义父。又一局也。网已密而犹疑有遗鳞,势极重而或忧其翻局。于是崔、魏诸奸,乃始创立私编,标题《要典》,以之批根今日,则众正之党碑;以之免死他年,则上公之铁券。又一局也。由此而观'三案'者,天下之公议;《要典》者,魏氏之私书。'三案'自'三案',《要典》自《要典》,今执为金石不刊之论者,诚未思也。若夫翻即纷嚣,改亦多事,如臣所见,惟有毁之而已。夫以奄竖之权,而屈役史官之笔,互古未闻,当毁一。未易代而有编年,不直书而加论断,若云仿佛明伦,规模大典,则是魏忠贤欲与肃皇帝并圣,崔呈秀可与张孚敬比贤,悖逆非伦。当毁二。矫诬先帝,伪撰宸篇,既不可拟司马光《资治通鉴》之书,亦不得援宋神宗手制叙文为例,假窃诬妄。当毁三。又况史局将开,馆抄具备,七载非难稽之世,实录有本等之书,何事有此骈枝,供人唾骂?当毁四。当今正气日升,方隅渐化,自宜进以平饮,沃以温汤。然而逆珰之遗亦,一日不灭,则公正之愤,千年不释也。"

时上即欲将《要典》焚毁,萧山票旨言: "所请关系重大,着礼部会同史 馆诸臣详议具奏。"下增"听朕独断行"五字。既而廷议佥同,奉旨:"《要 典》着即行焚毁!"侍讲孙之獬, 诣东阁力争不可毁, 继以痛哭, 声彻内外 , 退复上《力疾不能供职疏》, 极言《要典》不可毁之故。御史吴焕, 上疏纠 之,略曰:"孙之獬争《要典》不可毁者,云'皇上于熹宗曾北面事之,见有 御制序文在朕之一字, 岂可投之火!, 是明以'御制'二字压皇上不敢动矣。 又云'皇上同枝继立,非有胜国之扫除,何必如此忍心狠手?于祖考则失孝 ,于熹庙则失友,是明咎皇上以不孝不友矣。'夫孙之獬亦知今日《要典》之 毁,毫无损于圣祖神孙之孝慈,而当日争'挺击',争'红丸',争'移宫 '三案诸臣,原未尝陷主于不慈,陷主于不孝。特群邪奸党,欲杀忠良,若无 题目,借此为罪案耳。夫当张差之梃而驰至,排闼直入也,其有所使而然,何 待辩?此而不问,将抗图鱼腹,肿发禁廷,东宫危矣。惟廷臣持破柱诘之威神 庙、光考自行烧梁狱词之法,父子兄弟之间,所全实多,止慈止孝,得此益彰 。而谓诸臣陷主于不慈,陷主于不孝,不亦冤乎? 及光宗嗣宝,匝月之内,雨 露滂沱,天下方庆万年有道之长;一旦哀思太过,圣体个匡赢,崔文升、李可 灼以泻下之药进, 鼎湖遽逝, 攀髯无策, 而涕泣号呼; 归罪尝药, 此忠臣孝子 痛极不择音之言。乃遽以悲愤叫号,定诸臣不赦之罪,反以圣躬尝试之崔文升 立跻总镇,李可灼登用方新,亦大不平矣。至于'移宫'一案,诚嫌太骤。然 当其时大故接踵, 朝野震惊, 宫府径庭, 危疑纷起。诚蚤得元子升中出震, 以 定群心,则负奠鼎,他何暇恤?彼谓宫中官眷,必宜从厚者,此痛定事后之言

。迨至圣眷无改,恩礼有加,于先帝之孝益显。惟日争'梃击',争'红丸,争'移宫',而初无损于三圣之孝慈,则又何刘志选、徐绍吉诸奸勒成《要典》一书,称之为孝而后孝,称之为慈而后慈也?如以为先帝叙文必不可更,彼伪祠之建、伪爵之封、位上公、锡铁券、胙土田,何一非称皇称制?奸人邪党,正将借此以恹群愚,欺当世,而不知斯民三代之直,断不可枉也。惟是公罪不明,邪正颠倒,所以辩言乱政,邪说横行。伏祈皇上将孙之獬立赐褫斥,以为无礼于君者戒!"

疏入,萧山辈竭力调护,得旨:"孙之獬已经回籍,词林闲局,不必过求!"

原任尚宝司卿黄正宾,上《圣世除恶务本疏》略曰: "前臣戍大同,目击内镇克减马匹银两,阳和各军鼓噪,毁官署,劫典铺,将吏叩头求免。比时抚按胁于内镇之威,莫敢据实奏闻。边防迄今坏尽,即一镇可推各镇也。是奄宦者,天下祸本也。至交结近侍,明律森然,乃虎彪肆行,而子孙翁集。究其为作俑者魏广微,发纵指示者徐大化也。大化始以攻熊廷弼为媚珰贽见,既而逢恶魏广微以担当共媒富贵。某宜戍,某宜削夺,一一疏记与广微,使大肆其排挤之毒手。夤缘督理大工,日奉魏忠贤色笑,克减工银无算。最后私受铜商厚贿,挪借惜薪司钱粮二十万,拂忠贤之意,勒令闲住,原疏可按也。及睹逆贤将败,令表侄杨维垣疏参崔呈秀,以为翻身转局地。目今大化、维垣,虽奉谴斥,潜居辇毂,日与奄宦往来,世界翻云覆雨,已三转于大化之线索,何叵测也。"

时萧山票旨,有"不苛求"句。御批: "杨维垣不许潜住京师,徐大化着回原籍去!"

御史陈乾阳,疏参赵鸣阳曾入逆贤之幕,有旨逮问。先是有魏奄学颜者,侍神庙久,奏对便捷,能解圣意,神庙颇信任之。光庙时,即休退矣。曾延 吴江赵鸣阳训其侄。逆贤事败,鸣阳误以学颜姓魏疑即逆贤,故疏参之。后法 司审鞫得实,鸣阳仍放回籍。

上以潜邸留心时艺,即入内合诸奄而试之,出"事君能致其身"题,取郑之蕙第一,即升随堂掌尚膳监印,未几乞休。

上求治颇急,召对群臣,多不称旨,每加诮诘。群臣愈惶悚不能对,惟长山条陈稍捷,上每温颜以优礼之。时貂孽杨维垣等相继出逐,虽出圣断,而票旨多由长山,于是御史袁宏勋有疏功之,略曰:"刘鸿训一入黄扉,扬扬自得,浃旬之间,革职闲住无虚日。可异者,杨所修、贾继春、杨维垣夹攻表里之奸,有功无罪,而诛锄禁锢,自三臣始。具军国大计,未暇平章,惟亟毁《要典》,谓水火元黄,是书为祟。今毁矣,水火元黄,息耶否耶?未毁以前,崔

、魏借之以空善类;既毁以后,鸿训借之以殛忠良。以暴易暴,长此安穷?御史高捷、史纟廷,相继纠参,锦衣张道亦有疏参,而工科杨继祖出疏争之,且言道越位妄言乱政,乞加重创!"时上传谕,欲将宏勋等重处,鸿训三揭力求,乃免。

时当考馆选,龙飞首科,例应加额。侍读张士范,上《馆额蒙恩疏》,内有"准加六名,以示优异"之旨等语。上因召对,问士范: "此旨从何而来?"士范对: "此疏臣不与知,乃新进士张皇所作"上曰: "既不与知,何以列名!"又曰: "既知张星名,又何云不知?"士范对: "疏入后,始知之。"上诘责再四。阁臣刘鸿训奏: "此新进士功名念重,致有此举,诚为可恶。然在皇上登极宏恩,惟望优容!"上乃命写本人名,又命士范具本回话。后士范回话疏上,有旨: "士范着回籍,张星不准授官!"

周起元之逮也,由于李实之疏,李实已逮问大辟矣。一日,上召对,特宣刑部署部事侍郎丁启曰: "李实一案,有疑惑无疑惑?有暗昧无暗昧?"启奏: "奉旨,九卿科道会问过,据实回奏。"上曰: "李实何以当决不待时?"启对: "李实与李永贞构杀七命,不刑自招。"上曰: "岂有不刑自招之理?"因问吏部尚书王永光,永光对: "李实初不肯承,及用刑,然后承认。"上曰: "重刑之下,何求不得。李实为魏忠贤追取印信空本,令李永贞填写,如何含糊定罪?"启对: "威福出于朝廷,一凭圣裁。"上曰: "持法要平,朕岂为李实?尔五虎、五彪,缘何不问他决不待时?"后又召对,上特携李实原疏示阁臣曰: "此李实参问周起元等原疏,卿等可详观之,看是朱在墨上,墨在朱上。"诸阁臣详览良久,俱对: "果是墨在朱上。"上曰: "可见是空头本。"复命传九卿科道递阅皆然。阁臣改票: "李永贞决不可待时,刘若愚次一等,李实又次一等。"

按:李实空本是矣。本内所列事款,远在江南,系何人开送?时为实赉奏者孙也,何不请提孙鞫问,究究到底?即云填写出于永贞,次一等足矣,何至又次一等也?永光窥瞰上意,全无执持,小人常态,固不必言。启身任司寇,不能执法廷诤,乃以"威福出自朝廷"一语卸责,亦安用司寇为矣?而阁辅科道诸臣,俱无一言纠正,此廷臣之所以见轻也。至"虎彪不问决不待时,"天语良々,法司置面孔于何地?窃谓苏茂相等之罪,尤浮于逆贤(下缺)。

给事中韩一良有《劝廉惩贪疏》,深当圣意,因召对,出此疏覆阅良久,命一良高声朗诵。甫读毕,取疏付阁臣阅。刘鸿训奏: "弊有两端,有交际,有纳贿。"上问: "何谓交际?"鸿训奏: "交际,如亲友问遗之类,情有可原;纳贿则希荣求宠,便不可以数计矣。"上曰: "朕阅一良所奏,大破情

面, 忠鲠可嘉, 当破格擢用, 可加右佥都御史。"吏部尚书王永光承旨, 因奏 : "科臣露草,必有所指,乞皇上命科臣摘其尤者,重处一二,以为贪官之戒 !"上召一良,指疏内"开之其源,导之有流"等语,着据实具奏来。一良对 : "臣今未敢深言,俟插辽平复之后具奏。若纳贿等事,臣疏中原说风闻,不 曾知名。"上意怒曰:"难道一人不知,遽有此疏?限五日具奏!"一良回奏 参周应秋、阎鸣泰、张翼明、褚泰初。后复召对,上曰: "周应秋等自有公论 ,张翼明已下部听勘,俱无用尔参!"又取一良前疏,反覆展视,御音朗诵 ,至"臣素不爱钱,而钱自至,据臣两月内,辞却书帕己五百余金,以臣绝无 交际之人,而有此金,他可知矣。"读至此,击节感叹,厉声问一良:"此五 百金何人所馈?"一良对:"臣有交际簿在。"上固问之,一良始终以风闻对 。上遂震怒,谓其以风闻塞责也。上即谕阁臣曰: "韩一良前后矛盾,他前疏 明明有人,今乃以周应秋等塞责。都御史不是轻易做的,要有实功,方许实授 !"刘鸿训等合词奏请:"臣不为皇上惜此官,但为皇上惜此言。"上温色曰 : "分明替他说话!他既不知其人,如何轻奏,岂有纸上说一说,便与他一个 都御史?"召一良面叱曰:"韩一良所奏疏,前后自相矛盾,显是肺肠大换。 本当拿问,念系言官,姑饶这遭。"

廷推袁崇焕为宁锦督师,崇焕赴任陛见。上召问曰:"建部跳梁,十载于 兹,封疆沦陷,辽民涂炭。卿万里赴召,忠勇可嘉,所有平辽方略,可具实奏 来!"崇焕奏:"所有方略,已具疏中。臣今受皇上特达之知,愿假以便宜 , 计五年而建部可平, 全辽可复矣。"上曰: "五年复辽, 便是方略, 朕不吝 封侯之赏。卿其努力以解天下倒悬之苦,卿子孙亦受其福。"崇焕谢恩归班 ,上暂退少憩。给事许誉卿,面叩五年之略。崇焕言:"聊慰圣心耳。"誉卿 言: "上英甚,岂可浪对?异日按期责功,奈何?"崇焕抚然自失。顷之,上 出,崇焕即奏: "东建四十年蓄聚,此局原不易结; 但皇上留心封疆,宵旰于 上,臣何敢言难?此五年之中,须事事应手,首先钱粮。"上即谕户部署部事 右侍郎王家祯,着力措办,毋致不充于用。崇焕又请器械,谓:"东建蓄谋已 久,器械犀利,马匹调习,今后解边弓甲等项,亦须精利。"上即谕工部署部 事左侍郎张维枢: "今后所解各项,须铸定监造司官及匠作姓名,若有脆薄不 堪者,俟杳究治。"崇焕又奏:"五年之中,事变不一,必须吏、兵二部俱应 臣手。所当用之人,即与选授;所不当用者,勿致滥推。"上即召吏部尚书王 永光、兵部尚书王在晋,谕以崇焕意。焕又奏:"以臣之力,制全辽而有余 , 调众口而不足。一出国便成万里, 忌功妒能, 夫岂无人, 即凛凛于皇上法度 ,不以权掣臣之手,亦能以意见乱臣之方略。"上起立, 伫听者久之, 寻谕 : "条对方略井井,不必廉逊,朕自有主持。"阁臣刘鸿训等俱奏,请假崇焕

便宜,赐之尚方。至如王之臣、满桂之尚方,应行撤回,以一事权。上深然之,命拟谕来看。

廷推王象乾以原官总督宣大。上召问,阁臣皆入槛内,去御案咫尺,盖异数也。上曰: "卿三朝元老,忠猷素著,见卿矍铄,知袁崇焕荐举不差,有何方略,可面陈来!"象乾奏: "臣年八旬,齿疏不能详奏,所有方略,具在疏中。"上固问之。象乾叙插汉卜哈诸酋离合始末,因奏: "朵颜等夷三十六家,今日应与哈慎一同连络,可得数万,安插蓟镇沿边驻牧,为我藩篱,似亦可敌插酋。"上曰: "观酋意,似不肯受抚者。"象乾奏: "从容笼络,抚亦可成。"上曰: "御夷当恩威并济,不可专持羁縻!"阁臣刘鸿训奏: "闻虎酋知王象乾至,退六百里。"上即问退去在何地方?鸿训不能对。象乾代奏:"退去直北沙碛中。"上又问: "倘款事不成如何?"象乾密奏夷情约数百言。上始色喜,随谕象乾曰: "卿年虽逾八旬,精力尚壮,朕心喜悦,卿抚插酋于西,袁崇焕御于东,恢复功成,皆卿等之力也。"象乾与阁臣,俱叩首而退。

按:崇焕原知辽不可复,冀以款羁縻岁月耳。观其举荐象乾,意可知矣。盖象乾专主抚也,象乾既赴任,专任插酋扶常事宜。旧例:属夷出马,中国出彩缯,互相贸易,名曰"马市。"虏中驹初生,系其母于山顶,驹从下一跃而上者,留充驰驱;跃至半而踣者,杀以为食;其懦不能跃者,则以与中国为市。象乾建议虏中既驽马相易,不若却其马而以价之半与之。少司马申公用懋持不可,谓:"虏所市马,诚不堪用,然每岁徵马以万计,于虏不可无少损,且以币易马,尚有名可举,今无故敛缯币与之,去岁币几何,毋乃为朝廷辱乎?又插索数甚奢,申公谓:"遽损其数,虏未必俯首听命。塞外旧弃地甚多,盍以泰宁等地为名,虏能归我旧疆,我当如虏所谓,虏必不肯划地,然后减损其数,在我为有辞矣。"时象乾耄无远图,当事者急欲成功,遂苟且从事。未几,插酋内犯入大同,杀戮甚惨,抚终不可成,而浪掷金钱数十万云。

上励精图治,而念切民艰,给事中黄承吴面陈水利,因言: "东南时患水灾,皆水利不修之故。"上问: "水利何为不修?"阁臣周道登、钱龙锡同奏: "水利是东南第一大事,但修理须要钱粮,臣等前已拟旨,着抚按酌议具奏。"上沈思久之,曰: "要修水利,可拢民否?"龙锡奏: "臣等惟恐拢民,故行彼处抚按酌议。"御史毛羽健有疏请苏驿递。上命羽健自读,因谕阁臣曰: "驿递疲困已极,小民敲骨吸髓,马不歇蹄,人不息肩,朕甚恨之。若不痛革,民困何由得苏?卿等可即拟票来!"及票至,上以票内有"按抚司道公务外,俱不许遣白牌。"语属含糊,复命改票。御史高钦舜奏请令各开炉铸造军器。上问可行否,阁臣皆奏可行。上曰: "何谓可行?"李标奏各边自为御

夷计,定当坚好。上曰:"此非祖制。"御史梁子疏请汰兵饷,内有"各边虚冒"等语,上召户、兵二部问:"兵饷何以冒滥至此?"户部署部事侍郎王家祯同兵部尚书王在晋奏:"兵饷冒滥已久,各边有事,督抚累次请添兵增饷,情弊已非一日。"又读至"老弱之人,曾荷戈而弗克。"上矍然曰:"荷戈者皆老弱,岂能御敌,如何不查?"即敕户、兵二部,速选廉干司官,往各边查核具奏。

上因召对,特命科官道至御前,谕曰: "朕思进贤退不肖,故令尔等为耳目司举核,就中无不冒滥,尔等试自思之,所举者果人人皆贤乎?所劾者果人人不肖乎?朕曾降谕切责,有'反坐'二字以求直言,今又面谕尔等,若藉口不言,要科道官何用?"上之孜孜求治求言若此。

袁崇焕至锦州,连疏请饷。上御文华殿谕曰:"崇焕前云'安抚锦州,兵 变可弥。'今又云'军欲鼓噪,求发内帑。'与前疏何相矛盾?卿等奏来 !"时百官有请允发者,有请发内帑者。上诘问户部,时尚书毕自严甫履任 ,极言户部缺乏,容当陆续措给。上曰:"据崇焕揭云'初三日即发变。'今 己初二,即此时发去已迟,何救于鼓噪?"上又云:"将兵者果能如家父子 , 自不敢叛, 不忍叛; 不敢叛者畏其威, 不忍叛者怀其德。如何有鼓噪之事 ?"上又曰:"内帑外库,俱系万民脂膏,原用以保封疆、安社稷,若发去果 实实有用, 朕岂吝此!"礼部右侍郎周延儒奏曰:"国家最忌, 无如关门。但 昔止防虏变,今并防兵变。前此宁远鼓噪,不处得流水发饷与他;今又鼓噪 ,请发内帑。各边效尤,将何底止?"上曰:"卿以为何如?"延儒奏:"臣 非敢阻皇上发帑, 此时安危在呼吸间, 急则治其标, 固当与之, 然非长策, 还 望皇上集廷臣,从长计议,画一经久之策!"上曰:"此说良是!若是专一请 帑,各边比例,这内帑岂有不涸之原,何以应之?"上又曰:"尔等不肯大破 情面,极力担当,动称边饷缺乏,朕每下旨严催,通不解来,即如赃银充饷 ,至今不解,豆价行查,至今不曾回奏,如此拖欠稽迟,粮饷何时得足?"上 又曰: "你们每每上疏求举行召对文华商确, 犹然事事如故。召对都成旧套 ,商権俱属虚文,何曾做得一件实事来!"上又曰:"朕自即位以来,孜孜求 治,以为卿等当有嘉谋奇策,召对商榷时,朕未及周知者,悉以入告。乃俱推 诿不知, 朕又何从知之?"时天威震迅, 忧形于色, 大小臣工, 皆战惧不能仰 对。而延儒由此荷圣眷矣,时十月初二日也。

插酋入犯大同,总兵渠家祯闭门不出,任其杀掠。上召百谕曰:"朝廷养士,费许多兵饷。一遇虏至,便束手坐视,只请兵饷。"上又曰:"插酋杀戮人民,满载而归,巡抚官不能防御,是功是罪?朕之封疆,止仗一喇嘛僧讲款,不令虏轻中国耶?"上又曰:"讲款整饬,着实整饬,难道中国就胜不得他

?"上又曰:"今边疆失事,只参总兵等官,难道叙功不升,文官朦胧偏心,朕甚恶之。"后渠家祯辩疏至,上示阁臣。俱言:"大同失事甚夥,家祯拥兵坐视,岂能逃罪?"上曰:"督抚如何令千余兵马,便要去敌插酋十余万众?渠家祯既有罪,督抚作何事?"刘鸿训奏:"武臣在外提兵,文臣在内调度。"上曰:"文臣还当节制武臣,今督抚一向人马不行操练,平日虚冒,临敌张皇,以千余弱兵,抵十万插酋,卿等试思如何抵得?"鸿训奏:"皇上责备文臣极是,但自皇祖静摄以来,至先帝时二三十年,边备废弛已久,一时猝难整顿。"上曰:"而今何如?"钱龙锡等俱奏:"而今比前,大不相同。"上曰:"此俱是赞扬之词,尚未见行一实事,如何便见不同?"呜呼!有君无臣之概,上已显然于言外矣。

阮大铖之逐也,票拟出长山手。大铖先嗾袁宏勋等攻之,不动,因日夜伺 其短。而长山恃有圣眷,颇肆招摇,复向人语:"皇上毕竟是冲主。"随有布 此语于宫中者。上闻之,怒甚,适有擅增敕言之事,长山遂膺严谴。

惠安伯张庆臻,营谋管事,用贿于长山,于敕书内擅增数字。大同失事 ,本兵王在晋,隐匿不以实告,御史吴玉上疏参劾。上召对,命吴玉宣读,读 毕,上问阁臣。李标奏: "在晋屡被人言,宜放他去!"上曰: "此事只有一 个是非,封疆大事,中枢重任,自有祖宗之法,如何只教他去便了?"上又问 阁臣: "张庆臻改敕书一事,卿等岂不知道?卿等先奏,兵部有手本,庆臻有 揭帖, 岂有不知?"上又问庆臻:"不上本,如何敢送私揭?"庆臻奏:"臣 以一时盗贼生发,不及上本。"又系小事,不敢渎奏。"上曰:"改敕书,怎 云是小事?"因令诸臣奏来。户部尚书毕自严等俱谢不知。上曰:"卿等在外 边,都是知道的,今乃说不知!"又令科道官奏来。给事中张廷鼎奏张庆臻用 贿改敕书是实。李觉斯与御史王道直俱奏如廷鼎言, 但不知主使何人。吴玉奏 主使系刘鸿训。张庆臻辩:"改敕书系中书之事,臣实不知。"吏部左侍郎张 凤翔奏: "庆臻用贿改敕, 窃弄兵权, 大不敬, 无人臣礼。中书不过颐指气使 之人,如何擅敢改敕?"阁臣李标等合词奏:"臣等与鸿训同事,并不闻有此 ,还求皇上细访!"上曰:"这样明讲,何须更访?"即令阁臣拟票。阁臣逡 巡未即拟,上正色严促者再。乃拟旨:"鸿训、庆臻,俱革职听勘。"又吴玉 疏内有"时局"字。上问: "何为时局?"玉奏: "如当初是魏忠贤的局面 ,而今是皇上的局面。"上怒曰:"如何将魏忠贤比朕?"又吴玉奏事时,给 事中熊奋渭私议疏中"开国元勋"等语为非是,其声颇高。上问班中有声是谁 ? 奋渭长跽俟命。候召对毕,与百官同出,随传熊奋渭,着降三级调用。后部 院会勘,有旨:"王在晋革职回籍,刘鸿训附近充军。"

袁崇焕屡疏请饷,上召对,谕诸臣曰:"袁崇焕在朕前,以五年复辽,及

清慎为己任。这阙饷事,须讲求长策!"又曰:"关兵动辄鼓噪,各边效尤,何以底止?"礼部右侍郎周延儒奏曰:"军士要挟,不止为少饷,毕竟别有隐情。古人罗雀掘鼠,军心不变。今各兵止少他折色,未尝少他月饷,如何辄动鼓噪?此其中必有原故"上曰:"正如此说,古人尚有罗雀掘鼠的,今虽缺饷,岂遂至此!""罗雀掘鼠"四字,深契圣心,延儒之兮兮于"枚卜,"其衷愈热矣。

上一日御讲筵,问阁臣曰:"'宰相须用读书人,'当作何解?"周道登对曰:"容臣等到阁中查明回奏。"上始有愠色,继而微笑嘻甚。上又问阁臣:"近来诸臣奏内,多有'情面'二字,何谓情面?"周道登对曰:"情面者,面情之谓也。"左右皆匿笑。

上究心利弊,尤留意边防。各边以缺饷告,司农仰屋无计,上因召对,谕诸臣曰:"朕记得先年有大工,有生祠,多少钱粮,无日不进益,有发有余。今大工完了,生祠毁了,如何不足?前日又撤了各处内镇,便该有许多钱粮下来,那里去了?"户部尚书毕自严奏:"外解不能全完,所以不足。"上问:"外解何以不全完?"上又曰:"太仓银两,原非边用,如何急了便要请帑?朝廷给饷养兵,原期实用,如此动辄鼓噪,养这骄兵何用!"随谕自严:"卿到部里,将新旧钱粮,多要彻底澄清,逐一查算具奏!"

按:祖制,省直各有预贮银两以备急用,多者几十万,少者十余万。如蓟镇则有银八万五千有奇,贮遵化县库,名曰"备边。"江南有银十万两奇,贮镇江府库。浙江有银十七万两有零,贮温州府库,名曰"备倭。"他省仿是。地方猝有变乱,不烦催科,不支官帑,事可立办。自魏忠贤生祠开端,咸取给于是,造祠者十之二三,余皆入抚按司道私囊中矣。斯时若大臣有留心国计者,委曲详列其弊,并请严查各边各省备边备倭,原额钱粮几何,生祠开销几何,即勒令建祠抚按司道照额补偿,遴选风力科道究竟其事,俾国家收士饱马腾之用,而氓庶免头会箕敛之苦。且使世之为贪吏有余财者,知法制严明,不敢恣其壑,亦救世一策也。惜乎,廷臣平日毫不究心,无以慰圣天子焦劳至念。自此以后,帝意天下自有余财,群臣不肯实心任事。虽兵荒〉存臻,言赈言蠲,皆置不省。鸣呼!真千古有余痛矣。

●卷二

天启元年辛酉,虞山钱谦益以编修主浙江试,归安韩敬与秀水沈德符,预捏字眼,假称关节,令人遍投诸应试者,约以事成取偿。浙士子多堕其网中,钱千秋与焉。千秋字眼,以"一朝平步上青天"七字为七艺之结。谦谥在闱中,弗暇察也。比撤棘,敬等即发觉其事,复唆礼科顾其仁磨勘参送,谦益亦自具疏简举。奉旨下部。部拟千秋与居间徐时敏、金保元俱依律遣戍。谦益与

本房郑履祥失于觉察,罚俸三个月。奉旨依拟。此天启二年事也。后时敏、保 元在狱病故,千秋发东胜右卫所充军,收管存案,随遇赦,抚按给帖释放。事 结久矣。当枚卜,廷臣共推毂谦益,而宜兴周延儒以召对数语,上契圣衷,若 一列名,必蒙点用。延儒又结好于戚畹郑养性、万炜及东广唐之徵以为内援。 给事中瞿式耜,恐两人不能并相,因力阻延儒。延儒大不堪。时吏部尚书王永 光杜门乞休,势在必去,御史梁子璠持疏欲令侍郎即代行之理。于是式耜疏请 , 永光科枚卜, 然后听其去, 永光遂开籍, 见朝会推。疏上, 首承基命, 次即 谦益。而延儒、温体仁俱不得预。延儒暗布流言,谓此番枚卜,皆谦益党把持 。上阅会推,无延儒名,遂入其说。体仁乃上《直发盖世神奸疏》,即举千秋 关节事参谦益。上为召百官面讯,谦益奏辩: "千秋关节,已经疏参,刑部勘 问明白,现有案卷在部。"体仁称:"千秋在逃,过付者为徐时敏、金保元二 人,提至刑部,亲口供扳谦益,如何隐得?"彼此质辩良久,上命辩疏与参疏 俱取上来。上问体仁: "疏内称'神奸结党欺君,'奸党是谁? 枚卜大典,谁 人一手握定?"体仁奏:"谦益之党甚多,臣还不敢尽言。至于此番枚卜,皇 上务求真才,其实多是谦益。"吏科都给事中章允儒奏:"钱千秋一事,久经 问结。体仁资俸虽深,品望甚轻,会推不一,遂不甚热中。如谦益关节果真 , 何不纠于未枚卜之先? 今会推疏上, 点与不点, 一听圣裁。"体仁奏"科官 言,正见其党谦益。盖未枚卜之先,不过冷局,参他何用?纠之于此时,正为 皇上慎用人耳。"允儒奏:"从来小人陷害君子,皆以'党'之一字,昔魏广 微欲逐赵南星、杨涟等,于会推疏,使魏忠贤如一'党'字,尽行削夺。留传 至今,为小人害君子之榜样。"上怒叱曰:"胡说!御前奏事,怎这样胡扯 ? 拿了!"时无人承旨。上问锦衣卫何在?卫帅承旨,将允儒扶出。体仁又奏 : "皇上试问冢臣王永光,屡奉温旨,何以不出?直待瞿式耜有疏完了枚卜大 事,然后听其去。是冢臣去留,皇上不得专主,有此事否?谦益热中枚卜,先 令梁子璠上疏,欲令侍郎张凤翔代行会推,此从来未有之事。"上召诸臣问曰 : "朕传旨, 枚卜大典, 会推要公, 如何推这等人, 是公不是公?"王永光奏 "皇上召问吏科河南道,与郎中耿志炜,便知道了。"体仁奏:"永光是六 卿之长,用贤退不肖是他的职掌,如何推在司官身上?"河道掌道御史房可壮 奏: "臣等多是公议。"上曰: "会推大事,其中推这等人,还说是公议?诸 臣奏来!"阁下李标等俱奏:"关节与谦益无干。"体仁奏:"分明满朝俱是 谦益一党,臣受四朝知遇,忠愤所激,不容不言。关节是真,若不受贿,如何 得中? 况今钱千秋现在京师, 曰入谦益之幕, 指望谦益入阁, 希图辨复。谦益 可以枚卜,则千秋亦可会试。"李标等又奏:"前次招问明白。"上曰:"招 也闪烁不可凭据。"礼部右侍郎周延儒奏:"皇上再三问,诸臣不敢奏者:一

- 15 -

者惧干天威,二者牵于情面。总之钱千秋一案,关节是真。现有招案朱卷,已经御览详明。关节已有的据,不必又问诸臣。"上又诘问诸臣曰:"朕著九卿科道会推,便推这样人。就是会议,今后要公!若会议不公,不如不会议。卿等如何不奏?"延儒又奏:"大凡会议全推,皇上明旨,下九卿科道,以为极公;不知外廷止沿故套,只是一二个人把持定了,诸臣都不敢开口。就开口也不行,徒然言出祸随。"上命再奏。延儒复奏如前。体仁奏:"臣孑身孤立,满朝俱是谦益之党。臣疏既出,不惟谦益恨臣,凡谦益之党,无不恨臣。臣一身岂能当众怒?臣叨九列之末,不忍见上焦劳于上。诸臣皆不以戒慎为念,不得不参。恳乞皇上罢臣归里,以避凶锋!"上曰:"既为国劾奸,何必求去?"时谦益伏地待罪,上命出外候。次日奉旨:"钱谦益既有议论,著回籍听勘!钱千秋法司提问!"又章允儒、房可壮,各具疏认罪,瞿式耜、梁子璠各具疏回话。有旨:"俱著降三级调用。"

己而,御史毛九华疏纠温体仁逆祠献媚诗册,任赞化疏纠体仁居乡不法事 。上召对,体仁奏: "臣若有媚珰祠诗必以手书为贽,万无木刻之理: 既系刻 本,必流传广布,何以两年来绝无人论及?且此册何不发于籍没逆珰之时,而 得于九华之手? 乞皇下敕下该部, 严究所刻之人, 此诗从何得来, 则真伪立见 。若但以刻本为据,则刻匠遍满都城,以钱谦益之力,何所不假捏?"上如言 诘九华。九华对: "八月买自途间。"上曰: "八月买的,如何到今才发 ?"九华对:"臣十月考选。"体仁奏:"臣参钱谦益在十一月,九华参臣在 十二月; 九华既得此册, 何以不急具疏特纠册中媚珰诸入, 而但于条陈疏末 ,单指臣名?种种真情,已自毕露。"上问阁臣如何说,首辅韩爌奏:"体仁 平日硁硁自守, 亦有品望。但因参论枚卜一事, 愤激过当, 致犯众怒, 所以诸 臣攻他。"体仁奏: "臣通籍三十年,并无一字挂人弹章。只因参了钱谦益 , 攻者四起, 凡可以杀臣逐臣者, 无所不至。岂一人之身, 贤奸顿异至此。毛 九华系谦益之党无疑。"上曰:"温体仁也辩得是。"又召御史任赞化,上曰 : "毛九华参温体仁一诗尚且不真, 尔如何参他许多无根之旨? 如此亵语, 在 御前渎奏?"体仁奏:"赞化疏全是诬捏,凡宦游臣乡者俱可问。即如说臣与 陈与郊儿女姻家,此一查可明。事事无影,虚捏如此。"赞化奏: "臣之所言 ,不过采访公论,长安万口如一。"体仁奏:"去年,谦益未入都门,赞化代 谦益首攻御史陈以瑞。以瑞系崔、魏削夺,皇上赐环之人,因会参谦益科场之 事, 赞化反以媚珰纠之。及谦益入都, 把持吏部, 覆之为民。此赞化为谦益死 党之一证也。去秋,皇上未有枚卜之言,赞化特出荐相才一疏,盖为谦益而发 , 至称谦益为伊周之班行。此赞化为谦益死党之二证也。若谦益幸入纶扉, 赞 化自居拥戴首功。一旦被臣参破,故恨臣最深,诬臣最甚。"赞化奏:"陈以 - 16 -

瑞部覆冠带闲住,皇上独断著他为民,体仁如何力保以瑞?"体仁奏:"臣非敢力保陈以瑞,只因以瑞曾参谦益,故赞化还将以瑞参论。"上曰:"不必多奏,候旨行!"自是体仁以告讦见知于上。结党之说,深启圣疑。攻者愈力,而圣疑愈圣矣。

江西庶吉士朱统钅希与吴江相公有交,其得馆选也,吴江为之道地。虽云 无私,而实有意。给事中阎可陛疏攻吴江,并及统钅希。著仍选中书,周道登 准回籍调理。后统钅希朦胧起授简讨,上亦弗深究也。

上一日御日讲,讲官徐光启讲《中庸》毕,上忽问曰: "既云'知天地之化育,'又云'其孰能知之,'是同是异?"光启以"化育"分内知,"孰能知"分外知。上哂曰: "知也有内外。"年终,讲官叙劳,内阁题光启以礼部侍郎加太子宾客,照旧日讲。上抹去"照旧日讲"四字。

二年己巳二月初四日,皇长子生,中宫周后出。我明中宫无生子者,三百 年来,周后一人而已。

考:圣躬燕寝之所,为屋三楹,而不并列,由第一间而后第二间,而后第三间。其第三间,圣躬晏息处也。其第二间,具大薰笼,贮衾绸之属。凡召幸宫眷,至第一间,则尽卸诸裳,裸体至第二间,取衾绸被身,乃进至第三间,所谓抱衾与绸也。即中宫与东西两宫赴召,不敢不遵用此礼。惟先后以曾同糟糠,不肯赴召。又圣驾幸宫中,旧例圣母趋出宫门外接驾。先后亦以糟糠故,废此礼不用。

蒲州再召,适当推敲逆案。右庶子杨世芳,其姻家也。世芳乃纂修《要典》者,自应入逆案中,蒲州力庇之;薛国观亦以沈维炳护持,俱邀漏网。而同事朱继祚、余煌、张惟一、袁鲸等,皆援例格外矣。以此蒲州相业,颇不协人心。

工部节慎库主,给发商人上供颜料银两,最深称弊薮。设有监督主事一员,巡视科道各一员,所以厘奸剔弊计,自至详也。而诸府奸更甚。四月,上特发其弊,监督主事刘麟长、巡视给事中祖重烨、御史高赍明俱下狱。因追论元年同事诸臣,惟重烨与御史吴阿衡狠藉颇著,复徵阿衡下狱。鳞长、赍明,以无染止行降调;阿衡于边警时,以边才拔为监军御史;重烨遣戍。

乌程既特疏参虞山,宜兴复于召对佐理之,举朝皆与为敌,弹章如羽,上坚留不放。时有四凶之目,指乌程、长垣、宜兴及少司马也。八月,部推乌程为南京礼部尚书,以骆从宇陪。推大成寺卿康新周为南京工部侍郎,以何乔远陪。御笔俱点陪。乔远以尚宝卿请告林下,仅五品耳,而躐跻九列,则乌程之提挈也。

九月,河南道驿传道缺,推原任副使路周贺填补。领敕之日,适上正视朝

,路老迈甚,支离万状。上传谕阁臣云:"路周贺举步蹒跚,语言蹇塞,河南虽不是边道,驿传也不是容易的,卿等还传与吏部知道!"出言成章,真天纵也。

于是有三盛事,皆非人力可强致者:一则锦衣徐本高之八世一品也,本高为文贞公元孙,文贞前以少傅赠其曾祖父如其官,连本身四世一品矣,本高承父贞武荫历官都督同知,际遇覃恩,亦得赠其曾祖父如其官,连本身亦恰四世一品,虽总由文贞推恩,而一人不中断,一人不重叠,恰符八世,俱腰玉称一品,亦宇内所希觏矣。一则南海黄士俊之父也,士俊登万历丁未状元,历官礼部尚书,际遇覃恩,封其父如其官,适百岁。士俊给假归家,称觞,有旨:"准与建坊,锡名熙朝人瑞。"夫百岁称觞,异矣。乃其子以尚书顿首堂下,己亦受尚书封,绯袍犀带,称百岁老臣,且邀有煌煌天语,不尤异乎!一则晋江杨元锡也,元锡登崇祯甲戌进士,年才十六,释褐之日,发仅覆额,所谓其位可致,其年不可幸也。

浙江总兵王光有病,不任事。宁绍副将林某,勇而且廉,当事者拟以林继王之座。林某亦颇有望擢之思,遣役入都修候,王亦遣役入都,两役交遇于职方之门。王役谓林谋攘其主之缺也,不胜其怒,遂挥老拳。林役不敢抗,展侧之际,所赉候仪堕地。事既宣传,不可终隐。职方郎中方孔照具疏参林,有旨:"革职提问。"人皆冤之。

琉球国王新立,遣使告知,且请受封。旧例:给事中、行人各一员,充正副使。时科已推山东杜三策,行人应属江西萧士玮,次则山东孔闻籍。两人交相推诿,至诟詈于司正杨抡之门。抡不胜其愤,遂自请行。有旨:"杨抡归升京堂用,萧士玮降三级,调外任,孔闻籍不准考选,调南京用。"抡与三策,皆赐一品服,以是年九月出都,至六年八月,始克航海完册封事。归时,飓风大作,几葬鱼腹。七年二月复命,三策升太常寺少卿,抡升尚宝司少卿。抡以惊悸成疾,未几卒。闻籍后升陕西西宁兵备道,适有番夷之变,合家自焚。

陕西饥民倡乱蔓延,廷推杨鹤以兵部右侍郎总督全陕。上召问方略,鹤第以清自持、扶恤将卒对。先是,天启丁卯,陕西大旱,澄城知县张耀采催科甚酷,民不堪其毒。有王二者,阴纠数百人,聚集山上,皆以墨涂面。王二高喝曰:"谁敢杀张知县?"众齐声应曰:"我敢杀!"如是者三,遂闯入城,守门者不敢御,直入县杀耀采。众遂团聚山中。巡抚胡廷宴,老而耄,置之不问。又延、庆连岁荒旱。去冬,有王嘉允者,倡乱于府谷,蔓延于西、汉以南。今春,延绥巡抚岳和声、陕西巡抚胡廷宴,各报略阳、淳化、绥德、宜川等处流贼孔棘,郧阳抚治梁应泽亦以汉南盗告急。三月,商雒兵备刘应遇率毛兵至汉中合川兵击贼,贼奔汉阴,应遇追斩五百余人,诛其渠魁十余人,余悉北走

, 汉南盗平。八月, 贼复犯耀州, 参政洪承畴合官兵乡勇共万余人, 击贼于云阳, 败之。夜来, 贼乘雷雨掠淳化入神道岭。此流贼之始也。

九月,奢、安二酋平。先是,土司奢崇明、安邦彦先后称叛,云、贵不靖者,七年于兹。去冬复起,朱燮元总督云、贵、川、湘、广西五省,专任讨贼。而贼据大方,阻险负隅。崇明僭号大梁王,邦彦自称四裔大长老,谋先犯赤水。燮元侦知之,命守将许成名佯北,诱贼深入。度贼已抵永宁,分遣林兆鼎从三坌入,王国祯从陆广入,刘养鲲从遵义入。邦彦分兵四应,力颇不支。复遣监军副使刘可训同降将罗象乾,以奇兵绕出其背夹击之。贼大惊溃,崇明、邦彦皆没于阵,官兵斩其首以献。捷闻,燮元等俱进爵赍银币,子荫有差。御史毛羽健疏请添设永宁巡抚,即以刘可训为之,以靖地方,以劝劳臣。不报。

是冬,拟册立东宫,中外皆望大赦。九月二十六日,上召阁臣进,已素袍角带,决意行刑。二十七日,御笔勾逆案倪文焕、李夔龙、梁梦环、田吉,封疆则总督镐、抚臣张翼明、总兵渠家祯,监造则工部高道素偕内臣黄用。督造桂王府第时,惠王封荆州,桂王封衡州,并在湖广筦计者,臆揣就国,必以齿序,经费每急荆缓衡。天启七年夏,桂王之国,距惠王仅数日,巡按温皋谋疏乞展期,逆奄矫旨切责,有司仓皇那济。道素与用,画工趱造,道素督正殿以外,用督寝殿以内,皆潦草塞责。今年三月初三夜,大风雨,雷震寝殿,压死宫女六人。以后每遇风雨,王同诸宫眷即露立庭中,盖深恐覆压之惧也。事闻,黄用司礼监拿问,道素革职,法司究问。用狱未具,道素在刑部,先拟赎徒。董御史羽宸疏激上怒,屡谳屡驳,加等论死。至是勾及之。阁臣韩爌以为请,上曰:"朕若出藩邸,这就是榜样。高道素监造王府,而使数百宫人死于非命,即寸斩之,未足蔽辜,又何请焉?"是日,道素意必无他虞,同醉以往,及行刑,则已醒矣,仓皇不能出一语,但连呼"如何如何"而已,多冤之。黄昏,大雨雪。

十月之朔,上御殿颁历,忽有声冤自刎于丹墀者。究竟之,乃民间词讼事。其人刎而不死,上命刑部提问其事,立案不行。时先文肃语当事曰:"此怪 兆也,宜修边!"逾月,即有辽警。

毛文龙向为辽东参将,辽阳陷没,文龙逃至海滨。适有难民数千人,文龙以术笼络之,遂同航海至皮岛。盖皮岛居辽东、朝鲜、登莱之中,称孔道。文龙斩荆棘,具器用,招集流民,通行商贾,南货缯币,北货参貂,咸于文龙处输税挂号,然后敢发。不数年,遂称雄镇。又掠沿海陵丁,或指建州奸细,或称临陈斩获,以是积功官都督,挂平辽总兵印。逆贤时,各边出内奄镇守,文龙亦疏请内奄监其军。上即位,严核军饷,敕下山东抚按,檄登莱后备王廷试往。廷试,多欲人也,既饱其欲,遂盛诩文龙忠勇可用,士饱马腾,绝无破冒

-19-

。文龙亦惮上英明,思有以自立,乃通情于清,愿捐金三百万,易金、复二卫地,奏恢复功邀上赏。已成约矣,袁崇焕督师出关。

上召问方略,以五年为期,可以平辽。及履任,觇知文龙有成约,急遣喇 嘛僧入清,啖以厚利,欲解文龙议以就己。而清最重盟誓,坚持不可,强之再 四,不听。喇嘛僧曰: "今惟有斩毛文龙耳。在清不为负约,在我可以收功。 "崇焕遂以阅武为名,直造皮岛,大阅军士,文龙置酒高会。次日,文龙进谒 , 崇焕亦置酒留宴, 酒半, 称有密旨, 即座中擒文龙, 斩于辕门外。时崇焕立 营严整, 众亦不敢犯, 文龙部下千余人, 散往他处, 余众悉就抚。事定, 然后 入告。朝廷亦姑容之,时七月间事也。先是,崇焕出都,阁臣钱龙锡叩以辽事 , 答以当先从东江做起。龙锡谓: "舍实地而问海道何也?且毛帅亦未必可得 力。"崇焕云:"可用则用之,不可用则杀之。"至是,疏中即入钱语。上以 问锡龙,锡龙谓实有之。而文龙既杀之后,清来索赂,崇焕无以应,特疏请增 三百万,谓:"五年之后,全辽皆复,并从前所加各项,皆可蠲余,此一劳永 逸之计也。"上集群臣廷议,皆执奏不可。崇焕无所出,遂听清入犯,由喜峰 口、马兰谷、松棚路阑入,直抵遵华。时新令严汰冗兵,被汰者阴谋为乱,清 兵临遵北城下, 蓟抚王元雅尚汰兵四百人, 兵即开门延师, 元雅死于乱军, 清 兵遂破三屯营。蓟镇总兵朱国栋自缢,山海总兵赵率教统兵赴援,营于七家镇 岭, 猝与清兵遇, 众溃, 率教死之。报至, 举朝震恐。上命蓟辽总督刘策戴罪 立功,控扼石门,以防西轶。又命保定巡按解经传同仓储总督南居益驻守通州 , 专护仓储。又命太监李凤翔提督京营, 与总、协二臣料理城守。又命兵部急 徵宣大、山西兵入卫。

枚卜一案,以乌程、虞山故,高阁不行。至是,蒲州乞休,力请点用。十一月初六,上点大名成基命一员,至岁底,复点桐城何如宠,又于会推外,特点宜兴周延儒及会稽钱象坤,共四员。

王在晋被谴后,上召对群臣,升工部右侍郎王治为兵部尚书。治,山东人,相貌极伟岸,上私语云: "好似门神。"卜者周生问之曰: "中枢之座不久矣。"以门神一年即易故也。至是,清兵阑入,十一月十一日,上召对,礼部右侍郎周延儒奏: "中枢备御疏虞调度乖张,既不能预授方略,拒敌于塞外;又不能整顿兵马,歼敌于城中。谁任中枢决裂?"简讨项煜继之,且引世庙庚戌丁汝夔故事云: "斩一丁汝夔,将士震悚,虏闻风宵遁。"上遂下王治于狱。说者谓: "既例丁汝夔,必有为杨守谦者矣。"

以左侍郎申用懋代王治,升口北兵备梁廷栋为顺天巡抚,起旧帅杨肇基为 蓟镇总兵,起旧辅孙承宗于家,督师通州,诏天下勤王。

申甫者,游棍也,始为僧,号本初。游滇、黔中,得彼中役鬼之术,小试

辄验。庶吉士金声荐之。上召问,颇惑其术,特授为副总兵,捐内帑七十万金 ,听其造车募兵之用。授金声为御史,监其军。时庶吉士刘之纶,四川人,请 缨甚锐。上壮其志,超授兵部右侍郎,募兵剿虏。

大同总兵满桂,夷种也,勇悍敢战,率兵五千入卫,营于胜德门外。虏骑以十一月初三破遵化,十五至坝上,二十日薄都城。自虏冲突而西,从城上望之,如黑云万朵,挟迅风而驰,须臾已过。满桂身带重伤,血染征袍,所存仅三千人。

袁崇焕入援,抵都城下,上召对,问行间方略,赐御膳,解上所御貂裘被之,与祖大寿皆赐盔甲一副。然崇焕虽名入援,听虏骑劫掠,焚烧民舍,不敢一矢相加。城外戚畹中贵园亭庄舍,为虎骑蹂躏殆尽,皆比而揭其罪状入告。民谣云:"投了袁崇焕,达子跑一半。"兼崇焕出言无状,对百官讼言:"达子此来要做皇帝,己卜某日登极矣。"户部尚书毕自严,至挢舌不能下,举朝皆疑之。

阁部孙承宗虽奉旨督师通州,而南居益、解经传皆不受调度。时都城盛传通州、三河等处皆陷,承宗遣人赉奏至,上喜曰:"通州固无恙乎?"即奉旨,督抚等官俱听枢辅节制。

时廷臣请缨者甚众:祭酒锡畴,愿任募兵,可得二十万人。简讨项煜,荐举尚书李腾芳可当大任。请面对者,不一而足。上传各官,俱于本衙实修职业,诸臣俱废然而退。

十二月初一日,上复召崇焕、祖大寿入,上温谕大寿,而历数崇焕之罪 ,遂擒崇焕,下诏狱。阁臣力谏,谓"临敌易将,兵将所忌。"上曰:"势已 至此,不得不然。"大寿出朝,悍然,竟率众东行。中朝无可如何,敕阁部孙 承宗抚谕之。

初二日,上以城守潦草,下工部尚书王凤翔于狱;营缮司郎中许观吉、都水司郎中周长应、屯田司郎中朱长世,俱廷杖八十。临时,阁臣合词祈请宽宥。上曰:"目下与虏止隔一墙,宗庙社稷,都靠这堵墙。若这墙一倒,宗庙社稷都没靠了,岂不可重处!"时观吉、长应以年老,长世以羸弱,俱毙杖下。玉音杖毕下狱,与凤翔俱拟赎徒。

上既下袁崇焕于狱,拔满桂为总理,宣府总兵侯世禄、昌平总兵黑云龙等皆属焉。又起旧帅王威、尤岱、杨御蕃、孙祖寿,出罪帅马世龙于狱,俱以原官立功。桂以十六日誓师而南,十八日遇虏兵于良乡,时骑皆做官兵服饰,桂以为援,兵不设备,虏骑乘不意掩之,全军歼焉,桂与尤岱、孙祖寿皆死之,虏骑亦饱掠得意。二十三日,旄头尽望东而行,都城始解严。先是,桂乞饷一万金,偏馈诸台省,每人五十金,然后出师。

申甫漫为大言,其所募兵,皆乞丐子及优人、三尺童子,知其必败。亦以 十六日誓师,至卢沟桥,猝与虏兵遇,所造车既不可用,试术复不验,所统七 千人,跪而受刃,犹幸而不为郭京之续也。金声以在城中得免。

刘之纶募兵近万人,尾虎兵而东。适虏兵有零骑,从后骤至,之纶急营于 了髻山上,虏兵立营山下,绝其水道。次日,众溃不能师,之纶遂遇害。

刘爱塔者,辽人也,莅孙阁部标下,改名兴祚。自虏兵入犯,从无敢与斗者。刘率劲卒千二百人,夜捣其营,杀虏兵千八百人,夺回器械牛畜无算。天明,解赴阁部军前,令铁骑追及于半途,刘誓死斗,复杀数百人,而后援不继,力竭以死,千二百骑歼焉。孙阁部疏请立庙赐谥,廷议不一,遂不果。

二十二日,上召侍郎周延儒、罗唯义、李成名,河道总督李若星,御史饶京、喻思恂、赵延庆,又召吴阿衡于狱中。上面询方略,延儒但言愿捐躯报国,援兵事实非所长。若星条奏颇迂缓,阿衡议论颇有气概。二十六日,特旨:梁廷栋升兵部尚书,提督援兵。吴阿衡着复原官,军前监纪。巡关御史方大任,升顺天巡抚。大任老而且病,然巡关时,章奏皆有条理,人亦冀其成功。

袁崇焕既逮,御史高捷疏参钱龙锡,即指疏中与辅臣相商之话以为同谋。 先是,文肃劝钱辩疏当痛言一番明主可为忠臣,而钱不能从也。引罪疏甫奉旨 ,不复再辞,随即入阁。二十三日,高捷再疏,语更加厉。得旨: "着致仕去 。"至是,而始悔不用前言,则已晚矣。

二十六日之夜,刑部狱尽逸,几为大祸,幸虏兵退尽,外无接引耳目。次日,城门不启。为擒囚也。逮刑部尚书乔允升、左侍郎胡世赏下锦衣卫狱。先是,边警猝至,士夫有潜遣家眷南归者。右侍郎朱世守,以借轿与御史刘廷佐家眷出城,刘止罚俸,而朱降二级调用,得免此祸。

上初政,尽撤内奄。虏兵阑入,乃命太监李凤翔提督京营。时总督襄城伯李守,协理侍郎李邦华。邦华素持正不为下,又以严汰老弱,执法不少徇。至是守煽惑军心,几成鼓噪。邦华引罪回籍,以闵梦得代之。或询两人优劣,梦得曰:"凤翔中涓耳,尚可耐;惟守钅奇则真凶恶无比。"守于逆贤建祠时,与灵璧侯汤国祚各疏捐赀附祠共祝者也。

山西巡抚耿如杞率兵五千入援,皆劲卒也。至日,兵部调守通州。次日 ,调守昌平。又次日,调守良乡。功令:初到之日,不准开粮。次日,列营汛 地,乃准开粮。西兵连调三日,皆不得粮,既饥且愤,遂路劫掠。虏兵既退 ,如杞以不职军士逮问。如杞既逮,五千人哄然奔散,溃归山西,而晋中流贼 ,从此起矣。

甘肃巡抚梅之焕统兵入援,兵以粮不时给,脱巾鼓噪,之焕查首数人正法。有千余人溃归陕西,后之焕亦以军令不严,革职为民。

时虏兵所至,望风奔溃,惟三河三攻其城不克,宝坻亦受攻坚守得全。三河知县樊士英,陕西举人,宝坻知县史应聘,河南人,乙丑进士,昌黎知县左佩弦,亦以却敌功,超升山海兵备佥事,后以冒破军饷遣戍。

时红夷贡炮至涿州,虏骑充斥,不能前进。虏骑甫退,冯铨躬率家丁,护送入都,冀以回圣心为翻案计,中外皆为之地矣。上传旨: "冯铨准复冠带,不必陛见!"铨怏怏而去,举朝叹颂圣明真不可及云。

三年庚午正月,兵部尚书申用懋罢。本兵与司礼文移往来,向有定式。神庙末年,诸事丛脞,旧式遂废。后来者亦不讲究,文移违式,司礼拒不收,则以厚贿侑。申公莅任,重复旧式,厚贿禁不用,大珰皆不悦。又时上锐意功业,申公老成持重,不能抑副圣意。梁延栋狷巧人也,甚为上所倚任。初五日,内旨: "申用懋着解任回籍,梁廷栋着回部管事。"

大学士韩爌罢。爌忠厚拘谨,不能当圣意。左庶子丁进,以升转衍期,遂 出弹章,工部主事李逢申、中书原抱奇继之。爌三疏请告,得旨允放,其礼颇 厚。进与逢申,皆爌己未所取士也。进后奉旨,以阴阳闪烁降调,逢申随以监 督火药失事,下狱遣戍。

吏部从无以五品调者,二年八月,以南司官陆康节给假回乡,共推毂无锡华允诚。华亭相公独推毂同邑王陛,王舆望未孚,而华一寒彻骨,退逊不前,以此久无定局。宜兴入政府,借江北司官解学夔降谪事,遂票旨: "着破格推堪用的来看!"乃超调户部郎中吴鸣虞,以文选郎中管员外事,真破格矣。吴年耄矣,无所短长,逾年,请告归。

虏骑既退,廷议昌平陵寝所在,通州国储所寄,应各设镇臣重守。于是推河南巡抚范景文、太仆少卿侯恂,俱以兵部右侍郎往;恂督治昌平,景文督治通州。又遣兵部主事王建侯、章应望,各赞画军务。

二月初十日,册立太子,上以戒严免升殿,百官听宣敕于午门,行二十拜礼。赐三品以上及日讲官各花朵红一疋,三品以下皆半红花枝用角,日讲官红全匹花枝用银,仪制署司事员外贺世寿叙劳,升光禄寺少卿,尚书李腾芳加太子少保。

方大任既放,复有《身虽去国心不忘君》一疏,先臣特上疏纠之,略曰:

"臣初见大任疏计必当,以蓟门要害,将士情形,与夫战守防御,用兵治饷之策,沥将死之善言,酬破格之隆遇,洒洒洋洋,祗剿袭明党之唾余,复理东林之尘案。即今皇上起用东林诸臣,其无才而不称任使者则有之,其怀奸而悠为欺罔、盗用朝权者未之有也。近者诸臣之得罪,或以封疆,或以职守,皇上未尝有一毫成心,一毫偏德,乃曰时时因事扫除。夫离照当空,八柄在手,当去则去之,当罪则罪之,何必借事为扫除之计哉?此奸回术数,奈何以诬

圣主也? 王言纶纟孛,炳若曰星。惟真惟澹,晓然与天下昭揭之,亦何不可? 而必欲但与密勿余衡,三五大臣私相告诚,成一家之私言,此又暧昧行径,不当入告明明之后矣。况'真澹'二字,大任亦仅言之已耳。七品小官,骤膺开府,煌煌节钺,不用以经武,而用以画锦,澹乎,不澹乎? 佯死卸担,何其惫也! 发愤挥毫,抑何壮也! 反复如此,真乎,不真乎? 其所献媚于三五大臣,恐三五大臣之公忠者,亦未肯任受也。大任试衾影自盟,斯亦不澹不真之极思矣。"

疏入,留中。

三月,上命出刑部尚书乔允升、左侍郎胡世赏于狱,寓所听勘。先臣以去年四月入朝班,秋讲即题弃日讲官,同事者侍郎李孙宸、少詹事何吾驺、庶子丁进、姚希孟,而罗喻义以侍郎,先臣以谕德,则新题者。往例:春讲以二月,上御讲筵。是岁以边事孔殷,至三月初十日始开讲。先臣进讲《定公问君使臣》章,反覆规讽,颇极剀切。讲毕,上传讲官暂留,久之,殿门皆闭,诸讲官退至东阁,则圣谕已宣付阁中,释允升、世赏于狱。乃知谕留讲官,俾知即见之行事也。阁臣俱供手诵启沃之功,先臣不敢当也。以后进讲,大珰窥圣意所注,竞前致殷勤焉。先臣但一揖而已,不交片言。

一日,上御讲筵,足加于台楞上,意有惰容。先臣适进讲《尚书》,讲至 "为人上者,奈何不敬。"因以目视御膝,上即以袍袖隐之,徐徐放下。

经筵开讲,词林诸臣无不毕至。讲官二人,一讲《论语》,一讲《尚书》。上与讲官,各自一桌,资浅者弃讲书等官。春讲秋讲,止举行一二次,天厨颇费,弗克给也。日讲则止用讲官六人,一讲《论语》,一讲《中庸》,一讲《尚书》,一讲《通鉴》,余二人轮替。上与讲官共一桌,真不啻天颜咫尺矣。讲之日,上出御文华殿,阁臣率讲官行五拜三叩头礼毕,内侍举卓安放讫上宣"先生们来。"讲官始入。讲毕,上复宣"先生们吃酒饭。"乃谢恩而退。若遇斋祭之期,则云"茶饭。"春秋开讲后日日进讲,除上传免外,毋或废者。传免,皆于隔日薄暮传旨云:"明日暂停讲读一日。"虽或连辍十日半月,皆日日传免,但云"暂停一日"也。遇立春、端阳、中秋、重阳、冬至、除夕,日讲宫每人各内赐酒馔一盒,大小五器,汤饼二器,酒二瓶,圣寿、元旦,各内赐银三十两,进讲之夕,光禄寺每人折供给银一两三钱,传免则否。

吴江吕纯如,护送惠王之国,其复命疏,于护送太监太兴、赵秉彝皆极揄扬褒美,有云:"其爱地方也,既一草一木之恐伤;而其自爱也,又一薪一水之若浼。仁声遐布,清节可师。"至归美逆贤,一则曰"厂臣一选良材,"再则曰"厂臣之率属严"云云。此系天启七年九月邸报抄传四海共睹。而鼎湖之泣,纯如适以侍郎署中枢事,密弄神通,私行改换,乘虏骑甫退之后,拟借边

才以翻逆案,王永光等为之奥主。纯如遂首先上疏讼冤:"护送惠藩复命疏 ,未尝归美厂臣,不当列于逆案之内。"且引圣谕"须有凭据,不许借题"之 旨。又谓"红本在御前,别本在通政司,抄案在礼部,如有'厂臣'二字,便 甘附珰"云云。通政使章光岳即为封进。时纯如气焰甚张,言路俱喑,先臣特 出《讲筵已辍疏》纠之,略曰:"帝王之学,与经生学士不同,必以经术经世 , 乃为实用。窃见虏骑内犯, 圣心焦劳, 综数事功, 须挈纲领。刑法虽峻, 猜 疑渐启,于事未有济也。故于《君使臣以礼》章,劝皇上培养士气,推心感人 ,而辨贤奸,酌用舍尤焉。见命将出师,莫有定算,功罪未审,赏罚未明。今 虏盘距遵、永十有余旬,瞬息长夏,又将秋高,彼时时可来,我着着无备,棼 如繁丝,绝少成绪。故于《管仲器小》章,引管子言'兵主不足畏,则战难胜 也。德必当其位,功必当其禄,信小人者失亡也。'见群小合谋,必欲借边才 以翻逆案。故于《子语鲁太师乐》章,愿皇上剖晰是非,辨别邪正。而曰一音 杂,众音皆乱;一小人进,而众君子皆废。今有平生无耻,惨杀名贤之吕纯如 ,且藉奥援而必辨雪矣。消长削复之间,甚可畏也。又见吏部尚书王永光,身 为六卿之长, 犹蒙皇上眷注, 而假窃威福, 擅行私臆, 故于《甘誓》章, 言 '战胜攻取,非独左右之共命,尤在六卿之得人,而曰用舍不淆于仓卒,则国 是定而王灵畅,威福不假于信任,则神气振而敌忾惕。'大抵皆为用人之人发 也。又见永光机深计巧,投无不中,故以年例大典,而变乱祖制,考选公典 ,而摈斥清才,举朝震畏,莫敢讼言。故于《五子之歌》章,言'识精明则环 而伺者无所售其欺,心纯一则巧字中者无所投其隙。'臣故知皇上聪明天纵 ,必能洞烛其情,犹为此语者,则忧治危明之极思耳。总之,今日大小臣工 , 当视国如家, 除凶雪耻, 不当分门别户, 引类呼朋。此臣一念孤忠, 九死不 回者也。"

奉旨:"文某讲幄敷陈,寓规时事,知道了!所指吕纯如惨杀名贤,藉援求雪,及年例变制,考选摈才等语,还着据实奏明!"先臣再疏,略曰:

"臣所谓吕纯如惨杀名贤,盖指故吏部员外郎周顺昌也。当纯如为福建守道日,以谄媚税监高宷为事。比高宷窘执闽抚,激成民变,纯如与宷,携手同步,扬扬市廛,万口唾骂。周顺昌为福建州推官,剪除税棍,抚定人心,纯如忌之,屡肆下石。后纯如投身逆珰,躐取节钺,顺昌讼言攻之,语多过激。纯如遂挑怒巡抚毛一鹭,复旨时定入京师,与诸用事者构成李实之疏,而顺昌被逮,且榜死狱中矣。同时惨死诸臣,所号为彻骨之清,及公忠亮直,人人心服者,以顺昌为第一。其致死之由,全出于纯如,此天下所共知。今当先上疏求雪。不但变天下之是非,且摇皇上之釜钺,则恃有吏部尚书王永光为之奥援也。夫逆案之定,其主持全禀宸断。而群小营营窥阚,以为璇转圣意,易于反掌

。故首借边才之说进,而纯如之疏即继之,呼吸通灵,投掇如响。不然,通政司固喉舌之寄也,非大力者主之,此何等事,何等人,而辄其匦以进哉?至于台省为公论所自出,凡会推年例等大关系事,则吏部不自主,而必会同吏科河南道。若近日所推年例,吏科都给陈良训,谁为开送,谁为商计哉?不过以其稍持公道,每多参驳,乃借外转以除碍手耳。至考选新资,贤才辈出,永光度无所施其笼络,乃独斥一才名素著、物望咸归之陈士奇以示有权,而十年冷署之潘有功,亦以猜疑见弃。迨人情汹汹,众议沸腾,则始为两请而终摈之。为大臣而心术如此,斯亦不忠之尤者矣。"

王永光疏辩:

"前者阁部定案进呈时,臣被言注籍,吕纯如入案,臣之及知,何自援而出之?至陈良训滥厕首垣,与参廷议,人言啧啧,夫岂无因!至考选过堂,十六人内,选授科道十四人,部属二人。而此二人者,前途正远,因材储用,期待殊不薄也。"

时永光已密结大珰王永祚为之道地,谓:"士奇出姚庶子之门,姚与先臣谓阳谊,考选时力为把持,既考后,复耸成此疏。"于是圣意拂然,永光得旨甚温。而先臣奏疏,奉旨:"讲官怀忠启沃,循职自可敷陈,文某不得任情牵底!"若夫逆案之坚持不动,虽由圣断,而此疏亦不无小补矣。

虏兵虽东,复破永平、滦州,盘踞不退。永平乡官白养粹,首先迎降。孙 阁部督师东行,奉抚谕祖大寿之旨,令马世龙冲重围而东,驰三日夜,追至芦 峰口,说以利害,激以忠义,众皆耸听。大寿始率辽兵三万,士龙亦招集赵率 教部下,及旧时部曲共万六千人,合队而西。世龙独薄敌垒而前,死伤者千余 人,始抵都城,复蹑虏兵至蓟门。时洪桥、大安等处,虏兵掳汉人,运所掠辎 重。世龙侦知之,密以大炮先伏于路旁,俟其过,发炮,从皆掠走,世龙追击 之, 杀获百余人, 遂以大捷闻。祖大寿统兵三万, 立木栅于山海西关, 不敢前 进入援。总兵尤世禄、吴自勉、杨麒、宋伟、王承恩等,各率所部,联营于滦 州之西,相顾莫敢先发。世龙既连洪桥、大安之捷,乃贻书大寿曰:"辽兵每 谓西南兵将怯弱,不若辽兵强健。今怯弱者皆奋不顾身,建两地之捷;而强健 者何在? 况各镇勒兵已鳞集, 若合谋兵力退虏, 共复故城, 辽之强健将士, 何 颜复支朝廷厚饷乎?"大寿见书,始移营而西。孙阁部乃严檄诸将,期共攻泺 水, 申明军令。有旧永平兵备张春者, 素得民心, 曾练有乡勇二万, 皆精锐可 当一面。逆珰时,张春被劾罢归,乡勇皆散。及是,上复起张春为永平兵备 , 永民闻之, 皆不远千里来迎, 向所练乡勇皆来会, 军声大振。四川副使刘可 训甫破水西酋,率胜兵入援。本兵梁廷栋又使其所善司务丘嘉禾监纪军事。奉 旨趣师期者再。高阳遂以五月四日誓师,六日诣抚宁,八日先趋泺,与大寿分 地夹攻。世龙麾兵,人斫一柳,顷刻平其濠。世龙与张春、刘可训等,皆披坚执锐,作诸军前茅,身冒矢石,誓不返顾,急以大炮仰击,虏兵稍却,师从间以登。十三日克滦州,虏兵冒雨突出,而虏骑自永平趋救者,知滦已破,遂开迁安兵于永平,屠其众,从冷口出,所存者十之四五而已。师既复永平,而谢尚政等,亦以十六日克遵化,生擒犭革犭革木等二十二人。及我叛人马思恭、贾维年龠、吕及第等十一人,献俘阙下。先是,滦之叛将,遣一老道士指嘉禾,请献城。高阳授计大寿:"姑应之,而实其后劲以备不虞。及我师抵滦,莫有应者,最后,中北伏兵几尽,人咸服高阳先见云。大兵之入城也,叛人白养粹已死,其母尚在,张春先至,尽封所有而出,绝无染指。世龙则尽取其所有,大寿至,空无所得,遂将白母用极刑,乃尽出窖藏,盖几百万云。永平粮储陈此心、乡绅郭巩,俱以屈节被逮;后刑部拟此心等以谋反律,大理寺卿金世俊力争之,乃拟监候处决。

当滦、永之未复也,高阳与东江牵制之,议令茅元仪统龙武三协兵以往。中协兵哗,斥元仪,而以周文郁为中协副总兵兼摄左右两协。甫行,而刘兴治之变作。兴治者,兴祚之弟,兴祚者,即刘爱炤也。兴祚没于阵,兴治居皮岛。东江副总兵陈继盛谍报兴祚未死,其弟兴贤自北营以书招兴治。兴治畜有夷丁,旦夕当有变,兴治大恨,伪为兄设醮,诱杀继盛等二十余人,扬帆至小平岛。适滦、永克复之信至,乃复返皮岛。高阳遣文郁以兴祚旧恩招之。文郁入兴治营,始以温言喻之,继以危言怵之,兴治心动。时部将逃匿双岛者,与东师相哄而斗,兴治怒,令岛众绕舟号诉。文郁呼其将语之曰:"陈继盛流言,岛众谋反,今若杀我,是实其言也。岛众不足惜,刘氏从此无噍类矣。"兴治大悔悟,明日,饮饯文郁,搏颡大哭而别。九月,兴治败虏骑于青山凤凰城,高阳奏捷,并上文郁首功。当国者恶其无所馈,绌其功不叙。高阳又请移兴治于旅顺,责以恢复金、复,部议逡巡不果。逾年,兴治为岛众所杀。

蓟镇总兵朱国栋自缢,以旧总兵张世显署镇事,与总督刘策率兵堵御,俱以逗遛不前被逮。至是,俱伏法。先是,河南巡抚缺,升太仆卿张泼往。泼既领敕矣,复上乞休一疏。阁中票旨,遽准其请。山左诸公大哗,以为摧折东人太甚也。适蓟辽总督喻安性罢归,共推毂刘策,不半年,遂罹此祸。

深、永既复,廷议添设山永巡抚,适方大任以病乞休,王廷试、梅之焕相继罢斥,乃升四川副使刘可训巡抚顺天,司务丘禾嘉巡抚山永,前屯兵备孙元化巡抚登莱,汉中兵备刘应遇巡抚甘肃,皆孝廉也。张春加太仆寺少卿,候巡抚缺推用。

按: 丘禾嘉以九品务郎躐跻节年戊,尤属异数,非中枢梁廷栋之力不至此。似当以张春抚山永,禾嘉升永平道为妥。

先臣既以疏言不当圣意,且永光辈侧目甚切,欲乞南京掌院以归。时大名 为李逢申所劾在告,宜兴许为题转矣。大名开籍出,以为此例转不便,乃题封 差以行。是秋赍节册,封进贤王及益府世子妃。

乌程之参虞山也,宜兴实佐之,宜兴既援立,所以为乌程地者甚力矣。吴宗达,宜兴姻也。于是特揭二人奏请,上亦以乌程孤忠可任,六月十一日特旨:"温体仁、吴宗达,俱着以原官兼东阁大学士,同首辅成基命,同入阁办事。"

袁崇焕在诏狱,尚未定罪。至是,狱具。八月十七日上下袁崇焕着即会官处决,钱龙锡着革职。法司议罪,随即逮问。其甫逮也,人皆以高忠献期之,迨其至,则辱国甚矣。且牵扯同事两辅,呶呶不置,又有导之倾陷薄蒲州,以快其之忿者。然圣意已定,盖其奏对语入于天聪,不可援人以自解也。然不如此,株连起大狱,则又共仰圣主离明之照。已,陆澄源疏参御史毛羽健为崇焕党,亦革职下狱。

崇焕既决,群小合计,欲借此以起大狱,翻逆案。御史田唯嘉疏荐杨维垣、贾继春,通政使章光岳疏荐吕纯如、霍维华、徐杨光、傅魁、虞廷陛、叶天陛六人。有旨:"逆案奉旨方新,居然荐用,成何政体?"而后群小阻丧,始不敢妄冀云。

时上以封疆多故,群臣蒙比为奸,削谪逮系,毫不少贷。河南府推官汤开远上疏,略曰:

"皇上急于求治,诸臣救过不给。临御以来,明罚敕法,自小臣以至大臣,与众推举,或自简拔,无论为故为误,俱褫夺配戍不少贷。甚者下狱考讯,几于乱国,用重典矣,皇上或以荐举不当,疑其党徇,四岳不荐鲧乎,绩用弗成,未尝并四岳诛之也。皇上又以执奏不移,疑其藐抗,汉文不从廷尉之请乎,亦以张释之曰: '法如是止耳。'不闻责其逆命也。皇上以策励望诸臣,于是多戴罪。夫不开以立功之路,而仅戴罪,戴罪无已时矣。皇上以详慎望诸臣,于是有认罪,夫不晰其认罪之心,而概行免究,认罪亦成故套矣。侵粮欺饷之墨吏,逮之宜也,恐夷齐之侣,不皆韩范,宜稍宽之,不以清吏诎能臣。今诸臣怵于参罚之严,一切加派带徵余徵,行无民矣。民穷则易与为乱,皇上宽一分在民子,即宽一分在民生。而尤望皇上宫府之际,推诸臣以心,进退之间,与诸臣以礼。锦衣禁狱,非系寇贼奸冗不可入。如是而大小臣工,不力报为安攘者,未之有也。"

时左副都御史易应昌、御史李长春,皆以言事下狱。长春几至西市,阁臣 力救得免。故开远疏及之。

先文肃虽奉使出都,而群奸修怨未已。吕纯如辩疏甫至,而锦衣张道■随

疏参劾,其氛甚恶。奉有"不必苛求"之旨,圣主明照,固自万里。后先臣亦有疏辨,略曰:"微臣立身,粗有本末。仕版初登,即触权奸之烈焰;谪居五载,复撄罗织之凶锋。朝端公论难诬,海内清评俱在。夫昏夜夤缘,望尘罗拜,正狐媚蝇营之故态。盖纯如尝谓生祠之建,不妨委蛇,媚珰恶名所不必讳。种种无将之言,昭著耳目,有必不能抵赖者。臣尚不欲尽揭之,奈何反以相诬?臣亦不屑与较。至于虏骑临城之日,正臣阖门自誓之时。臣子应试南都,去在城守解严之后。迨乎奉时辞都,顾骡觅辆,眷属累累,该门可查。若曰君父恩轻,妻孥念重,此又小人肝胆中事,臣死不为也。夫臣所深恨者,逆珰之私客,而必坐之曰:'背公'。臣所深怜者,惨死之忠魂,而必坐之曰'死党'。推其意,仍欲穷钩党之流殃,刈贞臣如草菅,而后快于心。恐光天霁朗,宿雾澄清,似不必续晓残之梦,嘘众溺之灰矣。至若张道■未谙文义,谬析臣疏,代人报复。彼固欲陷臣以危法,而皇上已洞悉其隐情。夫犭制噬固能伤人,而豺声亦当自毙。臣尚不屑与纯如辨,何屑与道辨?第臣虽不才,备员讲幄。纯如何人,哆口雌黄?微臣何足惜,其轻朝廷而羞当世之士,亦已甚矣。岂可复腼颜清班,以负皇上之礼遇哉?"

奉旨: "内奏事情,公论自明,文某依限前来供职,不必陈情!"

去冬,甘肃援兵鼓噪,溃兵千余,逃回陕西。二月,王子顺、苗美勾连逃 兵,掠米脂、清涧、绥德,遂南围韩城。总督杨鹤、巡持刘广生提兵扑剿,斩 首千余级。贼北走,复犯清涧,官兵追逐之,降三百余人。苗美叔苗登雾啸聚 于安定,总兵杜文焕击败之。四月,王子顺、苗美自神木渡河,陷蒲县。适山 西逃兵亦至,遂与合,其势颇炽。子顺自号"横天一字王,"苗美自号"混天 王。"王承允亦攻陷府谷,渡河入山西,犯吉州、太平等处。五月,王子顺等 复归陕西,掠同官,破金年巢关,杀参将王廉。六月,王嘉允亦还陕西,陷黄 甫州、清水二营,遂据府谷。延绥巡抚洪承畴、总兵杜文焕击败之。延安知府 张辇、参将艾穆蹙贼于延川, 贼求抚, 王子顺、张述圣、姚三儿皆降, 王嘉允 等分掠延庆等处, 多陷。总兵杨鹤主抚, 匿不以闻。贼首黄虎、一丈青、小红 娘、混江龙、掠地虎等俱谍免死,安插河西地方。民罹毒益甚,有司莫敢告。 八月,王嘉允勾本虏入犯,洪承畴、杜文焕从孤山进击破之。十月,嘉允复陷 清水营,杀游击李显宗。宁夏总兵贺虎臣击贼于盘谷,斩首六百余级,又败之 宁州。十一月,山西总兵王国梁,击贼于河曲,发炮,炮炸,众乱,贼乘之 ,大溃,遂陷河曲。十二月,神一元作乱,破宁塞,杀参将陈三槐,遂围靖边 。时又有高迎祥,聚众称乱,自号"闯王";米脂李自成入其党,号曰"闯将

四年辛未正月,外察,姚庶子门人永城知县贺鼎、武进知县岳凌霄皆被察。凌霄于丁卯乡闱中抗言以折张士范者,本邑相公恶其强项,遂以酷处。鼎则以师门之故,欲断其考选之路也。虽云肆毒者王永光,而助纣为虐者,则考功郎中程国祥实尸之。

二月,会试天下士,命大学士周延儒、何如宠为考试官,取中吴伟业等三百五十人。

吏部尚书王永光罢。给事中葛应斗疏纠御史袁宏勋、锦衣张道濬通贿鬻权等事,指宏勋得参将胡宗明银三千两,以属兵部尚书梁廷栋;又得主事赵建极银一千七百两,以嘱吏部尚书王永光,而廷栋随上疏佐之,并列道濬诸奸状。有旨: "俱革职提问。"先是,旧枢王洽之逮也,虽事嘱封疆,而召对之日,宜兴实开其端。旧督刘策之又以失事服法,东人摧折已甚,东省诸公多不平。乌程笼络人为事,人多啖其狐涎,于是江西、山东诸公,俱以乌程胜宜兴也,一意以去宜兴为主。时宏勋、道濬日夜入长垣之幕,夤为奸利。道濬先既参御史刘芳革职,继又助吕纯如参先文肃,毒焰甚烈,而从中保护长垣。因并护袁、张者,宜兴也。时长垣之伎俩穷,而上之眷注已移,鄢陵拟除去之,而以己继其席,且却中枢之重担。乌程亦拟藉此倾宜兴,而自居首揍,故乘宜兴入闱日发之,乌程即票严旨以进。给事中吴执御,浙人也,而合于东,疏论王永光诲贪崇墨,不可以表率群僚。永光再疏,请告回籍。

三月, 廷试策士, 赐陈于泰、吴伟业、夏日瑚等进士及第出身有差。

大学士钱象坤、兵部尚书梁廷栋罢。宜兴之出闱也,不能急收后着,与此辈香火之情甚笃。行人司副水佳允,悍然操戈,直攻鄢陵,显为袁、张报复。水疏入,分会稽票拟。会稽,鄢陵房师也。宜兴直从会稽手拉去,颇左袒佳允。佳允再疏,则发鄢陵私人沈敏与蓟抚刘可训往来诸奸状,据有手书盈握,且有暮夜之迹。鄢陵几不免祸。幸中涓左右之,乃得旨闲住,会稽与可训俱株连而去,可训奉旨削去巡抚职衔,以四川副使致仕。

四月,京师大旱,皇上苎袍步祷,百官俱斋宿本衙门。而最冷淡之詹事府,经年不一到者,掌詹协理等官,可二十余员,皆群居其中,亦一奇也。

五月,上为雩祷不应,遂释张凤祥、易应昌、李长春于狱。始阁臣以云间 旧辅为请,圣意断断不可,继而俯从廷臣之请,慨然出之圜扉,真可谓尧仁如 天矣。

时群小侧目,姚公希孟为甚。去秋,姚与姚明恭主试北闱,搜索无所得 ,乃借武生冒籍一事,给事中王猷上疏参之。猷,宏勋门人也。理应严查,冒 籍与否,与衡文者无预,宜兴乃票旨: "覆试金允治以文理粗疏,罚停会试三 科。高岱以不能完篇褫革,正副主考俱下部议处。" 廷推阁臣,宜兴以护持长垣故,至于助水佳允而逐会稽、鄢陵,人心愈愤。会稽、鄢陵虽去,俱不能忘情于宜兴,而其力焰犹足以使人。适会试、廷试两元,一以文,一以行,俱大不协于众口,廷元尤为公论所不许。给事中吴执御一疏再疏,竟借两元为题。然在伟业,不过云迷五色,在于泰则实受其万金之馈,而于泰亦疏参执御,揭其有无不可知之事,欲倾人以自救,而适以动天下之兵,则宜兴之至巧而实自拙也。嗣继执御以攻宜兴者,不下十余疏,上概行留中,圣心已不能无动。宜兴因其留中也,付之不闻不见,入直票拟如故,则为从来阁臣之变局。既而揭请广阁员,俞旨随下,且准廷臣会推。似悟特简之为非者,圣意盖可知矣。

自虏骑入犯后,上复命内奄提督京营。自是衔宪四出:命太监王坤往宣府,刘文宗往大同,刘允中往山西,各监视兵饷。又命太监张国元往蓟镇东协,王之中心协,邵希韶西协,各监军。又命太监李茂奇监视陕西茶马。又命太监张彝宪总理户、工二部钱粮。

从来文场有会试,廷试有传胪,武则否。十月,复当武会试,有董某者,以勇力闻,达入帝听。时主武试者庶子杨世芳、中允刘必达。某以策不中程被格,上谓诸臣故拂圣意也。两主考及两监试俱下狱。阁臣揭救,反奉严旨,重令会试,另点谕德方逢年、中允倪元璐主试事,董某中式。复创廷试胪传礼,一如文场,董遂赐武状元及第,选昌平游击。次年边警阵亡。

是夜, 虏骑围锦州, 恣掠三日, 隳大凌、双堡而去。高阳于是倡城右屯、 大陵,以图进取之议,本兵梁廷栋主之。上从部议,命祖大寿率马步兵四千领 其事,以班军一万四千供版筑,护以石主兵一万,改丘禾嘉巡抚宁锦,亲往相 度。高阳欲先城大凌, 禾嘉不从。廷栋去, 中朝尽反其所建置, 谓屯、陵荒远 ,不当筑,令撤班军赴蓟。时尚存粮万石,高阳欲运粮散军,委空城而去,禾 嘉又不从。八月虏骑进围凌城,祖大寿与副总兵何可纲固守,丘禾嘉率监军张 春,总兵宋伟、吴襄来援。禾嘉怛悸,屡易师期。宋传主进,吴襄不可,两不 相下。高阳至锦,克期进兵。襄曰:"日者言大寿命宫难星将出,少待之 !"越八日始进,遇虏兵于长山。襄营主近水,伟主近草。议未定,而虏兵前 驱至。传营栅其固, 虏兵连攻不能入, 移攻襄营, 襄众乱不能军, 遂溃。伟力 战至晡至溃,张春陷。而锦人高应元、陈二、韩五从北营拔归,愿自效其奇。 知四王子营于白云山,乞以通夷语者百人,裹火药入营,乘不意纵火,勾王子 帐而刺之; 即不成, 八营皆扰乱, 可走也。大寿之弟大弼, 敢死战, 喜结客 ,战于锦州。四王子免胄掠阵,大弼突出搏之,刃几马腹,虏号曰"祖二风子 。"四王子啮指称之。三人在北营,知大弼知,乐从之,高阳以三人属大弼 ,结为兄弟。夜三鼓,三人为导,大弼率死士百二十人,斫四王子营,火药发 - 31 -

,烟焰蔽帐前,四王子跳而免,八营皆大乱相蹂杀。既辨色,我兵伪为胡语 ,混虏兵而出。先一日,凌城食尽,虏兵招降甚急,何可纲为文自祭而死,大 寿降于清。四王子劳来甚至,赉酒食鞍马,约下锦州。大寿养子逸出,清兵乃 复毁大凌城引去。而中朝喧言长山之败,丧失师徒,轻重无算,皆以开衅咎高 阳,坐以矫旨复城。诏冠带闲住,削宁锦叙功世荫。张春既陷,其妻翟氏六日 不食,自缢死。而春通书求款,庙堂计无复之,乃授张春副都御史,黑云龙带 都督,奉以羁縻之,后禾嘉与大寿相讦,大寿抗章,抉摘其贪秽,高阳力止之 ,而闻之中朝,迁禾嘉南京太仆卿以去。

日讲官罗喻义进讲《尚书》,先期草讲章送阁,内有伤执政语,乌程裁其半,喻义执不可,直至中堂,动色而争。体仁遂出疏参之,言:"旧例惟经筵多进规语,日讲则正讲多,进规少,今喻义以日讲而用经筵之例,驳改不听。自愧不能表率后进。"有旨:"喻义闲住!"此真词林怪事,究竟所指之例,不知出何典故也。

少詹事姚公希孟,在讲筵为上所识,每讲毕归班,上未尝不目送也。众咸谓大拜可期。时适有枚卜之旨,宜兴所以阻拦后辈者,不遗余力。当会推时,众共推毂姚,冢宰闵洪学语人曰:"首揆不欲。"众复面恳宜兴,宜兴急相引重,众再诣冢宰,冢宰坚以首揆为辞。众乃促总宪陈于廷同冢宰往见宜兴,令门役两次延见,先冢宰而后总宪,冢宰出语人曰:"首揍终不欲也。"最后,乌程显然排挤,谓:"姚科场有话讲,部覆未上,岂可预推?"少詹公乃急喻同人止弗复言。若不见几,则虞山之故辄,必复见于当日矣。御史迟大成特上《资浅望重》一疏,本为少詹公及姜曰广而发,奉有再奏之旨。少詹公为免之,乃指先文肃之家居者以对,其并及陈谕德仁锡则迟有戒心焉,借陈以免于诘责也。宜兴以是有歉于心,岁终置讲筵诸臣不叙,而单疏特题少詹公升正詹,以谢过云。

时当考选,开封推官张瑶、杞县知县宋玫,皆莱阳人也。宋玫考选得给事中,张瑶得同知。瑶大不平,因发玫贿营情状,列疏上闻。吏科都给事中宋鸣梧特出悍吏劣考,犹轻疏忝瑶,乞加重处。有旨:"张瑶降四级调用。"后瑶补河州判官,流贼破河州,瑶殉难,恤赠光禄寺丞,荫一子入监。

是年正月,流贼神一元陷保安,副将张应昌击败之,一元死,弟神一魁领其众。二月,总兵贺虎臣、杜文焕合军围保安,神一魁突围出,都指挥王英不能御,诸道兵皆溃,一魁遂攻庆阳,破东关,游击伍维藩击斩五百余人。时总督杨鹤驻邠州,不即援,而宜君贼赵和尚等复南犯泾阳、三原、韩城、澄城等处。三月,张应昌等援庆阳,贼围解时,议招抚神一魁等。癸未,贼首孙继业、茹成名六十余人来降,总督杨鹤受之,设御座于固原城楼上,贼叩首呼万岁

,因宣圣谕令设誓。各解散归原籍,自是群贼视总督如儿戏矣。四月,神一魁 降于杨鹤,鹤侈其事,上言请数万金赈济,其胁从饥民,各给牒回籍。而余贼 刘五可等据铁角城,混天飞、独行狼、混江龙等据芦保山岭,分犯平、固、耀 、泾等处。混天猴分犯宁环,王虎围庄浪,不沾泥攻米脂。总兵王承恩、侯拱 极,率兵至葭州,洪承畴、张应昌亦至,贼分两营以待,官兵愤击,大破之 ,不沾泥逃奔关山岭,副将马科等追之,尽歼其众。不沾泥手杀贼首双翅虎 ,缚献紫金龙以自赎。五月,王承恩击宜川贼,败之,贼首王虎、金翅鹏降。 金翅鹏,即王子顺侄王成功也。余贼走宜君。参将曹变蛟逐宁塞贼于唐毛山 , 四战皆捷, 先后斩一千四百余级, 贼大溃。延安贼赵四儿掠韩城、邵阳, 参 将张全昌击斩三百余级,贼走邠州,复进击,斩六百余级。是月,满天星降于 杨鹤。曹文诏攻河曲贼克之,斩贼千五百余级。六月,击王嘉允于阳城,斩之 , 其党又推王自用为首, 号曰"紫金梁"。其党皆自相名目: 除混天猴、张孟 金、不沾泥、张存孟外,张献忠号"八大王,"赵四儿号"点灯子,"张有义 号"一盏灯,"王之臣号"豹五,"罗汝才号"曹操,"高嘉计号"俭道神 ,"张大受号"满天星,"刘国能号"飞来虎,"常国安号"托天王,"贺一 龙号"革礼眼,"李万庆号"射塌天,"惠登相号"过天星,"张一川号"扫 地王,"杨旭号"一只虎,"马守应号"老回回,"张胖子号"整齐王,"伍 林号"一杆枪,"王光恩号"小秦王,"杨光甫号"一连鹰,"刘正国号"关 索,"其他"蝎子虎,"、"翻山鹞"等名类甚多。

邠州混天猴谋袭定边,张应昌邀之于真水川,败之,追斩四百余级。洪承 畴又败之甘泉山中,王承恩曹、文诏等击诸贼于太平原等处,连败之,延、庆 之间,稍息肩焉。

癸末,以神一魁等复叛,逮杨鹤下狱,以洪承畴总督全陕军务。点灯子东渡至山西,入沁水,攻窦庄。窦庄,故张公铨里居也。聚众拒守,矢石并发,贼伤甚众,乃退,复陷隰州、蒲县。总督魏云中削职听勘,以张宗衡代之,以宋统殷巡抚山西。

八月,王承恩击斩中部贼七百余级,贺虎臣击斩庆阳贼刘六,杀其余党六 百余人。

神一魁劫守将吴引器,官兵围之,其党黄友才斩一魁以降。

独头狼、满天星、一丈青、上天猴等,洗劫同、邵等处,副总兵赵大允在韩城,去贼营二十里,不敢邀击。士绅强之出,报斩五十级,验之,则皆妇女首也。给事中魏呈润劾之,有旨提问。洪承畴击点灯子,擒之,伏诛。其党黑煞神、钻天哨等皆起,黄友才亦叛。洪承畴升任,延绥巡抚缺,时御史吴莘奉旨赍银十万,赈济陕西饥民,兼行招抚。部推行甡为正,布政陈奇瑜陪,上用

奇瑜。

十一月,陕西贼谭雄陷安塞,王承恩诱雄等五人斩之,复安塞。不沽泥第陷安定,王承恩进攻安定,贼走绥德。混天猴子甘泉,劫饷银十万八千两,杀知县郭允图,河西兵备张允登阵亡。洪承畴遣王承恩进剿,而自率六百人趋州。十二月,甘泉贼陷宜君,又陷葭州,兵备郭景嵩死之。于是诸降盗皆叛,承畴日不暇给矣。

山西贼陷掠闻喜、河津等处、孙显祖讨之、与贼六战皆捷。

五年壬申正月,孔有德等据登州以叛。先是,孙元化以前屯兵备超升登抚,随带辽丁三千人,驻防登州。辽丁贪淫强悍,登人不能堪。适是冬有大凌河之警,孙令孔有德等率辽丁往援,即于原籍着伍,亦两全之术也。行至吴桥,后队尚滞新城,夺取王氏庄仆一鸡,王氏大族,势凌东省,随禀袖官兵,必欲正法。袖官兵不得已,查夺鸡者穿箭游营,众乃大哗,遂杀守庄仆。王氏申详抚按,必欲查首乱者,戮以徇众。辽丁急至吴桥,邀前队改辕而南。时统兵者,左步营参将孔有德、右步营都指挥陈有时、东江副总兵毛承禄、登州参将李允成也。辽丁三千人,皆插血立誓,若不雪此耻而北行者,众共杀之。遂拥孔有德以叛,尽灭王象乾家,王象春等皆易服前窜,抄劫新城一空,越临清、德州,取间道而东。过青州,知府汪乔年馈酒牛犒师,令无相犯,辽兵果结队而过,距登数十里,于马塘店扎营,曰:"为王氏所逼,非敢反也。"元化令旗鼓游击耿仲明传谕札营城外教场候抚。教场故有三千营房,援辽将卒家属居焉。令欲移入城,出房以舍步兵,城中坚拒不纳,有德说仲明亦反。尚有辽人在城中者,绅民必欲搜戮辽人,遂开门纳师,登城陷,时正月初三日也。

吕纯如复有疏参论多人,通政章光岳送还之。至是,复上疏,止于自辨 ,不及他人,御史吴彦芳驳之。上遂留纯如疏不发。彦芳者,愦愦人也,去秋 曾有一疏,为宜兴解嘲,公论哗然,有教之忏悔者,故出此疏,疏亦不为无功 。后复有疏荐李瑾、李邦华,而给事中吴执御亦疏荐黄克缵、刘宗周。上责其 朋比,俱下狱。说者谓执御之处,显然修廷元之怨,而彦芳则前疏之故也。

上点礼部尚书徐光启、郑以伟入阁办事。登城之变,孙元化自刎不死,孔有德等欲奉以为主,亦不可。东省之人,以其不死也,遂以朱泚目之,言路欲借以倾宜兴。宜兴与元化同举于乡,最相昵也。时调总兵王洪、杨御蕃往剿,相持不敢进。于是,转而为主抚之说。而旧岁枚卜事,一推再推,未奉俞旨,于是宜兴、乌程各欲树其同志,以为薪传之计。而宜兴所急欲引进者巴县,次则上海,乌程亦注意巴县,故宜兴素所昵爱。而上海者则宜兴因言路借登抚以攻之,颇有危机。上海与登抚,师生莫逆,此老迂憨,勇于任事,而不顾利害,日夜为主抚之说,以祈纾登抚之死,故宜兴欲借之自助,且卸前担。至

是,具揭以两人为请。上乃点用上海徐光启及上饶郑以伟,而首推竟不用。先是首推投诚乌程以求必济,乃奉旨另推者再,终于圣意未惬。林下某公,意有推必蒙点用,遂飞书长安,极相推许,书中复给论某正、某邪、某可推戴、某可联络、某可摈弃。书中全注毒宜兴而不及乌程。又邮致锦衣吴孟明,吴,首推姻家也,复落中书周大成之手,都下哄然传,而首推遂不用。其不用之故,皆以为此书既露,政府从而危之,首推之恨不可言。若上饶,盖以恬静得之,则天也。首推为姜逢元。

登州既陷,山东巡抚余大成革职逮问,以徐从治为山东巡抚,谢琏为登莱 巡抚。又令兵部主事张国臣往谕解散,一面议抚,一面进兵。孔有德等因统兵 直薄莱州城下,谢琏等复申抚议,有德等必欲邀登抚至彼营中,方肯受抚。琏 不得已,同莱州知府朱万年抚其营,俱被拘留。于是复主剿,乌程特出疏力攻 主抚者。时总兵刘国柱、王洪、邓统兵三万,由沙河西路以进;副总兵吴安邦 、徐树声统兵二万,由八角东路以进;天津参将孙应龙统水兵三千抵庙岛,断 其入海之路。既而三路皆败,树声、应龙被擒,东抚徐从治为炮所击死,于是 复令莱州推官屈宜阳入营议抚。抚亦卒不就,更调榆林、蓟昌各边兵,统以总 营杨御蕃。升金华朱大典为山东巡抚,拒堵于莱州。元化、应龙航海至天津自 投,刑部以封疆律正法。有德等祷于海城小圣庙,抗天朝与投清孰吉,卜得投 清,随得顺风出海归潮,登人随毁小圣庙。

吏部尚书闵洪学罢。长垣既去,闵洪学为吏部尚书,亦乌程人也,每事收人心以归温,有过则皆诿之宜兴,而宜兴不觉也。登抚之变,乌程显出疏攻主抚者,以阴倾宜兴,宜兴危甚。又洪学莅任,惟奉行乌程意旨,于宜兴不甚照管;左侍郎张捷,至不与进参一语。斯得操鍪弧者,不在宜兴而在乌程,一时捷足者竞走乌程,宜兴之党,皆怨闵冢甚。于是张捷与太仆少卿贺世寿投诚诸君子,谓言路若能攻闵冢而去之者,乌程之去,宜兴力任之有余。时给事中王绩灿,御史刘令誉、周堪赓先后疏参闵冢,兵部员外华允诚疏尤切,允诚疏略曰:

"当今时势有三大可惜,四大可忧。夫以皇上圣德,加之励精,何难于握 大权坐济至治。乃当事者借皇上刚严,而佐以舞文击断之术;借皇上综核,而 骋其讼逋握算之能。遂使和恒之世,兢事刑名。皇上图治之圣心,为诸臣斗治 之捷径。可惜一。师属大僚,惊魂于回奏认罪;封驳重臣,奔命于接本守科。 直至风裁徙徵事件,长吏惟问钱粮,以多士靖共之精神,为案牍钧载之能事。 可惜二。今何时乎?非大小臣工同舟遇风之时乎?庙堂不以人心为忧,政本不 以人才为重,意识互岐,议论滋繁,遂使诡剿诡抚,等于筑舍;忽用忽舍,有 似举棋。以兴邦启圣之日时,为即聋从昧之举动。可惜三。夫人主所以尊于天 下者,法也。丧师误国之王化贞,何以与杨镐异辟?洁己爱民之余大成,何至与孙元化并逮?甚而一字偶误,一言偶失,执讯随之,刑罚不中,铁钅戊倒置。一可忧也。国家所持以为元气者,公论也。今直言敢谏之士,一鸣立斥,指佞荐贤之章,非奸即党,不惟不用其言,并锢其人,又加之罪,谗奸得志,忠党屈抑。二可忧也,国家所赖以防维者,廉耻也。近者中使四出,大臣惧不谏阻,小臣又安敢抵触?与之抗衡者,仅二三人耳。其余奔走之辈,惟恐后时,谄曲趋承,犹宜获戾。皇上以为近臣可任,而不知幸窦已开;以为内任可惟我操纵,而不知其屈辱士大夫如此矣。三可忧也。国家所藉以进贤退不肖者,铨衡也;我朝罢设丞相,用人之职,吏部掌之,阁臣不得侵焉。今次辅与冢臣,同邑为朋比,惟异己之驱除,阁臣兼操吏部之权,吏部惟阿阁臣之意,造门请命。夜以为常,统均大臣,甘作承行之吏,加膝坠渊,惟其所欲,黜陟大柄,祗供报复之私。甚至庇同乡,则逆党可公然保举,而白简翻为罪案;排正类,则讲官可借题逼逐,而荐剡遂作爰书。皇上恶诸臣之欺,欺莫欺于此也;皇上怒诸臣之专,专莫专于此也;皇上疑诸臣之党,党莫党于此也。威福下移,正气消磨。四可忧也。"

疏入,与令誉等皆奉严旨,而绩灿寻以他事革职。时关外议论众款,谓张春失节不死,反加副都御史,何以报袁崇焕于地下?黑云龙输诚通款,反都督府带俸,何以谢郭巩、陈此心于狱中?故疏内复及杨、王一案,闵冢果不安其位,连疏请告以去。闵冢既去,张捷辈意足志满,宜兴复饮乌程狂药,谓死生决不相负。于是尽反前言,于同志举动,不复照管矣。张捷者与仆少公虑乌程知其谋而修郄也,转而入乌程之幕,尽以始末告之,且谓华疏出詹事姚公手。故乌程恨詹事与总宪最深。北闱冒籍事,部覆既上,乌程密揭入大内以挑圣怒。至尊初念颇佳,忽然中变,遂奉旨:"姚希孟着降二级调用。"总宪后以考核御史毕佐周事,有旨:"毕佐周着降三级调用,陈于廷着革职为民。"

詹事公之处也,宜兴实知之而不救。旨下之日,宜兴休沐不出。简讨徐、 庶吉士张溥适在坐,宜兴见旨,顿足曰:"惜我出直,朝端又去一正人矣。 "然而人之视己,如见其肺肝矣。

御史史{范土},为长垣私人,北方悍将也。时以巡视按淮阳回道考核。淮阳素称膻地。前案曹暹未及半年,赃罚已积十七万有奇,猝当例转,百计仅支二万金归,余俱留贮库。继任者为史{范土},尽掩取之。史{范土}又署巡盐事,欺匿盐课二十一万,考核时啧有烦言。总宪长子陈贞裕,屡次干谒,婪有数千金,{范土}执其手书相挟。总宪惧,乃考核称职,回道管事。

尔时为总宪者,正当胪列史{范土}奸贪诸状,奏请提问追赃,如高宗宪于崔呈秀故事,并首其子干谒说情罪状,而自束身待罪,圣明必深加矜亮,不特-36-

可称理轮破柱之职,而一番举动,自足令人心振耸,乃畏首畏尾,坐失事机,终为当轴挤去,良可叹也。为大臣者,当于此处着眼。

工部右侍郎高宏图疏,略曰:

"臣部有公署,中则尚书,旁列侍郎,礼也。内臣张彝宪奉总理二部之命,俨临其上,不亦辱朝廷而亵国体乎?臣今日之为侍郎,贰尚书,非贰内臣,体国家大体,臣固不容不慎,故仅延之川堂相宾主,而公座毋宁已之。且总理公署,奉命别建。则在臣部者,宜还之臣部,岂不名正言顺而内外平乎?"

上以军兴, 饷事急紧, 彝宪应到部验核, 不听。宏图遂引疾求去, 疏七上, 上怒其悻悻无人臣礼, 竟削籍。

南京礼部主事周镳疏,略曰:

"内臣用易而去难,此从来之通患。然不能遽去,犹冀有以裁抑之。今张 彝宪用,而高宏图之骨鲠,不可容矣。金铉之重,虽幸免罪,以他事中之矣。 王坤用,而魏呈润以救胡良机处矣,赵东曦以直纠扶同处矣。邓希诏用,而曹 文衡以互计投闲矣,王宏祖以礼数怠缓斥矣。若夫孙肇兴之激直,李曰辅、熊 开元之慷慨,无不罢去,未易屈指。尤可叹者,每读邸报,半属内侍之温纶。 从此以后,草菅臣子,委亵天言,补氏徇中贵之心,将不知所终矣。"

上怒其切直, 削籍为民。礼部员外袁继咸疏救, 不听。

是年正月,延绥贼伪为米商入宜君,陷之,复陷保安、合水。而宁塞余贼复合环庆诸贼,屯镇原之蒲河,欲犯平凉及凤翔。汉中巡抚练国事檄固原兵备王振奇同副总兵王性善等,截守各隘口;檄平凉兵备徐如翰同副总兵董志义,守泾州各要害。又檄总兵杨嘉谟等缉捕奸细,获贼唐马杀之,断其耳目,贼遂不敢出。适洪承畴从州间道疾至庆阳,曹文诏以临洮兵至,贺虎臣兵亦至,齐集于西澳夹击之,与贼大小十余战,斩首千余级,追奔数十里,伤堕者无算,而宁塞之余尽矣。惟浑天猴等尚据襄乐,练国事遂移镇宁州。时以西澳之捷,为从来用兵第一,而延西诸贼郝临庵、可天飞,屡为官军所败,独行狼复入其伍,据铁角城,耕牧其中,为持久计。洪承畴、曹文诏进击之,斩可天飞,其二贼亦生擒伏诛。自西澳捷后,军声大振。文诏忠勇善战,承畴与下同甘苦,得士卒心,转战四载,斩级三万余,西人稍稍休息,然亦惫甚矣。

三月,宁塞余贼夜袭州,兵备郭应响死之。关西余贼亦攻陷华亭,知县徐 兆麟甫任七日,城陷,逮问服法,人皆以为冤。

八月,山西巡抚宋统殷击贼于长子,贼奔沁水。贼首紫金梁、老回回、八 金刚围窦庄,张道濬率其族御之,贼多死。且闻秦兵至,甚惧,紫金梁、老回 回皆乞抚,惟张献忠、塌闯天不受命。紫金梁归疑未决,官军乘贼不备,轻骑 袭其营,贼遂南奔,犯齐源,陷温阳。 九月,山西贼豹五等,破临县,据之。滚地狼等南犯,陷修武,杀知县刘凤翔,焚掠武涉,遂围怀庆。上以藩封重也,切责河南巡抚宋统殷、冀南兵备王肇生帅兵次陵川,扼贼归路。贼北归,遇官军,殊死斗,互有胜负。会夜与贼争险,对营两山头,贼缘谷潜登,大哗,官军乱,统殷、肇生皆走,与诸军相失?宣大总统张宗衡提兵至高平,统殷、肇生以兵来会,大破贼于桑子镇,贼复入沁水。

十月, 山西巡抚宋统殷以陵川失律, 回籍听勘, 以许鼎臣代之。

十二月,张宗衡、许鼎臣同逐临县贼,贼入磐磨山。山方六百余里,贼首独头虎、摇天动据交城、文水,北窥太原。邢满川、上天飞据吴城东向汾州,紫金梁、乱世王屯红梯关吾儿峪,遂乘虚从沁州北掠榆次及寿阳,距太原止六十里,许鼎臣撤兵北归。时乱世王与紫金梁争一掠妇,构小隙,遣其弟混天王来投诚。廷议方主进剿,诸将讳言受降,权辞谢之,约得紫金梁头,方为请于朝。混天王唯唯而去。诸贼遂分为三,陷霍州、垣曲、长子等处。壬辰,陷辽州。是日除夕也。

六年癸酉三月,给事中陈赞化疏劾周延儒招权纳贿,游客李元功借丛威人。又云:

"廷儒尝语去辅李标曰:'上先允于放,余封还原疏,上即改留,颇有回天之力。'今上,羲皇人也。此系何语,岂徒小人之轻泄乎?至指借停刑以图贿利,此固通国所共知也。"

且引科臣李世祺为证。世祺亦奏延儒曾有此言。给事中朱又焕复疏参延儒重负国恩,毫无补救。宣府太监王坤亦疏攻延儒。左副都御史王志道疏争,王坤不宜侵辅臣,语颇过激。上召廷臣于平台,谕志道曰:"遣用内臣,原非得己,朕谕甚明。尔等不自省察,徒事执王坤之疏,朕己责其诬妄。乃群臣举劾,无不牵引内臣,岂处分各官,皆为内臣耶?"志道对曰:"王坤疏劾辅臣,举朝煌煌,皆为纪纲法度之忧。臣为纪纲法度惜,非为诸臣地也。"上曰:"廷臣于国家大计,不闻一言。惟用内臣在镇,不利奸弊,乃借王坤疏要挟朝廷,诚巧佞也。"诘责志道者再三。延儒奏:"志道非专论内臣,实责臣等溺职。"上曰:"职掌不修,沽名立论,何堪风宪之任!"志道退,即引罪乞罢。时乌程同召,竟无一言相助,宜兴亦以是憾之。

宣府巡抚马士英甫莅任,冒侵饷银六千两。镇守太监王坤疏发其事,士英逮问遣戍。旧例:巡抚到任,修候都门要津,侑以厚贿,赎缓不能猝至,则撮库中正额钱粮应用,而徐图偿补。此相沿陋习,各省各边皆然,不独一宣府也。士英莅任未几,一时不及抵偿,遂为王坤所纠。坤既以发奸为功,上亦心喜内臣之果能绝情面而剔积弊也。故凡言内臣者,皆不听。

六月,大学士周延儒罢。陈赞化复疏参宜兴,宜兴循例请罢。第三疏拟邀 俞旨,即出乌程,心图首辅,巧用机权,准予休告。旨下,出其不意,宜兴殊 不能堪,乃谋于内,召桐城旧辅以压之。宜兴在政府,每借力于内,以示其威 权,其语人也,辄以喜怒不测,归之圣意,而实阁中之权,尽归于中涓矣。是 阁体之坏,自宜兴始也。而其罪之大者,在不能沮内奄之出镇,几与昆山等。 惟乌程能踵其智,他辅皆不能及。

上饶、上海相继告殂,阁臣复请枚卜,上点用嘉善钱士升。士升虽浙人,与诸君子颇相周旋。唐世济力言于乌程,当急收之,无为彼中所用,遂有南京礼部侍郎,入正揆席。宜兴既去,又点用巴县王应熊,香山何吾驺亦以投诚乌程得之。巴县则宜兴所注意,而乌程援以自助者也。给事中章正宸疏言,爰立命下。吾驺人无间言,应熊则竟以奸邪目之,应听休致。有旨:革职提问。正宸方以馆选外授也。

王承恩败安塞贼于西川。胡堡贼目乔六斩其魁以降,余众悉遁。自是秦中稍宁,而晋、豫之间多暴骨矣。

正月,副总兵左良玉提兵援怀庆,败贼于涉县西,斩其渠。既而击林县贼,败绩于武安,麾下兵七千先后失亡殆尽,乃请邓兵相援。贼遂掠真定、井陉,兵备口檄守备李定、王国玺御之,陷贼伏中,贼遂长驱而东,大名兵备卢象升御之。

曹文诏连败贼于忻、代间,斩首千五百级,又败贼于榆社。时文诏屡捷,张应昌逗遛不进,紫金梁、老回回从榆社北奔。三月,山西兵击贼于阳城北。张道濬设伏于三缠凹,贼至伏起击之,斩贼渠满天星,贼大奔逃,抚许鼎臣奏道濬功第一。五月,曹文诏夜袭贼于偏店。贼惊走,坠山谷者无算,诸将公兵逐之,贼尽南走。总兵邓帅兵三千,同石柱土司马凤仪驰援河南,未几,凤仪败没。六月,川兵溃于林县,潞王告急。上念中州流寇蔓延,令总兵倪宠、王朴分将京营兵,赐二将弓矢战马。太监杨进朝、卢九德驰赴南河夹剿。

上以剿贼诸将,一时功罪勤惰,应有监纪。特命太监陈大金、阎思印、谢文举、孙茂霖,分监曹文诏、张应昌、左良玉、邓军,仍发内帑银四万两、红素蟒缎四百匹、红素苎缎二千匹,军前给赏。

七月,张应昌进剿汾州诸贼,内监纪需索百倍,汾阳知县费申钅惠以供应 不能给,投井死。左良玉破贼于怀庆,贼奔太行山。山西贼陷永和,复陷沁水 ,自秦入晋,五犯沁水,至是始破。

八月,陕西贼复起,攻绥德,杀知县费彦芳,固原兵备陆梦龙进剿于绥德 城下,死之。

贼流入真定者,杀掠甯晋南宫甚惨。九日,张应昌败贼于平山,获贼首张

有义,即"一盏灯"也。贼遂走五台山,据显通寺,其中薪储皆具,阻险自守,官军不敢击。

十月, 山西、河北诸贼二十四营, 乘冰渡河, 而南犯阌乡, 陷渑池。

十二月己未,河南贼陷伊阳,庚申,陷卢氏,遍掠汝州、淅州、内乡。戊寅,犯南阳,遂流入湖广,掠均州、光化。庚辰,贼假称进香,陷郧西。癸未,陷上津,郧阳抚治蒋允仪、河南巡抚曾倜,皆被逮。

延绥贼钻天哨、开山斧独据永甯关,前阻山险,下临黄河,负固数年不下。巡抚陈奇瑜简锐卒八千人,出不意,疾走入山。贼不虞大兵至,溃走,纵击,斩首一千六百级,二贼死,遂焚其巢。复击贼首一座城,斩之。河西盗悉平。

七月甲戌正月, 山西提学佥事袁继咸疏, 略曰:

"士有廉耻然后有风俗,有气节然后有事功。如总理户、工太监张彝宪有请令入觐官员投册以隆体统之奏,皇上从之,意在厘奸剔弊,非欲群臣屈膝也。乃上命一出,靡然从风,藩臬守令,参谒屏息,得免呵责为幸。嗟乎!一人辑瑞,万国朝宗,而相率趋拜内臣之座,士大夫尚得有廉耻乎?国家自有觐典二百余年,未闻有此。可为叹息也!"

上以其越责言事,切责之。既而彝宪奏辨,谓:"觐官参谒,乃尊朝廷。"继咸再疏,略曰:

"尊朝廷莫大于典例。知府见藩臬行属礼,典例也。见内臣行属礼,亦典例乎?诸臣入觐,投册吏部,典例也,参谒内臣亦典例乎?事本典例,虽坐受犹可以为安,事创彝宪,即长揖礻氏增其辱。高皇帝立法,内臣不得预外事,若必欲以内臣绳外臣,《会典》所不载!"

上再切责之。时当国者乌程也。

二月,会试天下士,命大学士温体仁、吴宗达为考试官,取中李青等三百人。又特旨: "五经颜茂猷,准列正榜前一名!"颜茂猷,福建人,五经俱拈就,知贡举官礼部左侍郎林年干具疏题请,奉旨: "准与誊录。"先文肃同考,领易一房,分送先文肃取中,先文肃力请中式,乌程坚拒,五上堂而终不允榜出,亦具疏奏请,奉旨: "准列正榜前一名"。茂猷遂列李青之前,于是海内咸识圣天子破格用人盛心。以后丁丑揭重熙,癸未冯元飚等,皆以五经中式,遂循为故事矣。

先文肃本房,首拔临川陈际泰(陈老宿),名震都下。次如皋、许直,甲申以吏部殉难者也。又次新昌漆园。首题"其行已也恭"四句,篇末痛言不恭不敬之害。先文肃毅然取之。呈卷时,意乌程必当见驳,当有一番质辨,既呈上,即批允,心内窃以为疑。比撤棘。乌程于阁中扬言曰: "外人说我们要进

场收几个门生,我们今日地位,也靠不着门生了,况场中即有人骂我。"嘉善曰:"场屋中如何骂得?"乌程曰:"他篇末竟讫不恭之臣如何,不敬之臣如何,岂不是骂?"嘉善曰:"老先生如何打发他?"乌程曰:"本房批'伸眉抗手,想见其人。'敢不中?敢不中?"其阴忍如此。

是时,场中皆推陈际泰为会元,检讨项煜欲令会元出其门,以计使先文肃谓: "渠首卷,乃杨廷枢也。廷枢,乃名重江南,为庚午解元。先文肃雅不欲与人争元,遂力让之。及拆号,则李青也。项煜向有"项黑"之称。故"项黑"得李青之号,哄传一时。是科虽乌程为主考,而力行阻抑。如榜额每科三百五十名,甲戌止得三百名,会元多入鼎甲,而李青不得列;每科考选馆员,独甲戌则否。又倡为内外兼用之说,而考选馆推为馆选,至欲令三甲就选县丞、主簿。众议沸腾,以为不可行,乃止。

给事中李世祺降级调用,以其论温体仁、吴宗达也。山西提学佥事袁继咸上疏,略曰:

"养凤欲鸣,养鹰欲击。今鸣而箝其舌,击而绁其羽。朝廷之于言官,何以异此?使言官括囊无咎,而大臣终无一人议其后。此大臣所甚利,忠臣所深忧,臣所谓太息也!且皇上所乐听者谠言,而天下误以攻弹贵近,为天子所厌闻,其势将波靡不止。"

上终以其越职言事切责之。

三月, 廷试策士, 赐刘理顺、吴国华、杨嘉祚等进士及第出身有差。

五月,陕西副使贺自镜奏监纪太监孙茂霖纵兵劫掠,玩寇殃民。宣府太监 王坤代辨:"监纪,纪功罪耳,追剿自有将吏在。如果如自镜所言,则行间文 武,地方官员,罪俱不在茂霖下矣。"

七月二十六日,上为外警焦劳,召对九卿科道,天语详明,下莫有能酬对者。

八月十一日, 吏部尚书李长庚削职为民, 下文选员外程良筹于狱。长庚素 见憎于乌程, 欲因事除之久矣。是时, 适议起废, 原是宽恤条款, 议及罪谴诸 臣, 奉旨下部。刑部方具招列名疏请, 旨尚未下。有语长庚者, 当俟刑部疏下 , 先释罪而后起废。乌程欲陷之罪, 促其急上。疏上, 胪列无遗, 共一百一十 六人。上以其屈法徇私, 朋比欺蒙也。故有此重谴。

良筹为吏部,甫莅任,即作誓文,誓于伏魔城隍之神。随刊其文,遍都市门。众咸耸动,谓必刻意简饬,并节不到如包老也。后狼藉异常,较无誓文者更甚。辛未词林程正揆,其叔也,每乞暇之夕,两人俱易更衣入青楼家,为卜夜之饮,众论益鄙之。至是下狱,索赃者趾相错于路也。正揆以次年京察。

长庚既去,左都御史张延登亦以请告去。旨: "府部九卿科道公举堪任冢

宰、总宪者来看。"时吏部左侍郎张捷署部事,特疏荐逆案吕纯如及原任兵部侍郎唐世济。八月二十一日,上特御平台,召五府六部九卿科道官面对,上谕曰:"吏部尚书,乃用人的官,须要天下第一才品。若据会推故套,不过精心定力两语混题,止须一二人把持足矣,何名会推?卿各举所知来!"

张捷奏: "臣昨辞部印,正为会推一事,年来诸臣党同伐异,误尽朝廷,在外会推,自然瞻顾局面,孰敢犯忌?今蒙皇上召对,谕臣等各举所知,务得天下第一才品。须不论方隅,容臣等破格推举。"

上曰: "立贤不以其方,卿等举来。"时定国公徐允祯等,大学士温体仁 等,共举谢■6A、唐世济等十余人,张捷仍独举吕纯如、唐世济。诸臣举讫 ,捷又奏: "臣已举两人。但此两人,皆举朝所不欲用者。"随取奏本呈御览 。上问: "科道官何为不举?" 吏科都给事中卢兆龙奏: "会推大典,科道例 无保荐,九卿推举当,则听皇上点用,不当者,臣等纠参。"圣旨深然之,随 取张捷疏细阅讫,上问曰: "吕纯如是钦案有名的,张捷如何举他?"捷奏 : "吕纯如有才有品,臣所深知。钦案列名,谓其颂美逆贤,今红本具在,并 无一字相及, 岂可坐以颂美?"上曰:"他已曾辨过, 但不可开端!"因以目 视科道官曰: "科道如何说?"卢兆龙奏: "诸臣荐举,各有本末,抑听圣明 裁夺。至张捷所举吕纯如,系钦案有名,臣等正拟纠参,适蒙圣谕,已有明鉴 ,臣等不敢复有争执。"张捷再奏:"臣实见吕纯如清执可用,今弃之草野 ,实为可惜。"御史张三模奏:"廷推冢臣,所关甚重。即使事非钦案,亦须 昭雪。吕纯如生平贤否,姑且勿论;业已身负重累,何以服人?况钦案久定 ,此端一开,渐何可长?"张捷又奏:"臣实知吕纯如是真贤者,故从公推举 ,即在钦案中,亦须分别!倘皇上用之不效,如李长庚削职,臣亦与同削职 ,或处分更有甚于此者,臣亦甘与同罪。"捷又奏:"小民作奸犯辟,朝廷五 年大审,每年热审,惟恐其冤,何况大臣,如何冤得?"给事中孙晋奏:"张 捷如此,如何比似?今日皇上郑重冢臣,特召诸臣公同谘询。乃以开释罪囚相 喻乎?"卢兆龙奏:"臣任清江知县时,记得吕纯如护送惠藩之国,沿途骚扰 。只此一事,已见无才,况屈身逆贤,其品可知。"时给事中姚思孝、顾国宝 、蒋德琼、吴南灏等,御史金光宸、韩一光、杨绳武等,俱奏吕纯如身在钦案 ,断不可用。捷犹呶呶置辩。给事中姜应甲叱之曰: "张给所举如此,心事可 知。还敢在皇上前巧辩!"上即命张捷下去,随将诸臣奏本传示各官遍阅,乃 退。明日, 旨下: "升南京吏部尚书谢■6A为尚书, 南京右都御史唐世济为左 都御史。"

先臣上《先朝实录未正》一疏,略曰: "臣顷因纂修《熹宗皇帝实录》 ,从阁中恭请《光宗皇帝实录》副本较对,见其'红丸'大事,皆祖《三朝要 - 42 - 典》之邪说而应和之。盖天启三年七月十六日、《实录》进呈,则礼臣周炳谟 等、吏臣庄际昌等所纂修,而阁臣叶向高、韩广等所总裁者也。至天启六年 ,逆党崔呈秀等谓: '《实录》非实,请旨重修。'则崇祯元年二月十七日所 进,今实皇史之所藏者是也。是时,皇上初登大宝《要典》未毁,逆案未定 ,阁臣施凤来等不行奏明,含糊从事,凡先帝二十年青宫之忧患,与夫一月天 子,万年圣人等事,俱隐而不彰,斯固臣子之所痛心者也。若先帝纪载尚未清 明,则今日编纂,将何所据?倘谓一入史,不可复出,则逆珰之矫旨,且能行 于当年,圣明之独断,岂不易于反掌?臣谨摘其甚者,上渎睿览:一云'当命 哲之日,诏诰恩赍,俨学负震器之重,储宫既定,典制文明。乃浮议外滋,无 端蔓引,皆好事者之过'云云。臣谨按: 先帝册立一事,自万历十四年以至二 十八年,诸臣羽翼国本,有贬谪者,有削职者,有廷杖者,忘身殉国,九死不 移,诸臣亦何利于己而为之?纵皇上有主,未敢言来日之功;而精忠自盟,岂 可没回天之力?乃谓'浮议外滋,无端蔓引',一语抹杀,谓皆好事者之过 ; 此与《三朝要典》所称奸党构衅,希图定策,与三案诸奸,一脉相贯者,同 一邪说也。宜改正者一!一云'四十三年五月,有男子张差,持梃人东宫殿檐 下,击伤门者,巡视皇城御史刘廷元回奏:张差话不情实,语无伦次,按察其 迹若涉疯魔。稽其貌,的是黠猾。而刑部提牢主事王之寀,捏谋危东宫之说 , 词连二珰。科臣何士晋、行人陆大受、主事张廷等, 附和其说, 愈加激舌 '云云。臣按:此即《要典》中'梃击'一案也。即据刘廷元疏,亦明言稽其 貌,的是黠猾,而必欲以'疯癫'二字,草草结局,不容王之寀揭奏,张差口 词,指为捏谋,何也?且张差有口,举朝岂应嘿然?而一有言者,辄曰附和 , 曰激舌, 则必使东宫无一护卫之人而后快乎? 正与《要典》同一邪说。宜改 正者二。一云'工科给事中惠世杨疏论刘廷元,遂谓初张差狂闯蓟道,阑入宫 门,廷元巡视皇城,按状疯魔。皇祖是其奏,谳决平允。自王之寀突揭构衅徒 党,因以为利,借他事蔑廷元。未几果显攻疯癫之案。一时邪说,世扬实为之 倡"云云。臣按:王之案摘发张差之逆,至于察处,至于削夺,后逮死诏狱 , 莫敢议恤。即惠世扬身被五毒, 体无完肤。所以不即死者, 逆珰欲借为戌首 , 遍杀天下名流, 非宥之也。幸遇圣明御宇, 仅免一死。尚稽启事, 乃云'党 徒,因以为利',斯亦何利之有焉?况疯癫之案,忠臣义士所共明目张胆而攻 者,何俟世扬为倡,始显攻之?《要典》邪说,宜改正者三。一云'张差闯入 东宫,言者纷纷,御史刘光复言致辟行刑,一狱吏任。似不必言官诧为奇货 ,居为元功。以此二语,为异议者剌骨,云云。臣按:刘光复之得罪也,实以 奏对越次。然据其语,但言皇上极慈爱,皇太子极仁孝两言,亦未见其有功于 神祖及先帝。而'奇货''元功'之语,不可谓非抹杀忠义矣。大抵闯宫一事

- 43 -

, 梃击殿檐, 近侍俱踣, 真天下奇变也。必欲视为当事, 不当根究, 以为仅一 狱吏之任,此何心哉?《要典》邪说,宜改正者四。一云'方上疾大渐,召李 可灼并趣和药,悉出圣意,一时臣工所共闻共见。其后者□为□世子止不当药 之喻,群小附和,嚣然鼎沸,污秽君父,几成晦暝之世。迨正论大明,邪说渐 灭'。且云'李可灼往来施善,中使以闻,其传奏姓名,莫可得而考'云云。 臣按:此即《要典》中'红丸'一案也。昔唐宪宗殁,杖杀方士柳泌,泌盖为 宪宗制长生药者,彼岂不愿其主之长生,而饵药不效则杀之,而不以为过,后 世亦不以为冤。今可灼进药,而先帝宾天,纵谓之误,庸医误伤平人,律有明 条,况误伤天子乎?乃与顾命大臣,同赐金帛。比屡经论劾,仅准致仕回籍。 此何以解于天下后世?且宫闱之中,传奏姓名,岂遂不可穷诘。稍欲穷诘,即 曰群小, 曰污蔑, 曰晦暝。此皆《要典》邪说也, 宜改正者五。以上五条, 皆 其尤悖谬者。伏乞圣裁,即敕史馆逐一改正,以信千秋,以光大典"云。

先是,八月初六日,先臣入阁,进所修《实录》,特致一揭于政府,欲题 请改正,与乌程、巴县,辩析良久,意思拂然,故无辞以难也。先臣遂与十二 日拜疏,十三日发票,嘉善票云:"《要典》已毁,是非自明。据奏皇考《实 录》,是否与《要典》同异,并天启三年所进《实录》,该部一并查议具覆 "。票入不发。至九月二十七日,上御平台,召阁臣,手出此奏,而谕曰 : "皇考潜德青宫几四十年,忧勤惕励,靡有宁晷。虽长幼固有定序,皇祖意 无偏向。然储贰为国家大事,诸臣上疏催请,是其职掌,如何说他浮议?说他 好事?"温体仁奏:"无嫡立长,皇祖屡有旨申明,因诸臣不行静听,屡疏扰 渎,以致大典久稽,实是诸臣之罪。"上曰:"虽如此说,然诸臣催请之疏 , 自不可少, 还是有功国本。又如张差持梃闯入东宫, 此何等大变, 王之寀揭 称其强壮不类疯癫,请集多官会审,正是他敬慎处,如何反说他捏谋?"王应 熊奏: "王之寀原系官箴有玷,知不能免,故捏出此段,心图自全。"上曰 : "张差直到殿檐, 韩本用聚众擒拿, 可是王之寀捏造的? 后多官会审, 张差 口供历历,是疯癫不是疯癫?"温体仁奏:"王之寀此揭原不差,但其本意欲 借此以自免。"上又曰:"皇考病亟时,李可灼轻进红丸,以致宾天。尔时廷 臣还是不闻不见的是,还是据法执奏的是?"王应熊奏:"李可灼本意,原祈 皇考速愈。因皇考病久后,一时挽回不转。"上曰:"君父有疾,岂是臣子可 以尝试,以希望富贵之地。当时诸臣不行执奏,已是错了,反说执奏的不是 ,有此理否?"温体仁奏:"此皆是逆珰时群小附会,造为此说。今《要典》 已经焚毁,是非已明,今又屡奉皇上申饬,便可垂示万古。"上乃将此疏付阁 臣改票。二十九日,奉旨: "奏内册立大典,皇祖渊衷默定,外廷未知,故屡 有渎请。然诸臣羽翼国本,忠贞难泯。张差实系疯癫,虽无别情,然梃击异变 - 44 -

,法应重究。红丸轻进,诸臣无一执奏,殊欠敬慎。但其意亦忠爱,谕旨明申 ,即为定案,《实录》不必议改,该部知道!"巴县所票也,阁臣护奸如此。 上有尧、舜,下有共、,可奈何?自是圣意属注先臣,欲大用矣。

十月初十日,日讲官姜曰广误读《通鉴》引罪。上传停《通鉴》,讲《春秋》。阁议《春秋》非专经不可。时词林止先文肃习《春秋》,举朝相庆,谓圣意之有在也。十一日,阁中题先文肃习《春秋》。日讲官旧例:日讲官止六人,今始增七人,为例矣。十二日,先文肃日讲命下,十七日进讲"元年"一传,十八日进讲"春王正月"一传,十九日进讲"盟蔑"一传,二十日进讲"克段"一传。圣上御讲筵,向未有连讲四日者。天颜甚和,御月白龙袍,亦向所未睹也。二十四日进讲"祭伯"传,而宰亘系归,"盟密"系关疑,俱不进讲。随奉圣谕"宰亘一章,正见当时朝政失宜,所以当讲,今后以此类推。"读之使人凛然,真不世出之英主也。

二十六日,廷遣登莱总兵倪宠仿古授钺之意,满朝俱角素。

此条与七月二十六日召对记注,及贺兵部王盛参论乌程诸疏、山西巡抚吴(甡) 陛辞疏,皆脍炙人口。因同遗书寄出不返,日久不能追忆,故举其概。

●卷四

癸酉,应天乡试,论题:《圣心如日明水清》。墨卷多用"青山绿水"等句,皆性理中语也。上阅之大骇,又御笔涂出文理纰缪者八卷,以礼部不行纠驳回奏,反行曲庇。尚书李康先闲住,主考庶子丁进降调,举人李愫、王佩等停革有差。

乌程倡"论行取知"推考选馆员。于是,徐开禧、胡守恒、张居、赖垓、林增志、王用子、梁兆阳、郭之祥、李仕淳、李景濂、鲁元宠、薛所蕴等十二人,考授编修、简讨等官。十二月十九日,始命下。又考选徐耀、范淑、秦之麒、宋学显、辜朝荐、叶向标、荆可栋、李汝璨、商用初等为给事中,邓钅弘、张肯堂、张缵鲁、刘呈瑞、张孙振等为御史。其改授者,张孙振拟兵部而上改御史,郑尔说拟御史而上改刑部。尔说,曾疏参温、王二辅者也。

崇德知县龚立本,考选授兵马。张孙振为归安知县,系乌程父母官,有奥授,因拉龚同营捷径。先是,龚梦有人言:"他日有张姓者,邀与同事,慎勿预!"至是,龚果辞,张遂由他途改换御史。

温体仁,乌程籍,归安人。王应熊,巴县人。同恶相济。吴宗达奉行两人意旨,毫无短长,时目为"篾片。"适礼部尚书黄士俊,丁未状元;左右侍郎孔贞运、陈子壮,己未榜眼、探花。京师为之语曰:"礼部重开天榜,状元、榜眼、探花,有些惶恐(黄孔)";"内阁翻成妓馆,乌归、王巴、篾片,总是遭瘟(温)。"一时传以为笑。虽云出轻薄少年手,然赫赫师尹,而令人鄙

夷至此, 其生平可见矣。

是年正月,降贼王刚、王之臣等至太原挟赏,巡抚戴君恩诱刚等斩之。王之臣,即豹五也。而岢岚大盗高嘉计,号"险道神"者尤横。会山、陕大旱,饥民投贼者其众,南贼自郧阳薄谷城,掠新野、光化、襄阳。一时六路贼俱集,官兵大不能支。贼遂围均州,掠荆门景陵,陷房县及保康。

陕西贼陷恂阳,西乡士寇乘之,汉中震动,贼遂连陷紫阳、平利、白河,围兴安。兵备王在台固守,适洪承畴赴援,乃退,破凤县。

二月,特设五省总督,以延绥巡抚陈奇瑜为之。去岁廷议,流贼孔炽,拟 特设总督,共推兵部侍郎汪庆伯。庆伯不欲往,乌程力庇之,遂止不设。至是 始,用奇瑜受命,檄诸将会兵于陕州。贼在汉南者,为土人所拒,乃趋夔州 ,入四川矣。

上发帑金五万两,命御史梁炳赈济山西。山、陕自去秋八月至是不雨,大 饥,人相食。永宁州民苏倚哥,至食其父母。

张应昌兵败于均州,贼还屯勋阳之黄龙滩,分三股:一趋雒阳,一趋浙川,一趋卢氏。时调宁远边兵剿贼,加副将张外嘉为总兵统之。行之中途,饷不时给,辽丁直哄至帐下,外嘉抚驭无术,遂遇害。辽丁结队,溃入流贼营中。

四川贼复入陕,陷两当、凤县,将由阳平关渡河趋巩昌。洪承畴追至成县,见贼势方盛,乃檄副总兵贺人龙、刘成功等统兵赴蓝田夹击。贼南奔汉中,承畴令断栈道,据守鸡头关,贼不得前,从间道犯城,固洋县官兵御却之。南犯川中,而川兵复扼守诸险,贼首李自成、张南忠等,坐困于汉中之车箱峡。会连雨二旬余,贼饥无所得食,贼马乏刍,死者过半,弓矢俱脱,指日束手就擒矣。李自成等大窘,乃求抚。密遣人贿奇瑜,每抚一名,纳银五十两,奇瑜利其贿许之。凡降贼三万四千有奇,勒令还乡,仍归原籍,檄诸军按甲无动。每百人以一安抚官押送,所过郡邑,为具糗粮传送之。既度栈道,出诸险口,至草凉楼地方。一夜,众贼尽缚诸安抚官,或杀,或割耳,或杖责,或缚而掷之道旁,攻掠宝鸡、麟游等处,始纵横不可制矣。

七月,陕西贼陷文县,官兵逐之,东走网峪川,遂陷同官,既而走凤翔 ,趋汧阳、陇州。初,贼之甫叛也,猝至凤翔西关口,称: "奉督抚檄安插城 内。"守臣知其诈,给以门不敢启,须缒上城,先登三十六人,尽杀之。总督 陈奇瑜因借为辞,劾地方官绅挠偾抚局,以激上怒。于是知县李嘉彦、绅衿孙 鹏等,皆逮问下狱。

洪承畴知降贼复叛,统兵进剿,至岐山,贼众大至,承畴兵仅三千,张疑设伏,贼遂趋耀州。时汉中兵三千四百有奇,总兵左光先等将之;临巩兵三千五百,总兵孙显祖等将之;平凉兵二千,副总兵艾万年将之。止可城守。总兵

张全昌等,统兵六千,专视贼所向以为援剿。是时,猖獗甚,烽火直彻于耀州 、富平、三原、泾阳。叛兵杨国栋拥三千骑,披双铠,直抵西安城下乞抚。巡 按范复粹不敢应,巡抚练国事在鄠县闻之,驰还,登南城,檄国栋至,语,一 日未决。度不受抚,必西走周至,密檄沿途官兵饬备,更设伏于周至之夹水沟 。时禾茂泥淖,骑不任驰,伏发,歼其半,一贼斩国栋以献,余入终南山。贼 混世王等从凤翔东趋,欲犯西安。洪承畴一夜驰入西安,檄诸路兵赴西安合击 之。贼至西安东境,官兵以力疲不能出,承畴恐贼东出潼关,先令张全昌、曹 变蛟间道趋渭南遏其前,而自帅兵驻潼关红乡沟。贼至,游击李效祖、柏永镇 力战,贼却不得入关,因登玉山。承畴驰赴蓝田,欲从山后间道剿之,贼惧 ,夜走商南。初,老回回等先据雒南山中,今又益以诸贼,共阻险自守。承畴 帅诸将驻潼关大峪口,以防其出,仍饬备阌乡、灵宝等处。闰八月,关西贼陷 陇州, 屯城中浃月, 参将贺入龙剿之, 贼围之数重。十月, 承畴遣左光先等援 之,围始解,而西走之贼,陷灵台及崇信、白水,又至泾州。是时,北至庆阳 , 西至巩昌, 西北至邠州、永寿, 西南至周至、郿县, 遍地皆贼众, 殆二十余 万。陈奇瑜至是始悔其见迟,分兵堵御,而力已不支矣。御史傅永疏言:"汉 南降盗,陷城破邑,所在骚然,皆由陈奇瑜专主招抚,谓盗已革心,不许道途 讯诘,故郡邑不敢问,开门揖盗,剿抚两妨,皆奇瑜之流毒也。"十月,上以 秦贼猖獗,逮陕西巡抚练国事,以李乔代之。十一月,陈奇瑜削职听勘。时廷 论俱罪奇瑜误国,应逮问正法。而乌程一力护持,仅遣戍。李自成于七月陷澄 城,围郃阳。闻洪承畴至,解围去,转寇平凉、邠州。八月,陷咸宁,杀知县 赵济昌。适承畴至,西走乾州。十月,左光先击自成于高陵、富平间,斩首四 百余级。自成佯求抚于监军刘三顾、真宁知县王家永,遽出城招抚,失其印。 三顾即登陴拒守,自成乃奔邠州。张献忠同自成隐澄城,转掠平凉。闰八月 ,自成先锋高杰降于副将贺人龙。

七月, 郧阳抚治卢象升剿竹山、竹溪诸贼, 连战, 斩七百余级, 复败之于峡石, 堕崖及投水者又千余人。

十二月,进洪承畴兵部尚书,总督五省。先是,西宁兵变,兵备孔闻籍阖室自焚,承畴还师定乱,贼遂陷陇州、郃阳。西宁既定,承畴整师而东,贼悉众东奔,分道尽入河南,集汝、雒间,左良玉军渑池,总兵陈永福令邓■〈王巳〉军南阳。

八年乙亥,正月,下吏部左侍郎张捷于狱。张捷自荐吕纯如之后,倚乌程为奥援,乞休疏凡三十二上,皆温旨不允。疏内唁唁狂吠,无复顾忌。最后奉旨:"张捷佐计在迩,着即出供职!"正拟于计典肆其凶锋,而适有御史刘宗祥之疏。先是,宗祥巡按四川,成都知县贺儒修者,张捷姻也,捷特作柬托宗

祥,欲得卓异一举,华阳一调,末又有"忠言不入,朝事日非"等语。宗祥入川,儒修狼藉甚者,宗实不能讳,据实纠劾。有旨:"革职逮问。"捷大恨。时宗祥回道考核,捷一力把持,拟加重谴。宗祥具疏剖辨,以捷手书上闻。宗祥甫投疏还,过太常少卿祝世美告之故。世美力止以为不可,急趋会极门取索原疏,则已封进御前矣。次日,旨下:"张捷革职提问。"后都察院拟"宗祥降三级,调外任。"御笔批:"刘宗祥着回道管事。"

二月,流贼犯凤阳,焚毁皇陵。报至,传辍经筵。是日十二,正当开讲也。百官皆角素,九卿上慰安公疏。二十四日乙巳,上御布袍,慰祭太庙。二十六日丁未,廷遣驸马都尉王炳慰告皇陵,百官俱布服从事,下诏罪己,减膳撤乐。随命逮凤阳巡抚杨一鹏、巡按吴振缨下之狱。振缨者,乌程幕客也,在台中七年,规避不差。及甲戌,台中沸然,谓:"此番吴再规避,当上公疏以正台规。"振缨不得已,乃就差次应得贵州,胡平运应得凤阳。振缨挟以乌程之势,请以贵州易凤阳。盖凤、庐、淮、扬,素称膻地,又与浙江邻近。平运因压于乌程从之。至是,以陵寝失事,同一鹏被逮,一鹏正法,振撄以乌程力庇,仅从遣戍。然乌程为振缨祈哀大珰,屈膝者再,阁体皆扫地矣。

又杨一鹏者,筮仕成都府推官。游峨眉山,有狂僧踞佛座,睨杨而笑曰:"汝犹记下地时,行路远,啼哭数日夜,吾抚汝顶而止耶?"杨追忆儿时事,大惊异,曲致礼焉。因留同宿,耳语达旦,临别,嘱曰:"二十年后,当会汝于淮上!"及是,杨开府淮安。一日薄暮,有野僧击鼓,称蛾眉山万世尊寄书。发函,得绝句诗七首,急索寄书僧,已不知所往矣。未几,流贼犯凤阳,焚祖陵,杨坐失事论死,其诗始传于世。其诗云:"谪向人间仅一周,而今限满恐难留。清虚有约毋相负,好觅当年范蠡舟。"其二云:"业风吹破进贤冠,生死关头着脚难。六百年来今一遇,莫将大事等闲看。"其三云:"浪游生死岂男儿?教外真传别有师。富贵神仙君两得,尚牵缰锁恋狂痴。"其四云:"难将蟒玉拒无常,勋业终归土一方。欲问后来神妙处,碧天齐拥紫金光。"其五云:"颁来法旨不容违,仙律森严敢泄机!楚水吴山相共聚,与君同跨片霞飞。"末二首不传。万世尊,即前狂僧也。密语受记,杨之子稍向人吐露,杨闻而诃之。临刑,神气如常时,预知定数不可违也。事颇怪,并附记。

先臣上《皇陵震动疏》,略曰:

"顷者,流贼不靖,乃至侵犯皇陵,焚烧禋殿,则真古今未有之奇变,君辱臣死之秋也。顾不亟灭贼,无以泄神人之愤,而不追溯乱源,亦无以施勘定之功。天纵神明如皇上,励精求治如皇上,而纷纭恇扰,寇盗相寻,斯其说在易之蛊矣。蛊之败坏,必易世而后见,故文皆以'干蛊'为辞,明前人养其疾,至后人始受之也。皇上御极于乾刚解纽、国步几危之日,一振振涤,日月重

光,深得先甲之维新;而于后甲之丁宁,似稍略焉。盖戊、己之际,废籍诸臣 , 汇征连茹, 而谋国罔效, 边疆失事, 以致圣衷怀疑, 群邪伺隙, 沿至于今 ,谬种渐芽,蔓延滋长。孤阳时翳于阴暖,砥柱莫挽于狂澜。魍魉或啸舞于离 明,狐鼠且纵横于城社。逆气足以召逆,妖氛足以成妖。此致乱之源也。堂陛 之地,欺猜愈深,朝野之间,刻削日甚。缙绅蹙靡骋之怀,士之嗟束湿之困。 商旅咨叹,百工失业。本犹全盛之海宇,忽见无聊之景色。此又致乱之源也。 边事既坏,修举无谋,兵不精而自增,饷随兵而日益,饷益则赋重,赋重则刑 繁。复乘之以天灾,加之以饥馑,而守牧惕功令之严,畏参罚之峻,不得不举 鸠形鹄面无食无衣之赤子而笞之禁之, 使愁苦之气, 上薄于天。皇上虽有恤民 惠下之德意,而九重邃密,何由得闻?下民无知,直谓有司仇我虐我,今而后 得反之也。此又致乱之源也。将无纪律,兵无行伍,淫污杀劫,惨不可言。尾 贼而往,莫敢奋臂,所报之级,半是良民。民间遂有贼兵如梳,官兵如栉之谣 , 民安得不为盗? 盗安得不日繁? 此又致乱之源也。具此乱源, 而当事诸臣 ,不能忧国奉公,反躬省己,加膝堕渊,总由恩怨,张罗布网,费尽机关。试 观数年以来,所为整纲肃纪者何事?推贤用能者何人?安内攘外者何道?富国 强兵者何策?即如流贼一事,飘忽已久。既失一夫当关之事,纵虎出林;复误 各抚分镇之谋,教猱升木。今日庙社怨恫,幽明胥痛。国事至此,诸臣之肉 , 岂足食乎? 凡食君之禄、担君之爵者, 皆当伏铁年质之诛, 膺放流之典。固 非角素盈朝可以塞责, 慰安一疏可以毕事者也。在皇上宜赫然一怒, 以安天下 。发哀痛之诏,明罪己之怀,按失事之诛,正误国之罪,行抚绥之实,蠲民间 之积逋, 使岂第循良民得专意于牧明。徐议财源之濬, 无徒竭泽之鱼! 尽斥患 得得患失之鄙夫,广集群策群力以定乱。蛊之象曰: '振民育德。'盖'振 ',取荡涤之义, '育', 为有补救之方。若复养痈不决, 弛瑟不张。俞咈无 闻,而但云有旨口口,方圮既极,而尚言戴罪立功,忽忽悠悠,将安底止哉

奉旨: "本内追溯乱源,亟图妙算,殊属剀切。并理财用人等事,该部悉心筹画,以备采择。"

三月,升卢象升兵部左侍郎,总督五省军务,赐尚方剑,统关辽兵,剿东南贼。洪承畴剿西北贼。升山东巡抚朱大典总督漕运,巡抚凤阳,同象升协剿。逮河南巡抚元默,以陈必谦代之。

复召大学士何如宠,坚以疾请,允之。东阁直房前第一间为首辅所居,若 未正首辅之称者,虽次叙第一,不敢居也。桐城再召,疏辞不允,勉强就道。 至临淮,复以病坚辞,始蒙谕允。乌程竭力邀首辅之称,不可得。端阳,阁臣 例有赐馔,大珰传谕,口称首辅,乌程即开首辅之室居之。 七月二十六日,皇上辟门,遍召群臣,试以票拟。先臣以病不能出,倪庶子元璐无病而亦不出。三十日,旨下:吏部取姜逢元、陈子壮、先臣、张至发、蔡弈琛、张元佐、闵仲俨、马之骥、张居九人履历。次日,廷推林钅干、孙慎行、刘宗周三人。阁票:"再推几员来看!"越三日,御笔批:"兵部马上差人召来。"七月二十六日,奉旨:"文震孟、刘□□、张至发,俱升礼部左侍郎,兼东阁大学士,即行入阁,与首辅体仁等协同办事。"阁中初票礼部尚书,御笔批礼部左侍郎,真特达之知也。二十八日上辞疏,二十九日旨下。八月初二日复上辞疏,午上而旨未刻即下。次日,即宣圣谕:"尽撤各镇监视内官。"其有拱己以听之意。先臣欲坚以病辞,香山力止以为不可,遂于十三日面恩入阁办事。

罢各镇监视太监,谕曰:

"朕御极之初撤还内镇,举天下事悉以委之大小臣工。比者多营私图,罔恤民艰,廉谨者又迂疏无通论。己已之冬,京城被攻,宗社震惊,此士大夫负国家也。朕不得已,用成祖监理之例,分遣内臣监视,添设两部总理,虽一时权宜,亦欲诸臣省咎引罪。今经制粗定,兵饷稍清,诸臣应亦省改。其将总理监视等官,尽行撤回,以信朕之初心!张彝宪俟漕竣,即回监供职。惟关、宁密迩奴寇,高起潜着削去总监字样,督理如故。"

先臣供事日讲,上甚属意,宫中尝言:"文震孟到阁中到好,只是他还是板金绦。"时先臣官少詹,止四品也。乌程侦知之,年终,讲官应叙劳题升,先臣应升正詹,乌程寝阁不题;傅祭酒冠,应升正詹。仍升少詹,阻遏后进,亦已甚矣。六月至八月,乌程大病不能起,上乃点用乌程。使乌程不病,此举不可几也。

时圣恩深重,捐躯莫能图报。而尔时天下事实有不可为者:政府之事权日轻,貂珰之盘蹈已久,能尽削之以归中书乎?疆场之饬备无期,内地之流毒愈炽,谁为宗岳之先乎?真小人张弧以伺我隙,伪君子甘言以售其奸,能一一烛照之俾勿堕其网乎?虽欲佐圣天子以转移天下,将安从措手也?窃为先臣计,不若坚以病辞,使圣天子知能辞宰辅者,惟先臣一人耳。宋神宗论温公辞枢密曰:"若他人,虽迫之使去,亦不肯矣。"惜乎!香山诸公,见不及此也。

上为流寇事,于二十一日召阁臣及府部科道官平台对面,诸臣各有敷陈,先臣奏:

"今调官兵剿贼,本以为卫民也。乃官兵不能剿贼,反以殃民,以致民间有'贼兵如梳,官兵如栉'之谣。今惟严申号令,凡兵丁扰害民者,必杀无赦 ;将官能钤束兵丁,秋毫无犯,监军御史,立刻奏闻,破格优擢。"

上曰: "卿说得是"。又召入门内,先臣奏: "民间团聚村堡,正'人自

为守,家自为战'之意。官兵不得以索粮为名,到处骚扰,以致流贼亦冒妆官兵,混入村堡。欲堵御之,则虞以杀伤官兵,致干法网;欲拱手听之,则子女玉帛,听其捆载而去。民害何由得除?寇氛何由得靖?臣意请天语申饬:今后凡官丁所过,地方官预备糗粮,勿得以恶草塞责,违者参处;兵丁亦不许入村堡,违者听民间堵御,将官不得故纵。"府中某有言此不可行者,先臣复相辨析。时跪奏良久,上曰:"先生起来。"称"先生",亦异数也。

故事:新参入直后,以名帖同礼帖致意大珰,大珰亦以名帖、礼帖致意,此旧规也。先文肃由特简入政府,此例遂废。大珰曹化淳,系王安名下,素附正人,疑先文肃有意外之托。王安之侄中书某,转致同人,且盛称曹珰皈依先文肃之意。又云:"若循例往来外廷,惟所欲为,大珰无不奉命。"同人以告,先文肃坚持不可,曰:"极大珰之力,使我不为宰辅耳。不为补辅,于我何损?而名帖既入,此辱岂能洗耶?"同人乃止。曹珰久不见复,以为大耻,遂与乌程比面。呼吸相应。先文肃顿失圣眷,盖由于此。

乌程于内廷凡有执事人员,极小者,节中俱有礼相候;掌印及秉笔者,又不必言。先文肃乃孤行一意如此,欲久居揆席,得乎?

先文肃壬戌廷试,大珰王体仁以御批第一,持名帖报喜。旧例:以晚生帖 复之。先文肃语其人曰:"我新进书生,不知回帖怎样写,今姑以原帖奉复。 "盖甫进,即与内奄抗,姜桂之性,老而弥辣如此。

时杭州解到龙缎三万匹,内奄索贿不遂,驾言不中用,令票旨驳还。先文肃与乌程言:"龙缎虽云不堪御用,然以充赐赍杂赏,似亦无妨。况三万匹入京,不知费民财几十万?若行驳还,复造以进,民不堪命矣!明主可以情告,宜出一揭,为杭民请命,乞行暂收。以后不以不堪者塞责。"乌程不可,票旨尽数驳还。后徵之数年,始克补解。

总兵曹文诏以剿贼阵亡,奉有恤典。其子曹变蛟任副总兵,有谢恩疏,阁 票者再四,仍发出改票。御笔将奉恤典月日,及上疏月日,各加一点,阁臣咸 不解其故。后数日,乌程入直,反复良久,曰: "得之矣"。乃恤典之旨尚新 ,与谢恩疏日月不相应,盖变蛟托人在京干。当邀旨后,随即具疏,即汉昭察 霍光之明也。乃票旨诘问其故,次日,即下。先文肃谓"乌程亦有小才"。谓 此。

浙江提学佥事黎元宽以文体事褫革。元宽出揭,尽发乌程嘱托诸私事,谓 执法不阿乌程修怨所致。御史姜思睿据揭具疏参论,给事中姜应甲助之。思睿 疏有为代草者,事颇泄,乌程乃得预为地。上果主先入之言。欲加降处,屡发 改票,先文肃与香山竭力调护得免。

九月, 部推操江, 正为太仆寺卿张元佐, 光禄寺卿王道直陪。上召对于暖

阁,元佐抄拾陈言。率尔殊甚;道直兢兢,言不能出口。上点用道直。后四年己卯,浙江巡按题涂必泓,云南巡按题王范,上亦召对。必泓条奏两浙利弊甚急,上改王范巡按浙江,必泓巡按云南。盖圣意用人不测如此。

十月,上以流贼未平,震惊陵寝,特颁圣谕,避正殿,撤乐减膳,以初三日始居武英殿,百官俱宿公署,阁臣俱宿于朝房,诏曰:

"朕以凉德,缵承大统,不期倚任非人,边虏三入,流寇七年,师徒暴露,黎庶颠连。国帑匮绌而徵调未己,闾阎凋敝而加派难停。中夜思维,不胜愧愤。今年正月,流氛震惊皇陵,祖恫民仇,罪实在朕。今调边兵,留新饷,立救元元,务在此举!惟是行间文武吏士,劳苦饥寒,深切朕念。念其风餐露宿,朕不敢独卧重帏;念其饮水食粗,朕不敢独享甘旨;念其披坚冒险,朕不敢独衣文绣。兹择十月三日,避居武英殿,减膳撤乐。非典礼事,惟以青衣从事。与我行间文武吏士,共甘苦之,以寇平之日为止,文武官其各省过淬厉,用回天心,以救民命!"

七日,上御笔起用黄道周。十日,上御笔放王应熊。此两日,乌程皆以待罪不入直。而十日,嘉善、香山,皆以暂假不入,惟先文肃与辎川司票拟。说者谓巴县之放,先文肃实为之,由是忌者益耽耽不能旦夕容矣。

给事中许誉卿削籍为民,福建右布政申绍芳革职法司提问。誉卿由壬戌考 选,历任工科都给事中,计今十四年,资俸俱极深。以母老,欲得南京太常少 卿,以便迎养。同人俱不可,德州遂欲题升南缺。先文肃愠甚,语侵德州过当 ,德州怀恨。适台省同时攻德州及总宪,许公谓必须舍德州而专攻总宪。盖总 宪与乌程朋比肆恶, 尤不可缓。户科姚思孝业具弹章, 以德州、总宪并列。以 许公言,遂去德州,德州稍稍相忌矣。而御史张缵曾不通商榷,特疏独参德州 ,张寓与许比邻,德州疑此疏出先文肃及许公意。又山东左布政劳永嘉辇金六 万两, 主兵科宋之普家, 营升登莱巡抚, 已入启事矣。劳, 故'三案'漏网 ,诸台省拟合力以攻之。德州三过户科宋学显,曲致殷勤,求诸君稍徐之,候 旨下而攻之未晚。盖旨既下,则前金可分享也。又曰: 劳公之座, 即申公之座 也。申系寒家姻戚,时以右布政赍表入都,瓜期已及,盖直以此相期,而台省 竟不能待,交章连牍。有旨:"登抚者另推!"而东省诸人,又无不怀恨矣。 宋之普力怂德州,谓先文肃决不相容,自时以铨席待南冢及大司农,岂能久留 汝耶? 德州已心动, 适又值张缵曾之疏, 以之普语为信然。遂具疏参誉卿与绍 芳,坐以"争官讲缺,"而参绍芳中有"凭藉奥援"等语,阁中相顾错愕。嘉 善谓"争官须有实迹,当令回奏!"不应。乌程票旨,而悍然抢去,票旨云 : "大干法纪, 著降级调用。" 夫既云"大干法纪"矣, 而仅仅降调乎? 次日 ,果改票: "著削籍为民。"先文肃力争之,不能得,乃言: "科道为民,极 - 52 -

荣之事,敬谢老先生玉成之。"又二日,旨下:"誉卿为民,绍芳提问。"

十一月,大学士何吾驺与先臣同罢。许给事誉卿,复有去国一疏参乌程。乌程辨疏,即参先文肃,即指前"为民极荣"之语。谓:"皇上所以鼓励天下者,止有此爵禄位号,而文某乃云云,以股肱心膂之臣,为此悖伦灭法之语。"曰"悖"曰"灭,"盖深以激圣怒也。上览之果怒,有旨:"吾驺、震孟,不宜徇私挠乱。"疏未及吾驺,而旨突及之,知乌程所以相中者,非一朝一夕之故矣。吾驺与先臣,俱具疏引罪。再疏,吾驺奉旨:"着致仕去。"先臣奉旨:"着冠带闲住去。"

下庶吉士郑曼阝于锦衣狱。曼阝为壬戌庶吉士,建言蒙谴,林居亦十四年 矣,与嘉善皆出华亭之门,称先后同门。郑之得馆选也,宜兴口诛笔伐,不少 宽假,郑心怒之。辛、壬之际,攻击宜兴、乌程者甚众,郑因昌言:"宜兴决 不可留,而乌程实可大用,言路不当并攻。"嘉善心善其说。既入政府,即力 誉郑于乌程,乌程唯唯。嘉善邮寄郑书,谓:"当急来,吉致子情于乌程矣 ! 郑复寄讯先文肃, 先文肃力阻其来, 郑反有愠心, 以文肃之相为, 不如嘉善 也。至是, 赴京补官, 嘉善复言于乌程, 谓: "某已来, 是人可备先先生药笼 中物,当以馆职畀之!"乌程复唯唯。武进旧辅,郑族母舅也,力毁郑于乌程 , 乌程信之。适时乌程新逐香山与先文肃, 长安哄然不平其事, 郑亦随众持愤 激之论。乌程侦知之, 谓郑特假语以欺嘉善耳, 遂具疏纠郑。疏成, 语嘉善曰 : "今为郑某事具疏,当与老先生同题。"嘉善欣然。乃取视,则纠其杖母事 。嘉善面赤股栗,不能出一词。乌程冷笑曰:"固知老先生不愿预也。"遂独 具名以进。上方欲以孝弟风励天下, 览疏震怒, 下曼 下锦衣狱。杖母者, 郑 为孝廉时,父振先私宠一婢,为嫡吴氏所虐。振先与子谋,假乩仙以怵之,吴 氏惧甚,愿受杖以赎罪。即令此婢行杖,得次,曼阝不禁失笑。吴氏大怒,谓 渠父子私构此局, 遍诉三党, 由是喧传有杖母之事。然其事已三十年, 不可得 而究竟也。

十二月,在籍礼部左侍郎林钅干、顺天府尹刘宗周,行取到京。有旨: "林钅干着以原官兼东阁大学士,入阁办事。刘宗周升补工部右侍郎。"

是年二月,流贼犯凤阳。先是,总兵尤世威等,统兵扼守潼关诸隘口,露宿凡十旬,皆患疫疠不能军。闻贼大至,遂溃。贼乃越卢氏,超永宁,转陷荥阳,攻汜水,屠之。又破固始,复分为三路:一趋凤阳,一趋六合,一趋颖、毫。颍州知州尹梦鳌、判官赵士宏率士民固守,城破,俱阖家殉难。遂犯凤阳,凤阳无城郭,贼至,官军无一人敢迎敌者,贼焚皇陵,楼殿俱烬,燔松柏三万余株,杀守陵内奄六十人,纵放高墙罪宗百余人。留守朱国率家丁巷战,斩贼二十七人,力竭以死。贼首扫地王、太平王入府治,知府颜容暄囚服匿狱中

,贼纵囚,获之,贼首张盖鼓吹,杖容暄于堂下,杀之。推官万文等六人、武 弁四十六人,俱被杀。十民被杀者数万,剖孕妇以视男女,注婴儿于槊,观其 宛转呼号以为乐,焚公私邸舍三千余间,光烛百里,恣掠三日。太监卢九德、 总兵杨御藩统京营兵至,南京兵京至,贼乃拔营趋庐州,沿途杀掠无孑遗。陷 巢县,杀知县严觉。攻舒城,知县章可试塞三门。止开一门以诱贼,暗设坑以 陷之,贼入死者千余人。援兵亦渐相逼,贼遂掠霍山,抵庐江,庐江敛金求免 ,贼伪许之,乘不意,夜袭城,城陷,复陷无为州。

贼首满天星、张大受等攻桐城,乘舆绕城呼降。守将射中其腰,遂趋潜大诸县,山民皆习猎,以毒注矢,人辄毙,所在结寨杀贼,贼遂走麻城。

三月,江北贼掠安庆,陷潜山,应天巡抚张国维率兵御之。江南兵素不习训练,猝与贼遇,陆营守备周补右望风先逃,总练指挥包文达阵亡,全军溃散,贼遂入湖广,陷麻城及罗田。

蕲黄民擒获贼首爬天王,身长八尺,日啖人心数十,双目与发肉俱赤,自言:"此天亡我,非我过也。"倡乱九年,陷州县十余,所向无敌。今乃为村民所擒,岂非天哉?解至军门伏诛。

总兵邓■〈王巳〉,为叛兵杀于樊城。■〈王巳〉素无纪律,所将川兵, ,淫掠尤甚。俄骑营叛,■〈王巳〉登楼以避之。见势逼,赵火死。举营北窜,惟步失未动。洪承畴令参将贾继选、周继元分统之。

五月,汉南贼陷宁羌,曹文诏进剿,夜至王峪,贼伏险以待,文诏击之,败。张全昌自咸阳出兴平之东,贺人龙入子午谷断其南奔,刘成功同游击王永祥驻金牙关遏其北走。贼夜渡河,趋郿县。承畴亦渡河追之,至王渠镇,贼力出恣掠,贺人龙击败之,追至大泥峪。贼舍骑登山,张全昌复击之,贼尽入终南山。

六月,陇西贼摇天动等袭陷西和,曹文诏赴援,文诏至婆罗寨,大军在后,而贼十余万骤至,力竭自刎。文诏敢战能杀贼,为贼所畏。报至,官军为之夺气。

陕西巡抚李乔革职议罪, 甘学阔代之。

七月,贼高迎祥、张献忠等陷澄城。八月,陷咸阳。先是,贼翻川鹞降于承畴,贼首高迎祥屯乾州。承畴令翻山鹞说之,不听,南走武功,承畴追击,败之。迎祥率大队自武功、周至,分道渡河。十月,张献忠、老犭回犭回突出潼关,守将艾万年等兵溃,遂犯南邓,而一字王等部众十余万,高迎祥统十二万,亦自潼关出犯阌乡、灵宝。大队东行,尘埃涨天,阔四十里,络绎百里,老弱居中,精骑居外。总兵祖宽、左良玉,两军相对,遥望不敢邀击,贼遂屯于陕州。十一月,祖宽破贼整齐王于九蒿,贼溃而为二,东走偃、巩,南走

汝、郏。丙辰, 群贼大合于龙门白沙, 连营六十余里。祖宽分兵袭击张献忠于姑家庙, 大败之, 斩首行余级, 献忠遂陷巢县、含山, 又陷和州, 沿江下犯江浦。

十二月,贼高迎祥、罗汝才破光州,官吏士民,屠戮无遗。参将罗于萃击贼汉南,追贼至子午谷,又败之,贼奔饶风关。

○补录

○毛马魏傅四公疏略

周延儒未枚卜之前,上独召对,日西而入,星移始出,语秘莫传,举朝惊骇。御史毛羽健疏言其事,略曰:

"国家设阁臣以备顾问,设九卿以课职掌,设台省以司纠弹、封驳。大小相维,壅蔽不生。祖宗立法,良有深意。皇上每事法祖,今日欲访军国大务耶,一二执政,谁敢不竭股肱;欲探机密隐情耶,二三言路,谁敢不披肝胆。乃舍葑菲之遗,独结鱼水之契。皇上将无谓举朝皆不足信,惟延儒一人可信乎?延儒果有嘉谋谠论,亦宜昭示中外,宣付史馆,俾天下万事晓然,知圣眷之专有所属。而大小臣工,划然于进退之不可苟如此。昔汉武帝非冠带不见汲黯,宋臣苏轼耻由他途进。今皇上于延儒召见,不以朝参,而于晏暇,非宣室之鬼神,何为前席?岂通明之传令,何为夜半?不几以南衙之出人,而同北门之学士乎?延儒贤者,必将形迹自远,不肯冒昧以赴功名。如其不然,又安用取此人而用之?"

次年,袁崇焕伏法,兵部员外郎陆澄源疏参羽健为崇焕党同,法应同坐。 有旨:"革职提问。"

时王永光起补高捷、史{范土}为御史,御史马鸣世疏劾之,略曰:

"王永光以逆珰余孽,作神奸领袖,违旨拂众,荐用高捷、史{范土}两邪臣。夫捷为霍维华遗党,一脉相传,皇上岂不知之?彼逆案诸臣已死之灰也,而护持逆案诸臣,是未剪之翼也。若严逆党之身,而宽逆党之类,窃恐鹰眼独存,鸱音复振。其为芝兰嘉禾之害,非浅鲜也。"

宣府大监王坤以"册籍委顿"劾巡按胡良机,有旨: "究明奏夺。"给事中魏呈润疏争之,略曰:

"代巡之任,簿书刑名,碎如蚁聚,使良机果有诖误,则回道考核,应以直柱侯之圣鉴。今王坤在镇,良机亦在镇,而随以'究明奏夺',一付中贵之手,良机倘坚如矢之概乎,知其不以危改节,万一百练刚肠,化为绕指,奥灶窟宅,转为径窦,不亦羞朝廷、坏士节,令后来衔宪而往者,靡所展其才猷乎?人见纲纪之司,谘访之使,一旦获戾,中贵莫能自必其命,彼半铜分符,谁复敢以国事争抗者?异日皇上欲闻九边之动静、监视之善恶,奚从知之?"

给事中傅朝礻右疏略曰:"皇上虑周边境,用王坤监视宣大,未尝令其司 弹劾之权,操中朝之议也。乃一参再参及阁臣,纵令阁臣有过,朝廷耳目之司 ,夫岂乏人,乃令中官言之?书之史册,何以示子孙而传后世哉!臣于是不能 不为首辅咎焉:当遣内臣之始,何不近援祖制,远援汉、唐、宋之覆辙以力谏 ?即不然,相率以去就争之可也。臣又不能不为诸辅咎焉:当票拟王坤之疏 ,曷不直言揭奏,正义责坤,为皇上遵祖制,为朝廷持大权,而顾唯唯以听之 乎?臣不特为阁臣惜,而深为国体惜,为天下治乱之大关惜也!"

九月丙子,特援武举陈启新为吏科给事中,启新上疏言: "天子有三大病: 曰科目取人、资格用人、推知行取科道。惟皇上停科目以诎虚文,举孝廉以崇实行,罢推知行取以除积横之习。而且蠲灾伤钱粮,苏累困之民,专拜大将,举行登坛推毂之礼,使得节制有司,便宜行事,庶几民怨平而寇氛靖"等因。启新赍疏跪正阳门者三日,内奄辈传闻大内。上阅其疏,异之,特命授职。阁臣不敢缴旨,六科未敢执争,本科给事中颜继祖疏请增设公座。呜呼!阁臣科臣,真可谓无人矣。

三月,下礼部右侍郎陈子壮于狱。时上笃厚天潢以祖训,凡郡王子孙,有 文武才能堪任用者,宗人府县以名闻,朝廷考验授官,其迁除如常例。命下部 行之。子壮先诣政府,力言其不可行之故。乌程盛称皇上神圣,臣子不宜异同 。子壮曰:"世宗最英明,然附庙之议,勋戚之狱,当时诸臣,犹执持不已。 今皇上威严,有类世宗,公之恩遇孰与张、桂?但行将顺而废匡正,恐非善则 归君之义也。"乌程大愠。既而子壮上疏,言"宗秩改授,适开侥幸之门,隳 藩规,溷铨政"等云。方疏之入也,尚书黄士俊恐触圣怒,辞不列名。疏入 ,上果大怒,适当御茶,掷茶瓯于地。乌程票旨,罪其"阻诏间亲,法司提问 。"

五月,大学士钱士升罢。嘉善之入政府也,实由乌程颇相结纳。凡乌程有所举动,每令嘉善先发而后继之。如用冢宰谢■6A、总宪唐世济,皆乌程意也,而嘉善成之。乌程之攻先文肃也,引嘉善为助,嘉善效力甚至。及先文肃与香山同日去国,乌程遂以嘉善为坠物矣。适有武生李,疏言:"致治在足国,请搜括臣室充饷。"嘉善票严旨以进,有旨:"卿以密勿大臣,即欲要誉,已足致之,母庸汲汲。"而嘉善始危。又嘉善弟士晋,巡抚云南,狼藉大著;经历吴鲲化疏讦士晋赃私不法诸事,乌程即票严旨,仍戒晋江无得漏言。嘉善再疏,即罢。

祭酒倪元璐疏参邹华,略曰:

"昨见黄安县生员邹华,妄行荐举,列及臣名,不胜骇异。陛下求言若渴,本欲宣隐豁幽,而宵小干进,薄孔孟为糟糠,网簪缨为桃李。吴鲲化,部民

也,参及抚按; 邹华下士也,荐及朝绅。如是而望朝廷这上,昆首伸眉,岂可得乎?"

原任山东滋阳知县成德母辱温体仁于朝。成德持身廉介,筐箧绝响,又赋性峭直,不能左右上官。先文肃在朝廷,极称道之。御史禹好善巡按山东,具疏参劾,先文肃大为称屈。德又有疏参乌程,奉旨下狱,好善遂参及先文肃,云:"成德系旧辅文某私人,此疏系文某属草以授德者。"时申布政绍芳已逮到下部,群小合谋,拟借事株连,代乌程修怨,势岌岌矣。适先文肃以六月去世,群谋始解,申、成俱行遣戍,成之母伺乌程入朝,栏舆丑詈,且集瓦砾掷之,乌程狼狈走免,随具疏奏闻。有旨:"着五城驱逐"。而乌程令锦衣尉加校尉五十名护视。人谓成母此举,不减施全之刺秦桧云。后闯逆入犯,破昌平,成母同其媳若女,俱自投井中。

逮山东巡按张孙振。孙振疏参提学袁继咸,继咸素有廉明之誉,巡抚吴业保荐之矣。有旨:"以抚按举劾互异,严行诘问。"具疏,备陈继咸居官廉明,当荐不当劾,并列孙振不职诸状。时长安哄然,皆不平其事。都察院遂疏参孙振是非颠倒,大负代巡之职,宜行提问以儆官邪。有旨:"孙振逮问,与继咸供职如故!"

嘉善既去,晋江以病卒,复行枚卜。上点句容孔贞运、江夏贺逢圣、南海 黄士俊,俱以尚书入阁,淄川因是亦得加尚书。丙辰,不考馆选,而鼎甲三人 皆大拜。庚戌,亦不考馆选,鼎甲三人,俱不得正揆席。而武陵、金溪补春阙 ,亦一异也。

千户杨光先疏论陈启新、温体仁, 舁棺随其后。上大怒, 命廷杖八十, 遣 戍辽西极边。

祭酒倪元璐罢。先文肃既去,乌程恨倪公剌骨,必欲逐之而后快。言路部僚,莫有应者。乃以京营为饵,掀动武弁,诚意伯刘孔昭应募,遂摘倪冒封事,并及许生重熙。盖熙曾纂有《五陵注略》,以书生不当妄言国事也。倪请于家取前所给诰敕,验无冒封事,罪无可坐。乌程票旨该部议处。至是,部覆上。有旨: "倪元璐冠带闲住去,许重熙革去衣巾,书板追毁。"后京营缺,不可得,遂以南京操江赏之。孔昭,即前参侯恂以媚乌程者。呜呼!青田有此孙,辱青田矣。

七月,清兵入犯,上命太监李国辅守紫荆关,许进忠守倒马关,张元亨守龙门关,崔良用守固关,孙继武、刘元斌率禁旅六千,防治河口。上又命太监魏国徵守天寿山,寻以国徵总督昌平等营,以邓良辅守之,邓希诏监视中西二协,杜勋监视东协,升张元佐、仇维祯兵部右侍郎,镇守昌平、通州。时所遣内奄,皆即日出城。上语阁臣曰:"内臣即日就道,而侍郎三日尚未出,何怪

朕之用内臣耶?"上又命太监卢维宁总督通津临德军务,兼理漕运河道。

上命兵部尚书张凤翼总督各镇勤王兵,关宁太监高起潜为总监,宁锦总兵祖大寿为提督,南援霸州。

工部右侍郎刘宗周疏,略曰:

"人才之不竟,非无才之患,而无君子之患。今天下即乏才,亦何至尽出二三中官下,每当缓急之际,必授以大任,三协有遣,通、津、临、德有遣,又重其体统,等于总督,将置总督于何地?是以封疆尝试也。且小人于中官每相结纳,而君子独岸然自异,故自古有用小人之君子,无党比中官之君子。皇上诚欲进君子而退小人,而复用中官以参制之,此明示以左右袒也。"不报。御史金光宸疏参侍郎仇维祯首叙内臣功为借援,又请内臣督兵为蔑法,并及本兵张凤翼。上弗善也。至是,为援剿事,召对廷臣子平台,并召光宸,上诘之曰: "仇维桢方至通州,尔即借题沽名乎?"上时怒甚,直欲按红牌处斩,适迅雷暴雨,直震御前,乃止,仅行降调。

工部右侍郎刘宗周疏,略曰:

"皇上以不世出之资,际中兴之运。即位之初,锐意太平,甚盛心也。而 施为次第之间,未得其要。属意边疆,贼臣以五年复辽之说进,遂至戎马生郊 ,震及宗社,而皇上遂有积轻士大夫之心矣。由此而耳目参于近侍,心腹寄于 干城。厂卫司讯防,而告密之风炽;诏狱及卿士,而堂帘之情隔。人人救过不 给,而欺罔之习转甚;事事仰承独断,而谄谀之风日长。甚者参劾之法,惟重 徵输, 官愈贪, 民愈困, 而赋愈逋。总理之外, 复设监纪, 权愈分, 法愈废 ,而盗愈多。夫君臣相遇,最难也。得一文某以单词报罢矣,得一陈子壮又以 过戆下狱矣。于是井市杂流,乃得澡其讹说,乘间抵隙,以希进用,国事尚可 问哉? 夫皇上不过始于一念之矫枉,而积渐之势,酿为厉阶,遂几于莫可匡救 。则今日转乱为治之机,断可识已。皇上所恃以治天下者,法也。所以立法者 , 道也。如以道, 则必体上天生物之心, 而不徒倚用风雷; 念祖宗学古之益 ,而不致轻言更改。以宽大养人材,以拊结人心。而且还内侍以扫除之役,正 懦帅以失律之诛, 慎宗潢以改秩之授。特颁尺一之诏, 遣内廷臣赍内帑, 巡行 郡邑为招抚使, 赦其罪戾而流亡者, 专责抚镇, 陈师险阻, 坚壁清野, 听其穷 而自归。诛渠之外,不杀一人。此圣人治天下之明效也。武生陈启新一言投契 ,立置清华,此诚盛事。臣愚谓宜先令以冠带办事黄门如试御史例,俟数月后 ,果有忠言奇计,实授未晚。不然,如名器可惜何?皇上天纵神明,而诸臣不 能以道事君, 徒取一切可喜之术, 臣窃痛之!"不报。

九月,北兵从建昌冷口出,守将崔秉德请统兵先遏其归路,总将高起潜不敢前进,扬言:"当半路击之。"及报至,北兵已尽出口,犹观望两日,始进

至石门。

时当八月乡试之期,以城守暂辍。及北兵既退,改期十月,亦文运之厄也。 。

北兵陷昌平,将天寿山陵寝禋殿尽行拆毁。北兵退后,督抚奏称: "忽有怪风从东北起,将陵寝禋殿尽行吹坏。"有旨: "即着估价修理。"上下相蒙,不复究竟,而阁臣枢臣,反叙功加恩。三新参俱加太子太保,蓟督丁魁楚戴罪管事,蓟抚吴阿衡供职如故。

●卷五

刘宗周以乞休允放矣。闻边警,即杜门私邸,俟解严后始出都,陛辞疏略曰:

"自己巳以来,无日不绸缪未雨,而祸乱一至于此!往者,袁崇焕误国 , 其他不过为法受过耳。小人竟起而修门户之怨, 举朝士之异己者, 皆坐以焕 党,次第置之重典,或削籍去。自此小人进而君子退。中官用事,而外臣寝疏 。朝政日隳,边政日坏。今日之祸,实己巳酿成之也。且枢臣张凤翼溺职负任 ,而与之专征,何以服王洽之死?督臣丁魁楚失事严疆,而与之戴罪,何以服 耿如杞之死? 诸镇抚勤王之兵,争先入卫者几人? 而概从宽典,何以服刘策之 死? 今二州八县, 生民涂炭也极矣, 廷臣之累累若若者, 皆相幸无事, 又何以 服韩广、李邦华、张凤翔之或戍或去? 岂昔者之为异己驱除, 今不难以同志互 相容隐乎? 臣于是而知小人之祸邦国无已时也。皇上恶私交, 而臣下多以告讦 进;皇上录清节,而臣下多以曲谨容;皇上崇励精,而臣下奔走承顺以为恭 ; 皇上尚综核,而臣下琐屑苛求以为察。规其用心,无往不出于身家利禄。皇 上不察而用之,将聚天下之小人,立于朝而有所弗觉矣。至近日刑政最舛者 : 成德, 傲吏也, 而以赃戍, 何以肃惩贪之令? 申绍芳, 十年监司也, 而以营 求成,何以昭抑竟之典?郑曼阝,虽久干乡议,而杖母之狱,乃以无告坐,何 以示敦伦之化?凡此数事,皆为故辅文震孟引绳批根,即向者驱除异己之故智 。群臣不敢言,皇上亦无从而知之也。呜呼!八年之间,谁秉国钧?臣于是不 能为首辅温体仁解矣。《语》曰: '谁生厉阶,至今为梗。'惟皇上念乱图存 , 进君子而退小人, 急罢三协津通之使, 责成中外诸臣, 各修职业, 毋再以邦 家为幸侥。体仁桑榆之收,庶几在此。"不报。

下左都御史唐世济于狱,吏部尚书谢■6A罢。北兵既退,群小复欲借边才以翻逆案,乌程主之,德州佐之。唐世济当先特疏荐霍维华。随一疏扬言于众曰: "若台省中有以逆案事见罪者,即先以此殪之!"台省果相顾不敢纠。乃疏进而上留不发,给事中荆可栋先上一疏,微微点缀以探之,乌程混票"该部知道。"已而,台省相继而进,乌程知不可掩,乃票旨:"逆案颁行已久,何

得妄希荐举?"于是给事中宋学显遂疏言:"霍维华昔曾极口袁崇焕之功,愿以己荫让之。夫崇焕负君误国,遗祸甚酷,岂堪维华再误?"兵科徐耀继之,谓:"维华推戴崇焕,不啻口出,即使不在逆案,亦当服连坐之条。况现奉皇上'逆案奉旨方新,居然荐用,成何政体'之旨,曾几何时,而世济以统宪大臣,藐旨蔑法,公行抗违,安望其正己率属乎?"末及德州,谓:"进退人才,冢臣职也。而徇人主使,温无主持将统均之谓何?"疏入,上大怒,遂下世济于狱。谢■64引罪,即准回籍。乌程袖手不效一臂矣。

是年正月,贼高迎祥、李万庆、张献忠等连营数十万攻滁州,南京太仆寺卿李觉斯、知州刘大巩督率士民固守,贼百道环攻,城上连发巨炮击贼,死者甚众。而卢象升援兵适至,副总兵祖宽以关辽健卒为前锋,象升以火攻三管为后劲,躬率麾下五百骑,居中督战。昧爽,至城下,贼方空营出掠,官兵至,不觉也。祖宽大呼直入,贼群起接战,战于城东五里桥,贼大败,象升麾诸军追之,北逐三十里,斩三千二百级。漕抚朱大典令参将杨世恩复截之于定远,斩三百余级。总兵刘良佐扼之于广武,贼遂西突池河。次日,贼自池河别道出东冈,守备刘光耀孤军格斗,力竭赴水死,一军皆没,贼袭其甲裳旗帜,渡河夺路而走,江浦总兵杜引域追之不及。五里桥之战,祖宽杀贼近万人,卢疑为平民,有无辜之叹。祖宽大怒,拉卢欲同往验,委是流贼与否。卢乃以巽语谢之,祖惟冷笑,终不释然也。一说:卢督兵剿贼,特招死士为冲锋陷阵之选,贼令奸细混入其中,对垒时,奸细内应缚卢,将献贼矣,中军李某救之得免。西走之贼,复陷凤阳。朱大典同总兵杨御蕃列营陵墙下,贼不敢攻,遂掠淮、远,陷之,朱大典摄兵至,贼焚庐舍北渡,陷灵璧,进逼泗州,祖宽再破之,东破宿州,突入沛县,焚戳妇竖,靡有孑遗,丁壮尽掠入营中。

贼迎祥,合扫地王、紫金梁等二十四营攻徐州,不克,遂西陷虞城,入河南。而曹操、一字王五营,由归德趋开封。总兵祖大乐潜师归德截其前,分兵设伏,而以轻兵诱之,遇贼于雪园。即接战,官军佯败,争先驰逐,大乐鸣鼓,麾东西两翼,突出攻贼,贼掠大乱,官军三面奋击,斩首四千二百余级。

二月, 江北贼陷潜山, 又陷太湖。

湖广贼九条龙、张胖子等攻竹山,知县黄应鹏弃城走,县有徵粮六百石,贼遂奄有之。食尽,焚县治而去,东掠南漳,陷谷城,西陷竹溪、房山,知保康空城不入。卢象升统诸将追贼至谷城,贼走郧阳。官兵三路并进,适大雾,贼不知兵至,仓卒接战,官兵逐之,大败,杀贼首黑煞神、飞山虎,追奔数十里。祖宽、李重镇先驰赴荆州,防其奔轶,秦翼明、杨世臣等搜山,祖大乐由光、邓夹击之,贼大溃,尽遁入万山中。

李自成出河南, 欲攻固始, 左良玉遇于阌乡, 相持六日, 总兵陈永福援之

- , 败之, 自成走登封。土贼廖三、袁世儒、李玉石等以牛酒相迎, 张乐大燕
- , 连夥入营。自成即令廖三等驻河南当官军, 而自率部贼走郧阳, 循南山险厄
- , 遵商雒而行, 复出延西, 官军败绩于罗家山。自成自邠州走延安, 而高迎祥
- 、蝎子块亦自兴安趋汉中。陕西巡抚甘学阔以纵贼削籍听勘,以孙传庭代之。

四月,贼过天星复叛于延安,而老多回多回、混十万等自汝、郧入商雒大岭。李自成欲往绥德渡河入山西,定边副总兵张天机力战却之。贼沿河犯朝邑,将围绥德,延安总兵俞冲霄引兵逐贼,恃捷轻进,陷贼伏中,冲霄被执,延绥精锐俱尽,贼遂陷绥德、米脂、延长。七月,高迎祥、蝎子块攻汉中不克,遂趋西安,秦抚孙传庭设伏于周至邀击,大破之,擒贼首高迎祥及刘哲等,献俘阙下,磔于市。蝎子块即刘哲,高迎祥即闯王也。是时,群贼夺气,潜迹郧阳山中,卢像方合大兵逐之。九月,以勤王率关辽之兵北去,老多回多回乃以全军合曹操、闯塌天诸贼,合二十余万,沿江长驱而下,蕲黄、安庆、江浦、六合,所在告警,烽火及于仪、扬矣。郧阳府治宋祖舜,追贼败绩,失其符印,削籍听勘,以苗胙土代之。未几,胙土复罢去,以陈良训代之。

十年丁丑正月,外计,浙江左布政姚承济贪污众著,兼以钱粮积欠,已列为民中。浙省诸绅温体仁、姜逢元、王业浩等五十余人,公疏保留,谓:"承济居身廉慎,剔弊清明,为从来方伯之冠。"有旨:下部议覆。覆上,准降级管事。后庚辰外计,姚贪声大著,计察为民。使皇上追论前次保荐之罪,不知体仁等何以置对?

二月,会试天下士,命大学士张至发、孔贞运为考试官,取中吴贞启等三百名。

下户部尚书侯恂于狱。劳永嘉之推登抚也,实辇金入兵科宋之普家,代为营干。德州复三过宋学显,谆谆戒以言路交章,而登抚另推。之普辈怀恨,未尝须臾忘也。至是,之普以马豆事参恂及学显。学显以科臣巡视,而恂则乌程所久侧目者。乌程票旨:以恂"徇私养奸,革职提问。学显以从未经手,免议。"之普与学显,同年同官,修私怨,悦当轴,不难用出弹章,人心叵测,亦已甚矣。左佥都宋鸣梧以之普参恂与学显也,终身以为大垢,遂谢归里。

三月, 廷试策士, 赐刘同升、陈之遴、赵士春等进士及第出身有差。

例转给事中宋学显为湖广副使,御史张盛美为河南右参议。抚宁侯朱国弼流言: "温体仁受霍维华厚贿,谋为出山,假令唐世济发其端。"又以言路之纠参为宋学显主使,密谕吏部,挤令外转。有旨: 责其"诬捏首辅,革职候俸。"

四月,改河南巡按张任学为河南总兵。任学觊得巡抚,且欲荐原任丹徒知县张文光,因极诋诸总兵不足恃,而盛称文吏中有奇材,可以御寇。上竟以总-61-

兵授之, 意大沮悔。

太仓民陆文声疏言: "风俗之弊,皆起于士子。"因参太仓庶吉士张溥、前任临川知县张采倡立复社以乱天下。有旨: "着提学御史倪元珙核奏。"既而,元珙回奏,极斥文声之妄,而申详者,苏松道冯元也。有旨: "元珙、元,着该部从重议处。"后部覆上,俱降三级调用。去岁,张汉儒疏参虞山,以致逮问,故一时谗小得意,告讦四起。先是,苏州推官周之夔以争军储事,与溥、采相忤,盖溥欲利尽归于太仓,而之夔欲公普之合郡,事本甚公甚正。后之夔密揭溥等于漕抚,并伤知州刘士斗,于是众议沸然,皆归罪于之夔,之夔与士斗俱不安其位以去。至是,之夔亦讦奏溥等树党挟持,则曲甚矣。

上命太监杨显名总理两淮盐课,显名抵任,查参前任巡盐张养、高钦舜各侵匿税额几十万。有旨:"逮问。"时养已卒,命籍其家。永平兵备刘景耀、关内兵备杨于国,各降三级管事。时总监太监高起潜行部,景耀、于国耻行属礼,俱上疏求罢。乌程票旨:"总监着照总督体统行事,申饬已久,景耀、于国徇私赡顾,殊属藐玩,姑着降三级管事。"以后监司皆俯首屈膝,莫敢争矣

七月, 工部员外方玺疏:

"皇上亲擒魏忠贤而手刃之,岂溺情奄竖者。止以外廷诸臣,无一可用 ,而借才及之。况人臣感恩图报,何论内外?每见廷臣处地悬绝,不若宫廷执 御,效忠倍易。凡此内臣徼兹旷典,孰不愿弃捐顶踵以酬皇上者,不必鳃鳃过 虑也!

给事中何楷参玺通内,呈身请重治示戒。有旨:"方玺降三级,调外任用。"

大学士温体仁罢。乌程衔恨虞山,必杀之而后快。常熟陈履谦,臣奸也,特为献谋,唆张汉儒参虞山,并及瞿式耜,并逮问下锦衣卫狱。虞山为老高阳门下士,托高阳公子求援于大珰曹化淳。化淳系王安名下,以虞山所撰王安碑文为证,曹珰览之泣下,乃尽力为营救。虞山又令密友冯舒求援于冯铨,连伺三日不得见。第四日二鼓,始命入堂中,冯方欲有所言,铨曰:"钱谦益的事,我都晓得了,如今已不妨,你可回去,教他安心。"即挥之去。冯次日入都,局面一变矣,虞山县辩疏,将前后被陷事情,宛曲点破。上阅之首肯,淄川票语颇恶,上尽行抹去,止批:"不得渎陈!"乌程谋始阻。陈履谦复献"诡赃出首"之计,先具一匿名揭,有虞山款曹击温等语,随令王藩出首云:"虞山赍四万金,托周应璧求款于曹珰。"曹珰觳觫无地,自请穷究其事。先是,卫帅董琨定招,以匿揭为根据,以王藩为确证,周应璧坚执不让,董琨逼勒成招,事颇昭著。而曹珰奉旨严究,大家搜访,备悉陈履谦父子奸状,遂

擒履谦父子到厂。次日,曹珰五更亲至外东厂审鞫,先后严讯,吊一吊,夹四夹,打二百,扛拶一日,招出张汉儒草疏,王藩出首,并伊父子捏造"款曹和温擒陈"六字,及改"和温"为"击温"等情,历历有据。凡领厂者,非重大事情,不亲审,不亲至外东厂。前年,厂役缉获逆犯董天王,赏银三十两,今缉获陈履谦,亦赏银三十两,则其郑重履谦可知已。前此首状中,引式耜弟瞿式谷初为陈履谦所愚,至是洞悉其奸,先后质对,语皆中款。曹珰温语谕之,令其尽言,无所驳问。于是逆案之谋翻,总宪之荐霍,与汉儒之疏,匿名之揭,王藩之首,俱出乌程一手握定,事状昭灼。狱上,虞山及式耜俱从宽送刑部拟罪,汉儒、履谦俱立枷一个月,而乌程允告之旨亦下。乌程每兴大狱,必称病以聚谋,谋定而后出。是时,修理湖州会馆,择日移居,上疏,邀宣谕之旨即出矣,淄川已票拟"宣谕,"御书大书三字云"放他去。"阁票有"人夫禄米。等项,御笔抹去。疏下,出其不意,方食失筋。长安中欢声雷动,虽妇人孺子皆举手相庆云。

乌程既去,复当枚卜,上点用绵竹刘宇亮、进贤傅冠、韩城薛国观。旨云:"着与辅臣张至发协同办事。"不称首辅。淄川有与善者,劝宜且称病。淄川沉吟久之,曰:"无奈贱体颇康。"昔宋蔡攸引其父京手作诊脉状,曰:"大人脉势舒缓,体中得无少倦乎?"京曰:"无有。"攸去,京语客曰:"此儿殆欲以疾罢我也。"淄川才智,万不堪京,作奴而不肯称病,则古今合辙矣。

山东民家垦地得数颗古凤印,有"明凤"年号,盖小明王时年号也。巡抚 颜继祖具疏以进,极尽谄谀,若与玉玺凤麟,同一呈瑞。识者预占为不祥,谓 分争从此起矣。

唐王之父为世子时,以世弟离间故,失爱于老唐王,郁郁以死。老王薨 ,唐王嗣位,即上疏列其冤。上遣大珰二人往唐府和解之。唐王所以媚二珰者 ,不遗余力。二珰甫出境,即悬父世子像,召两郡王至,数其罪,立棰杀之。 事闻,于法应赐自尽,以大珰左右之,发入高墙。宏光即位,乃得赦出。乙酉 ,清兵南下,唐王走福建,抚镇张肯堂、郑芝龙等拥立称帝,改元隆武。说者 谓既入高墙,似难复君临天下矣。

时当考选,行取各官俱鳞集都下。旧例止推敲台省,甲戌复增入词林,虽以官评为据,而营私者正自不少。时江南推毂建阳知县沈鼎科,而归县知县陆自岳必欲攘之,互相讦揭,陈启新疏论及之。奉旨:"着指名回话。"又旨下:"吏科取访册进览。"于是姜逢元、王业浩、孙晋等,皆以圈多,蒙旨诘责,有"何广知若此"之语,各降调有差。启新回奏,指泾县知县尹民兴、江都知县颜允绍,及同乡预定词林之陆自岳,部覆,三人俱降处。自岳即讦奏沈鼎-63-

科, 鼎科亦不得考选。吏部尚书田唯嘉乃请先推部属, 所共推二十三人, 皆孤立寡援者, 舆论哗然。诸受推者, 亦各怀不平, 惟成勇恬然无怨色。不数日, 竟辞朝赴南京吏部之任。识者共服其雅量云。

逮福建兴泉兵备曾樱。厂役缉事,缉得曾樱营升事状,有旨逮问。樱力辩 无此事,人役书礼皆伪也。既而漳泉副总兵郑芝龙疏:"曾樱廉明忠恕,龙感 佩其德,特代为之营升,而来役疏虞,致蒙圣谴,其实与樱无干,愿以官赎罪 。"有旨:"姑不究,曾樱仍还原职。"

是年正月,总兵秦翼明逐贼于麻城、黄冈间,败之。老犭回犭回、整齐王、张献忠等九营,分而为三:一走罗田,一走团风镇,一走蕲水。闯塌天等又分三路扰江北:一自桐城犯庐江、舒城,一自固水犯霍山、六合,一自颍州犯滁州,营火夜烛数十里。

李自成败官军于宝鸡,纵掠泾阳、三原等处,西安大震。

- 二月,左良玉大破贼于舒城、六安,三战三捷。秦翼明败闯塌天于细石岭,擒贼首一条葱、飞山虎。贼至英山,立营山巅,伐竹为筏,为渡江计。朱大典檄左良玉入山搜捕,良玉不应,屯舒城月余,大典三檄之,始自舒城进发,贼已饱掠出境矣。山西总兵王忠统兵剿贼,称疾数月不进,一军噪而归西
- ,总事中凌义渠劾之。有旨:"王忠逮问,左良玉革职,杀贼自赎!"

囯四月,以熊文灿总督五省,以常道之巡抚河南,以孙传庭兼河南总督。 时宣大总督杨嗣昌守制家居,上特起为兵部尚书。嗣昌具疏辞,不允,令以墨 纟襄从事。嗣昌举文灿为总督,而大发兵剿贼。户部苦于无饷,嗣昌建议:每 条银一两,加银三分,名"因粮纳饷。"共加赋二百万两,以济军需。下诏 :有"暂累吾民一年,除此心腹大患"等语。

十月,陕西贼过天星同李自成陷宁羌,混天王、革里眼等会之,分三道入四川:自成自七盘关度朝天阁,戊戌至广元,壬寅陷昭化,癸卯过剑阁,甲辰陷剑州,乙巳陷梓潼、黎、雅。参将罗尚文,大败混、革二贼于广元,斩首千余级,贼自梓潼复分为三:一走潼州,一趋绵州,一入江油,遂陷青州、彰明、盐亭等县,进围绵州。巡抚王维章次保宁,畏贼不敢出。丙辰,贼焚郫县,渐逼成都。事闻,维章革职听勘,以傅宗龙巡抚四川。

王维章所至以贪墨著,备兵西宁,以克削致激兵变,巴县力护之,举为川 抚,至公然形之揭奏,曰:"维章,臣畏友也,臣益友也"等语。及任四川 ,狼藉无比,至受番夷黄金四万两,擅将邛州界内地划以与之,合州士民,咸 愤不平,迄无敢以入告者。次年,杨编修廷麟召对,乃指及之,真开人不敢开 之口矣。

十一年戊寅二月,下刑部尚书郑三俊于狱。先是,冯英下狱,改用三俊

,适当侯恂屯豆一案,先有谗言,谓: "三俊与恂皆东林契友,必将屈法徇私。"上入其言。至是,狱上,果多为恂卸罪,上大怒,并三俊亦下狱。宣大总督卢象首先具疏称冤。卢昔为郑司官,素服其公忠廉慎者也,继卢者不下十余疏,而应天府丞徐石麟为最,略曰:

"郑三俊品重三朝,贤著四海。即使果有过误,犹望皇上优容老成,曲施赦宥。今拟议一不当,而『辱随之,将敬大臣之义何居?汉张释之为廷尉,不敢屈法以徇主意,文帝卒降心以相从,千古两贤之。谓非释之不能守朝廷之法,非文帝不能用释之之言。臣于是而叹臣工之不能仰体皇上也。皇上每事欲踵前哲,而臣工辄道以刻薄惨激之术;皇上每事欲臻盛治,而臣工辄佐以刑名击断之学;皇上每事欲崇礼义,而臣工辄肆其乘间抵隙之私"云云。阁票"回话,"发改;阁票"为民,"又发改;阁票"提问,"御笔批:"可将三俊罪状一一讲明,不必更处奏事官。"阁中乃票令旨以进,当晚即下。

礼部题"二月十七日皇太子出阁讲读。"侍班官四员:礼部尚书姜逢元、詹事姚明恭、少詹事王铎、屈可伸。讲读官六员:礼部侍郎方逢年、石谕德项煜、修撰刘理顺、编修吴伟业、杨廷麟、林增志。较书官二员:编修胡守恒、检讨杨士聪。侍书官二员:中书黄应恩、朱国诏。旧制:日讲官、东宫讲官无相兼者,恐皇上与东宫同日御讲筵,致相妨也。黄应恩既充正字,又充侍书,则以淄川从外入,不谙衙门规例。而士聪系辛未,增志系甲戌一辈,尤为错谬。临期,逢元罢去,侍郎顾锡畴代。

二月十二日,上御经筵毕,召礼部左侍郎顾锡畴等二十余人,问保举、考选,二者孰为得人。诸臣各以大意支吾。谕德黄景独以郑三俊下狱及朱天麟、成勇不得考选对。上细询良久,谕以三俊蒙询,有"徒清亦不济事"之语。至朱、成二人,则庶子李建泰而下,多同辞称其果屈。上命起序列有言者出奏,于是诸臣各陈所见,上亦随意答之。上又曰: "言须可用,如先年讲官姚希孟,欲将漕米改折一年,这个行得行不得?"编修杨廷麟对: "自温体仁之举唐世济,王应熊之举王维章,今二臣皆败,而体仁、应熊竟无恙,是连坐之法,先不行于大臣,而欲收保举之效,得乎?"上为之动色,久之无所言。项煜乃奏: "成勇不得考选,以任濬为阁臣张至发儿女亲家,前任濬列在第二,后以有议,以成勇易之,阁臣不欲勇独得考选,若曰得则俱得,失之俱失云尔。"上曰: "谁没有个儿女亲家,这也不在此。"至发奏: "请敕山东抚按勘验,臣与任濬结亲,或现在,或己亡,有一于此,治臣之罪。"上谕以不必与辩。对毕,诸臣出朝,吏部侦事者误传奏成、朱者为杨廷麟,田唯嘉恨甚。嗣是,转攻廷麟矣。次日,黄道周、黄景、杨士聪各有疏,景申言郑三俊事,道周疏亦及之,士聪则言考选事。而田唯嘉亦有疏,则直攻杨廷麟,内云:

"成勇、任濬,各为同乡所引科道。求科道,词林虽未预访单,而暗中皆为主持。臣一旦推之部属,安得不触诸臣之怒?至杨廷麟则尤有说焉:今考选推部之涂必泓,系麟同乡至戚保举。聂明楷,系麟同乡万谷春所保举。臣且参革,并谷春议降调矣。是以廷麟恨臣以保举考选为不平,而特借成勇、朱天麟为口实也。"奉旨:"接引主持,有何凭据?且原奏系黄景,何讹为杨廷麟?还通着明白回奏。"十六日,上御日讲,面谕黄景:"昨原切责郑三俊,岂是矜亮。"又谕俞煌:"昨召对,有姚希孟全折漕粮一年之说。"煌对曰:"行不得。""如何此疏竟隐不载?"时讲官张少詹四知出语人曰:"今日上怒甚。"说者谓三俊自此得释矣。十九日,上御门毕,谕百官数百言,内言:"郑三俊一案,屯豆墙穴,情弊显然,有何可疑?而欺罔委卸,巧为弥缝,屡奉批驳,法愈甚。但念别无赃贿,姑作回家听拟。"盖圣明本极受言,第不欲恩归于下耳。三俊以初九日下狱,风霾陡作,咫尺不辨。是日得释,微雨澄清。谁谓主心不上应天心耶?

杨士聪疏下,着指名回奏。于是,指陆自岳、张若麟、沈迅。盖自岳与沈 鼎科同在考选,自岳为陈启新指参降处。不甘鼎科独留,特出疏以倾之。若麟 与迅,则爱省中不爱词林者,盖当考选时,第一、第二当为词林,第三、第四 当为省中,第五、第六当为柱史。迅与若麟,列在三四,此正握定省中枢要也 。及任濬议处,乃舍第三之迅,而推第五之成勇,此其验也。

东宫讲读官项煜、杨廷麟各疏愿让少詹事黄道周,淄川具疏极排之,内云:"道周近疏,有'臣不如郑曼阝'之语,夫蔑伦杖母,明旨煌煌,曼阝何如人,而自谓不如,是可为元良辅导乎?"草此揭者,中书黄应恩也。先是,户部尚书冯英同时下狱,道周辞官疏内及侯、冯,因遍及用刑之未当者,郑曼阝特其一耳。疏中有"一日内执两尚书,"偶遗一"尚"字,有旨:"疏一日内执两书,敬慎何在?"迨后英竟以微罪得释,是上未尝不用其言也。给事中冯元上疏略曰:

"顷项煜、杨廷麟疏让黄道周,夫二臣系阁臣所选,不肯苟悦于阁臣。为阁臣者,宜深加赞叹,风劝百僚。而近日一揭,若大不快于其言者,并迁怒于道周,何也?若以道周建言为罪,则皇上已还其清秩数次,皆荷优容,天下万世,皆颂为主圣臣直,一大盛事。而阁臣反因此怒及道周,恐天下后世,以议阁臣之有得失矣。"

淄川又出辨揭,谓:"臣孤执,即有苟悦之臣,不能呈身于臣"云云,亦应恩代草也。既而复上《世风宜挽》一疏,屡数千百言,内云:"道周出山,缘爱母之心,借一言以周旋郑曼》,岂曰非孝?但不宜以朝廷是非,为一己环草之私!"又云:"有一二人焉,建坛坫,执牛耳,自命于人曰'吾将主持

世风。'己而,自命者与附之者,入主出奴,了不得其何缘何故。"末又请禁投刺往来,云:"自今士大夫门尽可罗,席尽可尘。夫人而能为言也,夫人而能为让也。"终推重于温体仁,称其"孤执不欺,窃愿学之"云云。此疏出江夏手。呜呼!江夏生平,于斯扫地矣。编修吴伟业具疏驳之,略曰:

"前事者,后事之师。今日辅臣之鉴,取之温体仁而足矣。体仁学无经术,则当讲求仁义,练习朝章!体仁性习险谀,则当矢志光明,立心公正!体仁狎匿宵人,则当严杜讠翕讠此之辈!体仁护持逆党,则当力继忠孝之经!庶几圣恩可副,舆望可塞。乃积习未化,近日辨揭,盛称体仁之美,曰'孤执,'曰'不欺,'夫体仁有唐世济、闵洪学、蔡弈琛、胡振缨、胡锺麟之徒,参赞密谋;有履谦、张汉儒、陆文声之徒,驱除异己。何谓'孤?'庇枢贰,则总督可不设,而事败乃设;庇凤抚,则镇可不移,而事败乃移。何谓'执?'皇上之决去体仁,谓其善欺耳。家窝巨盗,产遍苕溪,自诡曰'廉';孽子招权,匪人入幕,自诡曰'谨'。何谓'不欺'?辅臣真以为孤执不欺乎?若仍因私踵陋,尽袭前人所为,将公忠正直之风,何日得见?夷狄盗贼之风,何日得平也?"

适上御经筵,项煜面纠淄川庇至戚任濬而挤成勇。淄川再疏辨。有旨 : "着项煜回奏。"略曰:

"有问斯对而曰纷嚣,为国摘奸而曰排挤,至发至何处把持,则臣敢明白 指之曰:'考馆则把持于阁中,推补则把持于吏部。'"又云:

"臣孤冷自守,于考选何与?于任濬、成勇何预?向使经筵不召对,不问用人,诸臣不言及考选,则臣虽有区区之愚,何自而发?当日一堂都俞,梦想不到拜之语,一片肝膈,而至发乃谓臣为异同,为爱憎。如此欺罔,岂能逃圣明之炤烛哉?"疏语最切,第疏内指任濬与淄川次子联姻则未确,谓浚以银鞍马贿张孙振,斥为贪吏则太过。有旨:"着再奏。"而淄川入,出疏哓哓攻诋,全无大臣之度矣。项煜遂奉旨议处。

东宫出讲,黄充正字管诰敕撰文,又兼东宫侍讲,势不能相顾。凡传讲写讲,皆委之朱国诏。临时,国诏病,不能出,乃暗撰仪注,委之较书。淄川不详所以,遽为题请。士聪等诣阁,力辩其谬。即而项煜等撰完讲章,逢应恩,应恩复拒之云:"此杨、胡二公职掌。"士聪亦不平,具疏争之。发票,淄川即具揭随进,士聪遂不行。士聪乃尚书阁中极言其事。而应恩适以撰文事,特旨为民。撰文者,本兵杨嗣昌父杨鹤三边总督,以逮问遣戍。至是,宁夏叙功,奉旨:"复官给诰命。"旧例:赠恤诰命,皆中书撰文者为之,应恩为杨鹤撰文,极力洗雪。呈上,上涂抹发下,令查职名议处。淄川将具公揭申救。句容进曰:"去年许郎之事与此同,彼时未曾申救,今奈何救之?"盖前岁

许祭酒撰高忠宪公赠诰,为上所驳降处也。淄川愤曰: "难道阁中少得此人 ? 诸公不救,我自救之!"连进三揭,上终不允,御笔批云: "撰文官自注职 名,新经申饬,黄应恩供役阁中,首先违玩。人臣功罪,各不相掩蒙冤等语 ,视当日之处分为何如?黄应恩着革职为民。"杨嗣昌疏救亦不听。既而,大 理寺副曹筌疏参应恩纳贿等事。先是,四川富顺知县许国佐以参劾下部,应恩 受其千金,许为从轻票拟。适又有捃摭应恩事款一册,乘夜投于中书周国兴之 门。由是长安喧传,直达圣听。曹筌疏入,有旨: "着刑部提问。"

给事中王都疏参吏部尚书田唯嘉,略曰:

"冢臣之与逆党作缘,非自今日始也。当王永光借题边才,引用匪人之日,唯嘉争先应募,即荐杨维垣、贾继春二人,章光岳遂荐吕纯如、霍维华、傅魁、徐扬先、虞廷陛、叶天■6A六人。赖圣明独断,有'逆案奉旨方新,居然荐用,成何政体'之旨,而后群奸屏息。疏在御前,可覆案也。夫唐世济应喜臣荐一人而拿问,彼荐二人荐六人者,宜何居焉?"

疏入,次日,上召对阁臣及唯嘉,出疏示唯嘉,谕以"秉以尽职,不必与辩。"都前有疏参刑部侍郎章光岳、行人司副水佳允。盖光岳官通政时,建议:请于逆案中有枉者辩疏,许其封进。佳允官御史时,疏请吏部将逆案中不平者,一一明告。有旨:"吏部议覆。"唯嘉覆:"光岳致仕,佳允免议。"故都并参之。先是,德州去位,唯嘉以吏部侍郎内旨升吏部尚书,其势张甚。凡台省议及者,必以年例处之,若宋权、宋学显、凌义渠,皆其人也。都可谓履虎尾而不悔者矣。

田唯嘉疏参杨廷麟,奉有"明白具奏"之旨。而屡疏回奏,总无指实,上诘责不已。会项、杨各疏参淄川,遂以项、杨为接引,以河南掌道御史王万象为主持。又有《神谋权力》一疏,其云神谋权力者,一指李嗣京,为句容所托。一指涂必泓,为进贤所托。盖淄川在阁中,惟江夏欣附同臭,句容、进贤,多所不合。唯嘉知之,欲借此以领二人。二人大惧,唯嘉疏发票,淄川时待罪在寓,句容、进贤票拟: "项煜、杨士聪着议处。"复进密揭,言: "煜与士聪疏参首辅,有坏阁体,当如重处。"随使人传语于唯嘉,唯嘉大喜,再上回奏,疏"神谋权力,"即指项煜、士聪、万象三人。句容、进贤复票议处尚未进,而唯嘉前疏密揭,乞加重处者。御笔批: "面奏成勇不得馆选,乃黄景,今言杨士聪,是何缘故?项煜已有旨了!"长安喧传田太宰挟质挑战,两阁下望风投降者,即指此也。

士聪指名疏下,查沈迅等三人治行及考满缘由具奏。唯嘉将考满,开复,截俸日月,俱隐匿不载,止详载其各院考语。士聪随上《大臣蒙欺有据》一疏,内指唯嘉得周汝弼银八千两,升延绥巡抚,系大理寺丞史{范土}过付。又

参史{范土}巡按淮杨时,署巡盐事,侵匿课银二十一万两。有旨: "史{范土}、沈迅、张若麒,各着回话。"而唯嘉复上《尽职招诬》一疏,内云:

"士聪参史{范土},并及臣也,盖有由矣。史{范土}者,时局之所惩恶而不容者也。若麒与迅,皆为{范土}父母官。士聪恶史{范土},并及其父母官也,已久衔之。又见成勇被臣推部属,倘麒、迅及选科道,则恶其气味不投,必欲一网打尽以为快也。"

沈、张回奏,俱言:"士聪平日招摇局骗,至于考选大典,公然登垄,而招已惟守正听命,以致大触其怒"云云。而于开复考满日期,俱置不及。唯嘉又收陆自岳为助,自岳亦出疏参士聪羽翼沈鼎科为接引,指吏科叶高标为主持。高标,鼎科乡房师也。史{范土}回奏疏云:

"臣孤立寡俦,屡纠奸恶。今乃诬以关通阁部之线索,忆向年文某、姚希孟为词臣之雄,死者死矣。文某借虚名以入阁,入阁便行私。去后,复草疏稿,募成德代上。臣曾有'纶扉之线索一断,论议之风雨寂然'二语,有犯时忌。故士聪借考选之事,硬以'线索'二字,诬陷微臣也。"

具辩疏云:

"臣入仕以来,指佞如仇,奸党恨臣久矣。士聪曾受宋琮银万两,营谋馆选,又今特出圣明烛奸之疏,丢却考选,突以田唯嘉得周汝弼银八千两,滥推延抚,指臣过付。臣巡按淮扬,仅代盐差数月,便诬以侵匿盐课二十一万。优乞敕下九卿科道,将此疏会勘,令淮扬内臣杨显名及周汝弼各自面奏,则士聪之诬捏始露,而微臣之心迹得白矣!"

有旨: "俟卫招讯明定奏夺。"

史{范土}贪著淮扬,几与崔呈秀等,三尺童子能道之。其侵匿盐课,为延抚过付,俱自作之孽,于人何尤?乃无端辜及时局,又无端牵及先文肃、姚文毅何为乎?先文肃以请改正光庙《实录》一疏,荷蒙圣鉴,致此超拔,非关虚名也。大珰屈意求好,先文肃坚拒不应,是私行者否?必如乌程之谋翻逆案、巴县之力庇贪抚,方谓之不行私者乎?至成德应募之说,乃禹好善造此以取媚乌程耳。今乌程罢矣,复拾好善余唾,何为乎?虽百足之虫,至死不僵,终不能当圣明离明之照也。宋玫万金之说,尤属诬蔑。宋玫拟为出疏申辩,而踌躇未定。给谏之念重,虽其兄受诬于身后,勿遑恤矣。呜呼!

四月,吏部尚书田唯嘉罢。时士聪廉得唯嘉纳贿事款,复上《圣主神明烛弊》一疏。淄川见疏有事款,即密抄一通送唯嘉,俾预为辨地。不意唯嘉不待旨下,而遽上疏辨也。士聪乃上《臣疏预设甚奇》一疏,有旨: "着唯嘉回奏。"而前疏竟下锦衣卫提究,事既下部矣,唯嘉仍视大选自如。给事中吴麟徵上疏,略曰:

"今之进言者益难矣。为公正而发愤,动辄指为朋比。即自尽其职掌,亦借题以驱除。即如冢臣田唯嘉鬻官通贿,事下卫讯,供吐未尽,赃已累累。其奴与私人,方在对簿,而其主安坐朝堂视事,尤为三百年绝无之事。"

末云:"以真廉真谨之郑三俊,尚不免为法蒙谴。以极贪极横之田唯嘉,乃容其拔扈自如。"有旨:"冢臣以推遵视事,不得苛求。"盖淄川力为之地也。既而唯嘉回奏疏稿预泄缘由,称系写本人所送进。有旨:"既系写本人传送,何难稽查,着即指名速奏。"唯嘉再奏,乃称:"是早有人传呼门外云:'有人诬捏你主人事款,速速取去。'门役惊起开视,则其人不能久待,竟掷槛间而去。"嘻!直同儿戏矣。士聪复上《冢臣说谎面欺》一疏,有旨:"奏内事情,着田唯嘉据实回奏,不许一毫支饰取咎。"唯嘉窘极,乃疏请罢云:"士聪之意,欲攻陷臣,希图翻案,为推部请臣复谋考选,臣一日在部,其私心一日不遂,乞将臣解任听勘。"有旨:"田唯嘉准解任回籍。"

大学士张至发罢。上复御讲筵,诸臣于奉华殿门鹄立,上传"项煜方在议处,不准入班。"讲毕,复谢阁臣,俾项煜回奏。越两日,而淄川罢,煜亦降三级调外任。盖上将放淄川,不欲煜居其功,故有此传谕。而淄川之罢,则实以泄士聪之疏于唯嘉,颇忤圣意云。

士聪圣明烛奸疏既下卫,内指田唯嘉家人田少峰过付事甚夥。卫役初提颜裁缝等,唯嘉举家大惊,闻其奴有仰药自尽者,未知即少峰否也。然少峰究竟不出,而唯嘉之金珠已捆载入卫帅吴孟明家矣。已而卫招上,止招卢以岑升主事用银五百两,系田登弟过付于田敬宗,仍谓唯嘉初不知之。有旨: "提田登弟再审。"已而卫招照旧,止认卢以岑一事,且云: "并无田少峰其人。"奉旨: "原参事款多端,岂止卢以岑一件,可得听其狡饰?还着严讯确供具奏。"又卫招: "颜裁缝、徐大章供称周汝弼用银八千,滥推巡抚,系史{范土}事,非大章等经手。"止增招出武强知县傅蒙庥,差人持银三百三十两,三百送田尚书,三十众人分用。有旨: "唯嘉革职,蒙庥革任。原参六款,再严鞫确情具奏。"卫招再上,奉旨: "田登弟既系伊大子家人,五百多金,岂有仆役瓜分之理?吴孟明不从实根究,殊属法,着再降二级戴罪。田敬宗革了职提来。并周汝弼事情,严讯确供俱奉。"

田敬宗先选授都察院都事,至是提到,下卫审问,供让沈万春一事,得银六百两。其余如前招。有旨:"沈万春提问,敬宗再行严审奏。"盖上所重者,延抚事也。于是有称过付非史{范土}为张绍先者。给事中吴希哲遂具疏参绍先,要之绍先预其事,不止绍先一人,盖众人深为史{范土}出脱地耳。后卫招止仍旧,奉旨:"田敬宗等俱着送刑部拟罪具奏。"

四月十二日,上御经筵毕,复召对六部,本兵杨嗣昌奏,有"盈城盈野

- ,善战者服上刑"等语。上谕: "今天下一统,与孟子列国兵争时不同。今不过一属夷小丑,纵不能伸大司马九伐之威,奈何为是言耶?"随戒以今后勿复言。尔时上声色甚厉,嗣昌顿首认罪。后又言湖广巡抚余应桂用将官事。既退,嗣昌复上疏请罪,因言应桂前任御史曾参"臣父先国家之急而后私仇"等语。未几,而嗣昌援立,应桂逮问,其转移之机,甚密甚捷,人不得而测之也。时火星示变,皇上于宫中斋沐祈祷,素服减膳,并谕各衙门俱角素修省。杨嗣昌上疏,略曰:
- "臣闻月食五星,古今异变,史不绝书,然亦观其时势主德何如。今兹月食火星,在于前月己酉,纳音属主律,应中宫,然有阴阳之分:戊申阳宫,主帝座;己酉阴宫,主后妃。其时寅卯,适值熹庙成妃发引,内外文武百官,祭奠郊外,其所谓白衣之会,在宫已有,其应阴,无庸致疑,一也。当食之时,火星触月,在于上角,不在中,亦不在下,臣愚谨视明白,无庸致疑,二也。"

又云:

"臣稽于古,月食荧惑,不为大灾者,盖亦有之。在汉光武建武二十三年 丁未三月,月食火星,其年无事。明年,匈奴八部人立呼韩邪单于,款五原塞 事,下公卿议。议者皆以为不可许,五官中郎将耿国,独以为宜如孝宣故事 ,受之,以率属四夷。帝从之。明帝永平二年己未十二月,月食火星,频年无 事。皇后马氏,马援之女也,德冠后宫,尝衣大练。明帝图画功臣二十八将于 南宫云台,又益以王常、李通、窦融、卓茂三十二人,马援以椒房之亲,抑不 预焉。唐宪宗元和七年壬辰正月,月掩荧惑,其年田光以魏博来归,李绛推心 抚纳,结以大恩。宋太宗太平兴国三年戊寅七月,月掩荧,其明年,兴兵灭汉 ,车驾遂征契丹,连年兵败。宰相张齐贤上疏,以圣人举事,动出万全,必先 本后末,安内养外之说进。臣愚所闻如此。"

给事中何楷驳之,略曰:

"孔子作《春秋》,书灾异不书事,应其言天道则不可得而闻。今嗣昌缕缕援引,出何典据?如探其立言本意,则路人咸能指之矣。引汉武款塞故事,欲借以伸市赏之说也;引元和宣慰故事,欲借以伸招抚之说也;引太平兴国连年兵败故事,欲借以伸不敢用兵之说也。其附会诚巧。至于永平二年一条,所述皇后马氏等语,更不知其意,所指斥安在?"有旨:"枢臣不必深求。"

嗣昌辩疏云: "臣所引皆汉、唐信史,云台图画,独抑椒房之亲,乃汉世盛事,臣比类言之,而科臣以为指斥,岂其昨年圣谕:'勋戚不知厌足,纵贪暴于京畿'者,科臣独未之闻乎?"至于市赏、招抚、不敢用兵之说,则绝不

辩。盖上月召对善战上刑之说,其机括已阴转矣,故虚虚笼罩,支吾了事。至 "云台图画",诚不识其立意何居也。说者谓嗣昌爰立之枢要全在此,然其邀 圣眷者,不在此一疏,而所谓用心于奥之中者,可类推矣。

四月二十八日,上御中式门,策试考选各官,上自定三等:翰林、给事、御史,其余发部量授各官。朱天麟、曾就义等为翰林,王调鼎、涂必泓、李嗣京、任濬、张尔忠、高名衡等为给事中、御史。而沈迅、张若麒在散数,并授刑部主事。惟苏在先升苏州同知,成勇升南京吏部主事。俱己赴任,不及试复。涂必泓为成勇称屈,奉旨:"成勇改南京御史用。"

原任两淮巡盐张锡命男张沆疏"盐课存解甚明事。"内云:"臣父丁艰后,共贮库银二十一万两有奇,销归何处接管?按臣史{范土}并未尝为父代解,此二十一万两,销归何处?"疏入,阁中详拟一旨以进,及命下,所拟严核等语,俱行削去,止批:"该部知道。"就中机窍,人不能知也。后南京给事张芳进疏,补纠《寺臣贪污事》,内纠吏{范土}侵匿盐课二十一万两。又纠{范土}与中书汪机昼夜酣饮,女优侑酒,都无官体;临行,寄赃数十万。又纠{范土}知于承祖家赀钜万,乃因各讦,索银万金,意犹未足,承祖避之南京,抑郁而死,其子于道章可凭。又言:{范土}事发后,密使干仆赉金潜往书吏睢承吾之家,意图毁改簿籍,而末即以张沆原入附之。疏入,御笔批"史{范土}着革提。"寻奉旨具奏,"史{范土}盐弊多端,赃私狼藉,比匪揽利,大干法纪,与汪机俱着革了职,并睢承吾通着提解来京究问。"是时芳有二疏:一求改成勇为科,已奉旨议处。一即纠{范土}疏也。史{范土}提革之旨,特出宸裁。于是群情翕然,颂圣明独断云。

真定巡按李模,疏监臣贪肆非常事,曰:

"分守太监陈镇夷贪婪暴虐,官民寒心,谨昧死特陈其状:旧知识郭名扬,先往保定迎接,馈银三百两;一到任,即题充旗鼓,关通赂贿,倚为腹心。 凭听萧钱两主文,本章批判,尽出其手。凡揽受田产小词,尽批解究。奸徒得志,殷懦股栗。因关把总何起龙托旗鼓送银二百两,求管关税,每日抽黄钱二三十千不等。单身人过,亦索钱二十文,怨声载道。工食器用等项,不许科派里甲,非敕书所载乎?乃私用米豆,发牌行唐□等县买办,止各发银二百八十两,计各费过三百四十两,有赔解富户可问。建造衙宇,费过工料银五百余两,复行赵州等处摊派,有督工王省祭可查。营兵月饷,应问易州饷司支领,忽坐下真定州县本色豆三千石,草九万束,是额饷竟可混徵也。营兵每月饷银二两二钱,乃每名扣除四钱七钱不等。五营官总送衙内,至领兵上关,每名该行粮升半,正给一升,草每束折银四分入己,马多饿倒,以致兵士愤恨。槐树铺逃去马兵三百余名,镇城又逃去二百名,佯付不知,支粮如旧。至其纵兵为盗 也,任文秀跃马截劫于晋州,箭穿入骨,当经马保印等搜获赃钱。乃文秀不究 ,而赤马牵入私厩矣。王家远司二等行劫官路,当经刘均艾等人马连获,乃偏 听千总王道新曲禀,而捕役反马问徒罪矣。撞门劫杀贾永先家,则有赵标、庄 应伦等,将珠宝衣服对人夸张,而失主不敢告官矣。劫杀郝三九抛井,则有吕 世龙、于武众等,被尸亲认驴喊告,而问官不敢直指为兵矣。将官献馈,何一 不从扣克得来? 乃令郭旗鼓向每营将官索要三千两, 各先送过五百两, 独火功 营将王震仲素负气骨,不肯应承,终日提营中官役呵责,仍央郭旗鼓解说,送 银炉、银如意各一件, 罗缎潞绸各十疋, 马二匹, 骡一头。尚嫌不足, 又向龙 固营守备白之昆指查卖放捞河军人,要从重参处,央郭旗鼓送银四百两,俱从 东边小门, 交张掌收入, 合军皆知。更可异者, 查城上托张中军传意州县, 一 二等各要谢荐仪二百两。且关防何事,就中掠取?即藁城一县,勒送银壶二把 、金盘盏四副,而曲阳之牙绶,一网收尽,是为何体?恣意摧辱士类,以示威 风。举人阎东井缚来庭讯,生员赵必达径批黜退,甚且控冤之王相,嫡兄被兵 赵士采、王家士等劫杀有案,径行提问,贼兵收营,冤生下狱,颠倒戮士,是 为何法? 尤可讶者, 近日巩固营总练报升, 当夜二鼓, 令郭旗鼓向张德昌讲话 ,约定银三千两,题补前缺。次日,即与发本,是大帅可以货取之,一疏拔置 三将领,是枢部可以不设也。不亦废典制而辱剡章乎?至如纵放张家掌等横扰 驿递, 倍索乾折, 嗔怪井陉等县供应不周, 凌辱正印典史驿丞, 动责数十, 犹 具贪戾之余波已。若其接待有司,箕踞漫骂,稍不遂意,开口提参。逼致生日 馈献,银铸寿星炉爵杯盘及绣缎等件,充斥衙署,有各衙门小报可据。俨然自 称军门,而勒送礼物。嗟乎!皇上有何负于内臣,而敢举朝廷之礼法纲纪,将 士吏民,一旦凌夷暴殄至于此极也?"

奉旨: "司礼监查议具奏。"

时所遣内奄,在在播恶,不独一陈镇夷。第他处抚按,不敢直陈,惟模能据实入告耳。后镇夷访模在任,廉谨无可指摘,乃讦其与真定同知凌必正营私等情。事下真定抚按查核具奏,而彼此观望推诿者三载。至十四年,其事始结,横与必正,俱降三级调用。

六月十八日,上召对诸臣,出题考试。寻改杨嗣昌、程国祥俱礼部尚书 ,嗣昌仍管兵部事。升方逢年、蔡国用俱礼部尚书,范复粹礼部左侍郎,俱兼 东阁大学士,入阁办事。盖嗣昌上所最注意,而国祥以房号,国用以牙石,若 逢年、复粹,则其偶及者也。房号者,国祥时为户部尚书,建议借合京赁居一 季之租,及京直会馆守寓者,亦出修理若干,其初谓可得五十万。其后戚畹勋 臣巨珰,概从隐匿,所得仅十三万而已。牙石者,立列于崇文、宣武两大街之 中,以备驾出。而除道者,时培修外罗城,无从取石,国用时为工部侍郎,建 议用之,然用力甚艰,工费甚浩,得不偿失也。而二臣之受知皇上,则由于此。

武陵入阁到任,俨然绯袍,与江陵同。就者谓江陵者,藉口大婚,权从吉服。武陵则何说之辞,盖其心已死久矣。先文肃以四品少詹,超入政府,已属异数,后韩城以佥院,黄县以少卿,亦俱从四品超擢,尤足异云。始淄川以刑侍入,韩城以佥都入,说者谓廷尉中当亦有腾升而上者,盖三法司之验也。今黄县果以理少人,然徒伴食耳,无关轻重也。

时揆席既内外兼用,馆选又从知推考入。于是建议词林,亦得于别衙门升 用,故少詹绍贤升户部侍郎、倪祭酒元璐起兵部侍郎,仍兼侍读学士。

司礼监视政府,文书房视词林,词林向来司礼掌印秉笔。诸奄皆从文书房入,至今上而尽破旧规,更改旧章,此亦其一徵云。

●卷六

丙子, 清骑阑入, 洪承畴、卢象昇俱率师入援。事平, 即命承畴总督蓟保 ,象升总督宣大。至是,上念流贼交讧,从廷臣议,以承畴专任关外,升蓟抚 , 吴阿衡总督蓟保, 象升专任剿贼, 起升陈新甲总督宣大。新甲亦守制家居 ,武陵欲援以自解,会推时,即奉有"不拘在籍丁艰"之旨,而后推及之。少 詹事黄道周连上三疏: 其一言杨嗣昌不当夺情入阁。其一言宁锦巡抚方一藻抚 赏事,与上年俺答不同,不得援为口实。其一言不当又夺情用陈新甲于宣大 ,如无人肯往,臣愿任之。时七月乙巳,上召廷臣于平台,问道周曰:"朕闻 无所为而为者,谓之天理;有所为而为者,谓之人欲。尔前疏适当枚卜不用之 日,果无所为乎?"道周对曰:"天下止有义利,臣心为国家,不为功名,自 信其无所私。"上曰:"前月推陈新甲时,何不言?"道周对曰:"时科道何 楷、林兰友皆有疏,二臣臣同乡,恐涉嫌疑耳。"上曰:"今遂无嫌乎?"道 周对曰: "天下纲常,边疆大计,失今不言,后将无及。臣所惜者,纲常名教 ,非私也。"上曰:"清虽美德,不可仿,自是惟伯夷为圣之清,若小廉曲谨 ,是廉,非清也。"道周对曰:"伯夷忠孝两尽,故孔子许其仁。今杨嗣昌虽 有小才,然古者惟门庭之冠,不得已而以吉礼从金革,故有夺情之事。今用嗣 昌于本兵, 犹可藉口于金革; 近用嗣昌于政府, 则礼法之所不容。天下未有不 父其父而可称为子者,未有不能孝于亲,而能忠于君者。"嗣昌出班奏曰 : "臣非生于空桑,岂遂不知父母?臣尝再辞,而明旨迫切。道周学行人宗 , 臣实企仰之。近疏谓不如郑曼\\\ , 臣始太息绝望。郑曼\\\\ 杖母, 行同枭獍 ,道周既不如曼阝,何言纲常也?"道周曰:"臣言文章不如郑曼阝,非谓品 行。"上怒曰:"此皆是矫辞饰说,显是朋比。"道周对曰:"众恶必察,臣 何敢?"上曰:"孔子诛少正卯,当时亦称闻人,唯行辟而坚,言伪而辨,不 - 74 -

免孔子之诛。"道周对曰:"正印欺世盗名,臣无其心。今日不尽言,则臣负陛下;今日陛下杀臣,则陛下负臣。"上怒曰:"尔读书多年,补氏成佞耳。"道周对曰:"忠佞二字,臣不敢不辩。夫臣子在君父之前,独立敢言者为佞,岂在君父之前,谗谄面谀者为忠乎?忠佞不分,则邪正混淆,何以致治?"上怒甚,曰:"祖训:辩言乱政者当斩!"道周曰:"臣若有当斩之罪,愿就司寇,听陛下处分!"上曰:"原不专指佞,但辩言乱政者,按祖训当斩!"遂谕道周且退。上复面谕诸臣,今后慎毋党同伐异,各恪修职业。次日,复颁谕申饬。时修撰刘同升、赵士春合上疏论嗣昌夺情事,与道周俱下部议处。部覆降三级照旧。御札道周票轻处,同升、士春票重处。嗣昌惧上将复用道周者,急募人参之。于是张若麒应募,遂上《拥戴不效怨望纷然疏》入,同升、士春降三级,道周降六级,俱调外矣。后嗣昌借边警调若麒于兵部,盖酬之也。

丁丑鼎甲三人,刘、赵与陈之遴也。初上夺情疏,拟三人联名,之遴辞不预。次年,遴父祖苞以失事自尽,遴以犯属闲住,则何如列名之为愈也。南海辞列名,而得入纶扉,之遴辞列名,而终归罢斥。同一畏首畏尾,而幸不幸有如此者。

刑部主事张若麒《拥戴不效怨望纷然疏》, 略曰:

"顷者皇上忧轸时艰,不惮劳烦。召对之后,大布王言。谆谆然以正人心 息邪说,为治天下之大本原,举党同伐异之隐情,招权纳贿之狡术,无不见其 肺肝,直为道破。而辟邪一义,尤为千古之圣帝名王所未尝发,一时之端人正 士所不能言, 直如日月当天, 妖狐莫遁, 谓宜大家洗心, 以副明旨。何意诸臣 之藐旨,捏造奸言,归过皇上,而无天无地无父无君至此极也。以臣所闻,数 日以来,天谕既颁,群党藉藉,或掷抄传之邸报而怒视,或引不伦之远事而诋 议。通宵聚众, 信口讥排未已也。至有谓召对之日, 黄道周犯颜批鳞, 古今未 有,而皇上为之理屈者;至有谓道周坚求一死,而皇上左顾言他,始终无如何 者;至有议谕注洒,何故亦作对偶者;甚至有谓圣谕中邪说依经一段,不出圣 裁者。纷纷攘攘,日改月增。要使古今未有之好语,尽出自道周之口;凡可以 归过皇上者,无所不至。盖倡之者饬六艺以文奸言,假托道理以把持朝廷,以 显行其呼朋引类之计。于是, 记诵博者附之, 不博者亦附之, 甚至不辨菽麦、 墨汁全无者亦附之,兴为怙权纳贿之地。而特闻皇上下项门之针,遂大家喊叫 , 谓老魔之赤帜既拔, 山魈之秽态难藏。吓骗不灵, 溪壑无幸, 遂至泼口横加 ,毫无顾忌。倘不亟示前日召对之语,宣录刊传,与新颁圣谕,共为日星之揭 ,则背公死党,实繁有徒。或鼓煽以惑四方,私记以疑后世。致名朋串附势之 史臣, 徇私载笔。皇上正人心息邪说一段治天下之大经大法, 且为怨望者埋没

遮掩矣。伏乞皇上始终为世道人心计,深思远虑,速赐施行。虽备员末秩,亦 仰荷皇上生成之恩,何忍畏其凶锋,雷同不言也。"

宋林希点制诰,凡元礼右名臣贬点之制,皆极其丑诋。一日,草制罢,掷笔于地曰: "坏名节矣!"若麒此疏,何以异是?然使此疏出而总宪冢可以力致,尚断断不可,况区区一兵曹耶。小人枉做小人,千古同叹。

若麒与沈迅既授刑部,不与诸司官齿。本司缺郎中,员外某署印,奉差辞朝,送印于迅,迅大怒骂之,掷还其印。员外惧,泣诉于堂委别司署焉。若麒既出疏逐道周,嗣昌已许调兵部,久不得耗,乃亲诣职方郎中赵光抃促之。次日,诸臣毕集,揖嗣昌毕,光抃出班请曰: "本司现有缺员,闻得老先生要调二人来。"嗣昌佯惊曰: "那有此事?"光抃曰: "昨日其人亲到本司向郎中言,老先生要调他,并他同部姓沈者。四司官俱在,所共目击,可询也。"嗣昌色变曰: "这等我要参他!"光抃唯唯而退。

若麒、沈迅,既营求嗣昌,量调有日矣。适御史涂必泓疏言: "刑部所司者民命,而人往往厌薄之,是以十三司官,强半皆乡科任之,偶有一甲科,则辄调别部,岂司民命者当专用不肖乎?请自今著为令: 刑部官不许更调别部。"奉旨申饬。若麒愤无所泄,乃上《平赋役节驿递》一疏,谓"乡绅隐匿赋役,遗害小民,以致民穷为盗。"内有"乡绅豺虎"等语。驿递,谓裁削勘合,岁可得百五十万银两。有旨: "本内'乡绅豺虎'等语,着据实回奏。"若麒回奏,指庄应会、范良彦、袁宏勋。范、袁皆地方所最切齿,而宏勋尤护持逆党者。有旨: "俱行抚按逮问。"初,麒之出疏也,专为同乡侍郎高宏图而发,及回奏,即拟宏图以入告。或语以宏图立朝大节,忤珰去位,万万不可指及。麒不得已,乃指应会三人。然麒之为此,实激于必泓之疏。必泓与杨廷麟,同乡同年。咸谓涂疏杨实使之,后张、沈与嗣昌比加修怨廷麟者,祸亦烈矣。

武清侯李诚铭,慈圣内家也。上在信邸时,以缓急开罪,后借事绳之以法不少贷。诚铭卒,其子不准承袭,房产俱行入官内。一女字嘉定伯周奎之孙,嘉定请命于后,后谕云:"人当患难,自无绝婚之理,可具小轿,但取此女妇,外慎毋夹带。"诸戚畹合辞申请不允。后悼灵王临危,亲见慈圣于宫中,上大悔悟,即准其子袭爵,房产、禄米仍旧颁给焉。

上初年崇奉天主教。上海,教中人也。即入政府,力进天主之说,将宫内俱养诸铜佛像尽行毁碎。至是,悼灵王病笃,上临视之,王指九莲华娘娘现立空中,历数毁坏三宝之罪及苛求武清云云。言讫而薨。上大惊惧,极力挽回,亦无及矣。时阁臣皆从外入,素不谙文义,上既痛悔前事,特颁谕内外,有"但愿佛天祖宗知,不愿人知也"等句,几不成皇言矣。"宰相须用读书人。

"初年上曾举以讽诸阁臣者,可胜三叹。

京师天主教,有二西人主之,南怀仁、汤若望也。凡皈依其教者,先问汝家有魔鬼否,有则取以来。魔鬼,即佛也。天主殿前有青石幢一,大石池一,其党取佛像至,即于幢上撞碎佛头及手足,掷弃池中,候聚集众多,然后设斋邀诸徒党,架炉鼓火,将诸佛像尽行熔化,率以为常。某年六月初一日,复建此会,方日正中,碧空无纤云,适当举火,众共耸视,忽大雷一声,将池中佛像及诸炉炭尽行摄去,池内若扫,不留微尘。众皆汗流浃背,咸合掌西跪,念阿弥陀佛。自是遂绝此会。

史{范土}疏党类陷臣已极事,内辩周汝弼营升延绥巡抚,系太常寺卿许世 荩说情。奉旨:"史{范土}方在究问,何得渎陈?奏内说情缘由,还着许世荩、田唯嘉据实具奏,不许游移支饰。"先是,史{范土}得提问之报,随即赴京,潜入韩城邸中,连住三日,乃始投部上此疏。后世荩回奏,隐约其辞,但引陕西巡按王俊相对之言为证。有旨:"着王俊实奏。"及俊回奏,则事已结案久矣,遂奉"姑不究"之旨。然世荩实未尝说情也。

史{范土}下狱后,又上《直发朋党奸贪之状疏》,内云:"盐课现经内臣 杨显名彻底清查之后,割没清楚,足见臣之心迹。而杨士聪之诬捏陷臣,亦昭 然矣。"又云:"张焜芳,乃内阁中书张炳芳之兄也。向来旨意露泄,皆炳芳 为之,即焜芳参臣及内臣杨显名,亦恃奥援有人,布置关通,有炳芳在耳。"又言:"炳芳弟炜芳,以长史谋升同知,包揽知县虞国镇考选,骗银一万三千两,托余伯和送与科臣冯元飚八千两,令其把持台省。余银入己三千,伯和二千"等云。疏上,数发改票后,拟"元飚、士聪俱革任,炜芳、炳芳俱革任 提问。"复发再票,御笔批云:"此案不欲牵累。"乃止票"炳芳俱革职候讯,伯和提问。"此疏实出黄应恩。应恩素与炳芳有嫌,而"较书"一事,又与士聪有隙,故构造此疏以相陷也。后士聪上《军兴需饷正殷疏》,有旨:"史{范土}事情,该部速审具奏,杨士聪不许再渎"。士聪再疏,遂奉"不得更端求胜"之旨。盖史{范土}之布置已周,圣意亦潜移矣。

时史{范土} 既恃内援,复有韩城主之于外,狱中连上疏催审,且请将杨士聪、张焜芳令该部提去,与伊面质。而淮盐运使徐大仪与史{范土} 同年相好,自奉行查之旨,已先谕吏书,竭力弥缝,不待{范土} 干仆之来也。惟交际六万两,则不得而掩。内监杨显名回奏,事事出脱。至交际一项,则云: "臣不能为讳。"以故{范土} 久稽狱中不得出,竟愤恨以死。迨{范土} 死而事败,则实天为之也。

刑部上黄应恩招,奉旨:"黄应恩哆口招摇,实有事款,何得听其支饰尽为开豁?该司官殊属纵徇,着将回话来,仍一面严讯确拟具奏"。先是,应恩

下部,党羽甚盛,部招摇诸款,概不敢入,止引泄一品语律,致奉此旨。司官再问,不得不入事款及赃。应恩突出疏参之,司官大惧,乃上疏乞敕三法司会问。夫以罪犯而参司官,与史{范土}请题杨士聪、张焜芳到部面质,事虽不行,而两人之虎视狱中可知矣。后再拟上,有旨:"黄应恩发附近卫所充军终身。"

刑部上田敬宗招,奉旨: "周汝弼推抚情由,竟未讯明,但凭饰抵;傅蒙庥卫招已实,又听改口展辩。且田敬宗等违法滥受多赃,仅拟配徒。骫纵殊甚,通着研讯确拟具奏!"及再上拟: "田敬宗附近、田登第等边卫各充军终身,赃追充饷。"有旨: "依拟。"

十月,清骑入犯蓟,昌,总督吴阿衡与镇守太监郑希诏称寿,已报清人入口矣,犹坚留与郑公饮百杯,取百筹之庆。饮毕,醉不能师,遂死于乱军中。北兵尽入。枢辅杨嗣昌上《四事机宜疏》:"请于卿士科道等官,不拘常格,推补臣部左右侍郎,其久推不至者,候其到日,于别衙填补。"末云:"职方一司,纹冗已极,特设协理员外,分任其劳。而余爵莅任无期,请以武选主事孙嘉绩升补。而武选车驾主事漆嘉祉等音讯杳然,请敕下吏部,遴选别部有才望者,速行调补。"次日,吏部题补沈迅调武选、张若麒调车驾。而所云久推不至者,吴莘、惠世扬也。

十一月初八日,召对,初无词林,而词林毕集,有内奄奏之,乃俱召入。给事中范淑泰奏: "今于临城,尚无定议,不知是要款要战?"上曰: "那个要款?"淑泰奏: "外边皆有此议论。"泰又奏: "凡涉边事,邸报一概不敢抄传,满城人皆以边事为讳。"上曰: "凡关系机密的不许抄传,若行间塘报,如何一概不许抄传?"盖是时,武陵私谋款局,实并塘报一切禁止,自是长安始敢言边事矣。是日召对,意在忧饷。大理寺丞戈允礼倡言借贷,欲括城中富人金钱。淑泰奏: "兵事要在行法,今法不行而忧饷,即天雨粟、地涌金,何益于事?"上曰: "朝廷何尝不欲行。"而微窥圣意,若有所踌躇而不能决者。先是,杨廷麟疏论武陵及高起潜,武陵特题改兵部,前往卢象昇军前赞画。是自己谢恩辞朝,故不预。而款市之议,武陵力请于上,上许之矣。武陵特遣使入□营,竟得嫚书,乃止。

时各道勤王兵至,宣大总督卢象昇至都城下,与武陵昌言朝端邪正不分 ,寇虏何时得靖。且云: "权臣在内,边臣岂能成功?"武陵云: "若如此说 ,老先生尚方剑,当先从学生用起。"不乐而罢。时清兵越都城西掠,破高阳 ,旧枢辅孙承宗合门死难。破吴桥县,知县刘业嵘迎降,遂南掠至山东,象升 南下,逐之。坐营副总兵李某请卢札营于李家口,戒慎毋动,动必败,清兵非 流贼比也。而李自帅师逆清兵,已奏捷矣。卢闻捷,遽勒兵而前,遇清兵于贾 村,全军陷没。事闻,上以督臣陈亡,坐营不行策应,逮问论斩。边将祖宽,素以憨直得罪当事,与李俱逮问大辟,人咸冤之。武陵题杨廷麟之赞画也,实欲假手于清兵杀卢。未出师之前,遣廷麟至真定,与陕抚孙传庭议事,不及于难。及败衄报至,武陵首先问曰:"杨翰林死未?"报者止知赞画,不知翰林为谁,武陵乃再问曰:"杨赞画死未?"报者答以"已先奉差,不在营中。"武陵为不豫者久之。呜呼!此即曹瞒杀祢衡之故智,究竟廷麟不死于陈,而武陵竟死于贼,孰谓无天道乎?

时畿内州县,清兵所至辄陷,兵部主事沈迅上疏条陈边务,一云: "州县 无重臣弹压,故清兵所至不能堵御,请与定州、蠡县、广平、河间,各添设兵 备一员。"一云: "以天下僧人,配天下尼姑,编入里甲,三丁抽一,朝夕训 练,可得精兵数十万。"其余条陈,别事甚多。武陵具覆,盛称迅言之可用非 止一端。而畿南添设兵备,尤为救时硕画,且请改迅科员用。有旨: "沈迅作 改兵科给事中,作速到任管事。"盖迅时结大珰卞希孔为奥援,故武陵应之于 外如桴鼓,遂取特旨如寄。

沈迅授科后,即疏荐张缙彦等为兵科都给事中。奉旨: "张缙彦着改任。" 先是,姚思孝既斥,屡推未用,部议耀,复不果。至是,迅荐五人,首缙彦,次任濬、黄奇遇、涂必泓、张若麒,而所重者,若麒也。其荐语有云: "廉则真廉,敏则真敏。"又云: "其所上平赋役、节驿递二疏,皆能言人所不能言"云云。而不意上竟点用缙彦也。缙彦到任,既疏恭武陵,又因召对及之。武陵语人曰: "沈宙泉到底还不老成,如此看来,不若从部议用徐蓼莪,或能相为,也不见得。" 夫朝廷用一人,一手握定,惟意所欲与,既与而又悔之,武陵之横至此哉!

是年正月,张献忠假官军旗号,暗袭南阳,屯于南关,左良玉适至北关,疑之,使人召之,献忠窘,逸去。良玉追及之,两马相望,一箭中其肩,一箭中其指于弓靶,献忠仓惶,良玉举刀劈其面,血流被甲。部下孙可望直前大斗,献忠乃得脱逃至麻城。良玉进剿,献两日夜驰七百里,至谷城,营于王家河,夜袭谷城,破之。出示安民云:"本营志在匡乱,已逐闯兵远遁。本营今释甲归朝,尔百姓无恐!"遂拘耆老具揭。遣孙可望重贿熊文灿,内有西碧玉二方,长尺余,又径寸珠二枚。文灿遂一力担当抚之。献忠所部,不满万人,乞饷十万人,又乞襄阳府屯军,文灿迁延不能应,献忠遂据守谷城,分屯群盗于四郊。二月,左良玉至襄阳,与巡按林鸣琳、巡道王瑞梅欲诱献忠来见,杀之,文灿曰:"杀降不祥。"力持不可。献忠恃文灿为援,益无忌。谷城诸生徐以显,一见如故,教以孙吴兵法,私练士卒,铸造兵器。虽妇皆知其必反。

二月,李自成陷苍溪。时川中诸道兵严守险要,贼坐困乏食,贺人龙以弱卒诱,而设伏于梓潼。自成逐弱卒,卒走,伏发,杀贼数千级,几歼之。自成率残贼走溪南,拟入湖广依张献忠,不许。至竹溪,献忠谋杀之,自成独乘骡驰百里,走商雒,至淅川老犭回犭回营,卧疾半年余,老犭回犭回授以数百人,仍然入陕西剽掠。

六月, 逮湖广巡抚俞应桂, 以方孔炤代之, 以戴东抚治郧阳。

八月,贼曹操会群贼过天星、托天王、整齐王、小秦王、混世五、整十万、革里眼于陕州,遂南走内乡、淅川、犯襄阳。九月,熊文灿遣副总兵龙在田等邀击革里眼、射塌天于双沟,大败之。老犭回犭回等俱东走枣阳,官军追逐数十里,斩首六千余级,群贼披靡四窜,独曹操仍留内、淅山中。十月,陕西巡抚孙传庭帅师入卫,诸将先后出潼关。曹操谓为剿己也,走均州,叩太和山提督太监李维政乞抚。维政为言于文灿,文灿乃檄止诸军,曹操九营皆就抚。文灿为具疏请贷其罪,令诸将宴之于迎恩寺,授官游击将军,供亿甚备。曹操者,罗汝才也。汝才既受抚,分屯群贼于房、竹诸县,文灿令散胁从诸众,简选骁壮,从征立功。汝才不听,自言不愿受署为官,并不愿食饷,愿为百姓耕种。文灿一切羁縻之,与张献忠遥为声援,夺民禾而食,不奉县官治。

十二年己卯正月,清兵陷济州,德王遇害。巡按宋学朱,布按道府张秉文 、翁鸿业、荀好善,推官陆灿等,或死或逃。报至,举朝震恐。先是,沈迅条 陈,有"东抚不许离德州一步"之语,张若麒力持职方司,为之案呈,武陵即 据具覆。东抚颜继祖认定信地,佥谓清兵无越德而南之理。至是,清兵由东昌 而东南渡河, 破恩县、夏津, 直趋济南。济南精兵既尽在德州, 城中无备, 当 事又无方略,民溃,遂陷。德州闻省城陷,兵心个匡扰,鼓噪挟饷,几至大变 。继祖惧,即以数千金塞其望,而兵遂不可用。继祖具疏待罪,申言原派"不 许离德"之语。武陵特出疏力排其说。清兵退,继祖与顺天巡抚陈祖苞、保定 巡抚张其平、总兵祖宽、太监邓希诏, 俱逮下狱; 大学士刘宇亮罢。时清兵纵 横燕、齐间,宇亮自请督师,与陈新甲并辔而南,各镇勤王兵皆属焉。时将卒 皆视清兵所向以为趋避,惟蹂践居民以为事。绵竹至安平,侦者报清兵大至 ,上下相顾无人色,相拟即趋晋州以避之。知州陈宏绪坚闭城门不听入,而城 中士民,亦歃血而誓,不得延入一兵。绵竹大怒,传令箭: "急开门以纳师 ,否者以军法从事!"宏绪复语:"督师之来,欲剿清兵也,今清兵且至,正 督师建功之会, 奈何急欲人城? 若刍粮不继, 州官罪也; 若欲入城, 不敢听命 !"绵竹遂疏劾之,有旨:"逮问。"晋州士民,诣阙讼冤,愿以身代州官 , 死者千余人, 宏绪乃得轻降四级调用。上始疑绵竹不能御众, 徒扰民矣。 时行间大帅,俱尾清兵之后,不敢击亦不能击,绵竹具疏言之,其末带参

刘光祚。韩城与武陵谋,欲因此事去绵竹,乃票光祚:"军前正法。"旨到之日,诸大帅俱分道前去,并光祚亦不在军前。况绵竹之参光祚者,原不至死,适会有武清之捷,绵竹乃置光祚于武清县狱而复请之,并上武清捷音,于是奉旨:"倏奏倏叙,殊属乖藐,着九卿科道看议。"绵竹具疏引罪,言:"乖则乖矣,藐则万万不敢。"盖两人明知圣旨往还之间,必致参差,必不能正法,而逐绵竹,知计行矣。部覆:"绵竹冠带闲住。"陈启新言:"看重议轻。"沈迅言:"明旨森严,考功之发未尽。"于是部议"革职为民。"韩城票旨,仍候事平另议。嗟乎,此案韩城与武陵主谋,排挤构陷甚巧,故明旨止言"看议"。而加以议处,附之者犹以为未足也。启新不足道,彼沈迅者,由武陵荐用,而显然出力为武陵排斥异己,诚不识世间廉耻为何物矣。究之五案定而绵竹奉旨免议,上亦知其无大罪也。彼韩城者,独何心哉?

上传任丘、清苑、涞水、迁安、大城、定兴县知县白慧元等"贪酷纵肆,俱着革职提问。抚按官不行纠劾,溺职殊甚,近畿如此,远地可知,着部院申饬。"

慧元令任丘, 珰某, 任丘人也, 邀慧元饮酒半, 尽陈诸宝玩以供鉴赏。慧元曰: "我有至宝, 大异于是!"珰问何宝, 慧元笑不应, 珰固问之, 慧元曰: "我腰下有至宝耳。"珰默然,遂罗织其事款入告。又虑人议其修私怨也, 并罗及清苑等县。慧元罢, 而新知县李仲熊即莅任。清兵攻任丘, 慧元善骑射, 协同仲熊固守, 城陷, 俱死之。

山东巡抚缺,东省诸人,公讨泰州兵备郑二阳。盖二阳于流贼南犯时,城守盖劳者也。往例:本省抚道缺,本省乡绅向部公讨。此相沿旧习,间亦有为私者。至是,沈迅独纠太仆寺少卿王万象私讨巡抚,以修旧怨,遂奉把持乱政之旨。万象大惧,回话之辞甚逊,然实无私讨情弊。乃得旨:"冠带闲住。"而沈势益张。后迅与若麒共言于吏部,用永平兵备刘景曜巡抚山东。自是山东诸事,皆由二人握定矣。若麒又引其兄若獬为吏部,而以假咨离任。事败,则又谋事在人,成事在天也。

文武官品服色,祖制既定,奉行已久,惟是武弁概服狮子。上至是重行申饬:"武弁三四品,俱照制服虎豹。"至内奄从无定式,盖直摈之洒扫服役之末,祖制良有深意。虽太监极品,止于正四品,间有赐蟒玉者,亦后来之滥觞,非祖制也。至是,上命取《山海经》以进,采取各种兽名,另定服色,以天录为极品。说者谓天子左右,环列异兽,盖不祥也。

上又将内库历朝诸铜器,尽发宝源局铸钱。内有三代及宣德年间物,制造精巧绝伦,商人不忍旧器毁弃,每称千斤愿纳铜二千斤。监督主事某不可,谓:"古器虽毁弃可惜,我何敢私为轻重?"商人谓:"宣铜下炉,尚存其质

,至三代间物,则质清轻之极,下炉后,惟有青烟一缕尔,此则谁让其咎 ?"监督谓:"圣性猜疑甚重,若如公言,必增圣疑,如三代物不便下炉,则 有监督内官,公同验视,罪不在我。"于是古器毁弃殆尽。

凡遇新天子嗣位,另造琴百张,每张价五百金,此相沿旧例,其事则御用监司之。真金徽玉轸也,然有音无文。至今,上以无文为嫌,欲更制琴曲,而莫有能应者。从父适以谒选入都,中书杨崇善系长洲籍,称同乡,即邀至其家,为制谱以进。韵义咸备,上阅之称善,从父已就选州二矣。奉旨:"文震亨着改授中书舍人,武英殿供事。"

上御极后,周皇后正位中宫,复选东宫田妃、西宫袁妃,而田最有宠,其父田宏遇亦最横,后父周奎次之,袁父则兢兢自守,不预外事。上每戒谕外戚,必三人同召。一日,复召,袁语二人:"学生不敏,奉陪多次矣。今后还求两先生包容,免赐提挈。"周、田不能应,皆有惭色。

珰某与小襄城及秀水诸人善, 珰有母称寿, 秀水拉诸同人往贺。甫登其堂, 则珰母已巍然端坐, 珰侍其旁, 曰: "太太年老, 不能行礼, 小弟代为答拜。"即先下拜。秀水辈相顾错锷, 不得已, 顿首再拜而起。呜呼! 比之匪人, 不亦伤乎? 守孰为大? 守身为大! 虽一举足间, 可不慎乎? 特书之以为戒。

七月,戮失事诸臣于市:保定巡抚张其平、山东巡抚颜继祖、总兵祖宽。 太监邓希诏,临刑肆口讪上,极其无状,闻者咸为发指。而顺天巡抚陈祖苞 ,预服毒自尽狱中。恩县知县王应元等,亦以失守被刑,刘业嵘以迎降故,诏 "谋叛律,决不待时。"妻子入官为奴,家产籍没,父母兄弟流二千里安置。 而祖苞子编修之遴、继祖弟监事光祖,俱以犯属罢斥。先是,颜抵东抚任后 ,连疏参劾前抚李懋芳,至于逮问,众论咸不直之。至是,以失事服法,所谓 还中以机者乎?

清兵既退,升陕西巡抚孙传庭为蓟保总督。传庭佯称耳聋,不能任事。有旨,责其托病规卸,逮系下狱。顺天巡抚杨一隽,以抚同欺隐,亦被逮。

时绵竹、进贤相继罢去,复当枚卜,上点用黄冈姚明恭、费县张四知、滑 县魏炤乘三人,俱入阁办事。

八月,庶吉士郑曼阝凌迟处死。先是,郑曼阝下狱,卫帅吴孟明谓:"按律,忤逆惟父母告乃坐。今曼阝父母皆亡,其事又远在数十年之前,不可究竟。"乌程乃以特授科道为饵,如陈启新例。于是同里中书许景应募上疏,证其杖母,并及奸妹、奸媳等事。有严旨切责:"吴孟明不能治狱,着革任回卫。"至是狱具,遂磔于市。科道各官,以不行纠发,一概议处,俱降级有差。孟明奉谴后,上疏言:"郑曼阝世远人亡,皇上必欲立置重典以风示天下。近常州有钱霖父子戕杀之事,远近骇闻,许景既仗义发愤,何舍目前之钱霖,而追

已往之郑曼阝?"有旨:"逮钱霖同其子尚宾,赴京验审。"盖尚宾以祖尚书春荫官应天通判,霖系庚子举人,相争一侍女,遂挥刀刺其父,中腋,业已输重贿求和矣。而刀痕俨然,无计可掩。逮至中途,止德州宿,假寓草庵,夜半,纵火焚其庵,预藏一尸于灰烬中,遂以尚宾失火被焚,朦胧入告。旨下:"地方官查明。"武进知县马嘉植以入觐行,知府陈申结,称"尚宾委系焚死"复奏。而尚宾竟逃入太湖中,马嘉植物色得之。因尚宾家奴,归取盘费,遂执其奴为导引,掩而取之,申解抚按,转详法司:"尚宾决不待时,钱霖造戍,陈1为民。"然马之为此,亦非能仗义也。向以刻薄残忍,见讥于陈,故为此举以倾陈而泄私恨也。陈为壬戌进士,筮仕合肥知县,崔呈秀巡按淮扬时,首荐。呈秀败,陈投诚至戚蔡弈琛,得以考察薄罚,历升今官,与马不相能。马在任,唯趋事要津,视监司部郎蔑如也。曾以事处乡绅邹忠允过当,朱大典,邹门人也,适来督抚凤阳,邹持往控诉,朱为具疏参马。马知之,急挽许鼎臣求解。许曾巡抚山西,朱其属吏也。许竭力调停,事得中寝。未几,许弃世,遗孤幼弱,马视之如陌路。陈以此薄其为人,每以刻薄残忍目之。马故恨之刺骨云。

中书朱绅,相国国桢子也。昆山朱大受,为湖州知府,与绅相恶,绅特疏参之。众议以乡绅参地方官,不可为训。且绅又任子,咸不直之。绅又不达,连章叠上第四疏,奉旨:"廷杖。"遂毙杖下。

上之初即位也,编修江鼎镇疏参顺庆知府杨呈秀,有旨:"革职提问。"鼎镇,四川南衮人,为杨部民,众论亦不与之。己巳内计,鼎镇例转福建右参议。

岁底,上于宫中符召天将。宫中每年或召仙,或召将,叩以来岁事,无弗应者。以前一召即至,至是,召久之不至。良久,帝下临,乩批云: "天将皆已降生人间,无可应召者。"上再拜叩问: "天将降生,意欲何为?尚有未降生者否?"乩批云: "惟汉寿亭侯受明深恩,不肯下降,余无在者。"批毕,寂然,再叩不应矣。

各省俱有督粮道,江南则以兵备兼理。崇祯元年冬,崇明营兵缺粮,知府 王时和勒措不发,遂鼓噪,巡抚曹文衡查"为首者处死。"时和劾罢。因请于 朝,欲特设一道臣,专理四府钱粮,如布政事例。吏部不达其意,题:"准设 四府督粮道专理漕粮,既非具疏本意,而增一官,即增种种费,徒勒民耳。"

时流贼充斥蕲、黄间,应抚当移镇安庆,以防侵轶。四府缙绅又谓:"江南重地,不可无大臣弹压。"于是部题:"添设安庆巡抚,以安庆兵备史可法为之。复设偏沅巡抚,以河南布政陈睿谟为之。"是年二月,左良玉大败河南贼飞山虎、刘国能于许州,国能降。老犭回犭回既东奔,复纠革里眼、射塌天-83-

等合于混十万,分掠信阳、光山间。河南巡抚常道立削籍,以李仙风代之,逮总兵张任学。辛卯,左良玉击射塌天、老犭回犭回、混十万于河南之镇平城,大破之,射塌天乞抚,仍连营百里,夺民二麦以自给。良玉遣人谕止之,不听。戊申,良玉率副将陈永福、金声桓等压贼垒而军,贼仓卒接战。官兵奋击,斩首二千七百,贼退保山、陕,良玉遣降将刘国能招之。庚戌,射塌天率其众四千诣内乡,降于良玉。塌天,即李万庆也。良玉为言于熊文灿,文灿署国能、万庆皆为游击将军。革里眼等走商城。

六月,张献忠住札谷城,知县阮之钿竭力调护,士民赖之。至今春,叛形显著,左良玉请乘其未备讨之,文灿不可。至是,果叛。之钿沥血书绝命词于襟,仰药死。良玉发兵进讨,熊文灿故张露其事,且强留左良玉饮饯,稽延旬日,俾献忠得预为备,献忠乃得从容运器甲资粮入房山,布署已定,文灿始令进兵。良玉怒曰:"督台纵虎负,使我撄之,不去,必以逗逼罪我。"令旗至,即冒暑进讨,献忠设伏于罗猴山,良玉兵度险入伏中,贼四合围之,良玉全军尽没,并失其符印,仅收残兵百人逃归。遂列文灿事于朝,枢辅杨嗣昌具疏劾之。有旨:"文灿逮问,良玉革职,杀贼自赎。"后文灿逮至,戮尸西市。嗣昌方以议款不就,无以仰副圣眷,而文灿又嗣昌所举也,乃请剿自效。上为赐宴赐坐,复赋诗以宠其行。御诗曰:"盐梅今日作干城,上将新开细柳营。一扫寇氛从此靖,还期教养遂民生。"所以宠之者至矣。嗣昌谢恩毕,驰至武昌,申明军令。见良玉部下多降将,可倚以办贼,特疏请于朝,拜良玉为平贼将军,升永州推官万元吉为监军佥事。

十月,老犭回々、革里眼、左金王等合二万人,分屯英、霍、潜、太诸山,犯安庆、桐城等处,辽将黄得功、川将杜先春屡战却之。

十三年庚辰正月,大计群吏。湖州知府朱大受,屡为朱绅所劾,特行贿于 吏科都给事中阮震亨以祈免,为厂役所获,并缉临江知府胡永清等营贿事款。 于是震亨等俱下镇抚司究问。

二月,会试天下士,命大学士薛国观、蔡国用为考试官,取中教谕杨琼芳 等三百名。

韩城、金溪,皆以外僚入阁,从无文采。杨琼芳系揭阳教谕,而以压榜 ,此三百年所无者。杨卷在某房中,同考编修韩四维见之,曰: "会元在是矣 。"徐简讨取文阅之,曰: "此必苜蓿先生也,不然,必是老贡生。"及拆号 填榜,果系教谕,合堂愕然。韩城俯首无言。吏停笔候命,韩城踌躇良久,仍 旧用杨。

三月,廷试策士,赐魏藻德、葛世振、高尔俨等进士及第出身有差。又廷授颜浑等吏科给事中、御史等官。

是日,上召对策进呈者四十八人于文华殿。上问:"边隅多警,何以报仇雪耻?"魏藻德对曰:"以臣所见,使大小诸臣皆知所耻,则功业自建。孔子论政则曰'知耻近乎勇。'论士则曰'行已有耻。'孟子亦曰'一人横行于天下,武王耻之。'故勾践豢马以沼吴,燕昭式蛙而灭齐,皆知耻之明效也。"因自列戊寅通州城守功状。上心识之,拔为第一。而周正儒、宣国柱五人特授给事中,吴邦臣、魏景琦等五人特授御史,颜浑特授吏部主事,田有年、卢若腾、钱志驺、陈纟熏等特授兵部主事。时韩城拔无锡邹式金为第一,上抑置二甲,杨琼芳抑置三甲。韩城始失圣眷矣。

六月,大学士薛国观免。韩城刚愎性成,敢作敢为,既与武陵比而挤去绵竹,遂正首揆,益无忌惮。凡阁中有所票拟,中书每于外庭传示消息,已成定例矣。至是,韩城信任私人王陛彦,而怒老中书周国兴、杨余洪不为用,特捏泄旨事参之,两人皆廷杖,毙杖下。两中书家,皆密缉韩城纳贿事件,以报东厂。又上召对时,曾语及朝臣贪婪,韩城曰:"使厂卫得人,朝臣何敢至是?"东厂太监王化民在侧,汗流浃背,于是专侦其阴事,而史范所辇多金为布置地者,皆入韩城之寓。适史范死,周、杨二家力怂范家人诣厂出首,东厂即以上闻。有旨:"下锦衣卫严究。"于是锦衣卫提韩城杨、马二长班鞫问,供吐过付之赃甚详,而韩城一疏再疏,则云:"杨士聪之参史{范土},别有缘故。"又云:"史{范土}曾参党人袁崇焕等,为党人所忌,故乘其丁艰而参之"云。夫身在事中,又恐圣怒方赫,不辨己之受贿,而亟辨史{范土}受参之故,则真悍真愚矣。有旨:"着五府九卿议处。"已而,议处本上,有旨:"薛国观着冠带闲住。中书王陛彦着革了职,刑部提问。"

韩城等既去,复当枚卜,上点用德州谢■6A、井陈演。先是,田唯嘉罢斥,升南京右都御史庄钦邻为吏部尚书,钦邻迁延半年不至,奉旨诘责,钦邻调用,而特召谢■6A为吏部尚书。至是,■6A以原官、演以礼部侍郎俱入阁办事。滑县曾出德州之门,具疏让位,于是德州位列滑县之前。

十月,行刑御勾决囚十二人,原任徐淮中河郎中胡琏预焉。胡琏,云南人,戊辰进士。前年,以黄河冲犯泗陵,与河道总督刘荣嗣同逮。运河者,专以运漕艘,而黄河则兼护陵寝,设有通惠、张湫、徐淮、仪真四河道,复南旺、夏镇二泉闸,皆以工部郎主之。三年一小挑,五年一大挑,费有编额,虑最悉也。而徐淮尤称险要,时设打洪之役。神庙中叶,改浚落马湖,漕艘尽由宿迁收口,不复走洪,而徐淮始专护陵寝矣。承平日久,惟俟春夏水涝涨发,足以际漕事,凡大挑小挑之费,俱入上下私橐。至是,黄河连年冲决,直犯泗陵,总督朱光祚、周鼎与荣嗣皆被逮。朱、刘皆毙于狱,周后以宜兴力庇,免死遣戍。

逮薛国观至京,赐死。先是,韩城出都,资重累累,用车至数百辆,东厂随具事件密奏,圣心益怒。而史{范土}寄顿之赃,卫招甚明,给事中袁恺复疏劾其纳贿诸事,与通贿刑部右侍郎蔡弈琛、左副都御史叶有声,并及吏部尚书傅永淳、侍郎林栋隆。有旨: "弈琛有声,革职提问,永淳、栋隆闲住。"而私人王陛彦,虽已下狱,尚未成招。至是,特旨: "王陛彦着即会官斩决。"凡招具,或斩或绞,招内已定,奉旨止云"即会官处决。"今陛彦招未具,裁自圣断,故云"斩决。"此旨从来所未有也。陛彦决而韩城复逮,逮至,候命私寓,而,"令自尽"之命下。时韩城已卧,家人报锦衣赍诏至,韩城蹶然曰: "我死必矣!"仓卒觅小帽不得,取苍头帽覆之。宣诏毕,顿首不能出声。自尽后,卫帅验视回奏。次日,始奉旨: "准取殓。"盖悬梁者两昼夜,真从来未有之惨矣。

东阁五间,夹为前后十间,前中一间,供先圣位,为诸辅分本公叙之所。 阁辅第五员以下,则俱居后房,虽白昼亦秉烛票拟。韩城当国,特凿一牖,复 开门构数椽,以通日色。说者谓破坏风水,故首膺此祸。虽然,韩城即不破坏 风水,能免此祸哉?

是年二月,左良玉遂剿张献忠,献忠出战,堕马几被擒,复逸去,逃入玛瑙山中,良玉令降将刘国能围之。献忠食尽,分贼四出抄掠,不得者归,尽杀之。其未归者惧杀,诣军门降。良玉因令国能将之前行,伪称粮至,献忠开营延入,国能乘不意,纵火大战,尽扫其营垒,斩首万余级,擒其妻孥及贼党徐以显、潘应鳌等,献忠批藤从岩涧逃去。捷闻,赐杨嗣昌斗牛服。是役也,献忠精锐俱尽,止存千余骑,走入兴安、平利山中。良玉进围之,连营百里,惮险,围而不攻。献忠因得以收散亡,养痍伤,群盗往往归之,势复振。而罗汝才、过天星等贼,复尽入川。嗣昌驻襄阳,会师合剿,以兴安一路失期,斩其监军副使殷太白,复疏参四川巡抚邵捷春不行堵御。捷春逮问。

五月,贼罗汝才等陷四川大昌,犯夔州。石柱女帅秦良玉统兵来援,监军万元吉率舟师由巫山上三峡。贼十三哨过夔门鱼贯而进,罗汝才为殿。官兵遥望不敢击,贼循河南而行,欲渡川西。元吉、左良玉、贺人龙等,皆会于夔州。罗过诸贼,自夔州山后抄掠,官兵分扼诸隘,贼掠无所得。副将罗于萃击过天星于郑山寨败之,过天星以百骑走。群贼既困,谋夺尖山西奔。贺人龙会四川总兵郑嘉栋,湖广副总兵张应元、汪云凤,陕西副总兵李国奇之师赴之。贼以奇兵攻尖山寨,人龙等率诸军奋呼,直入贼阵,断贼为二,贼骑陷泥淖不得驰,而川兵奔跳涧谷如猿猱,贼溃自相腾践,斩首千七百余,生擒自来虎等七十一人。贼退屯羊桥,四出抄掠,石柱土司邀之于马家寨,斩首六百,又追败之于留马垭,斩贼首东山虎。庚子,贼屯谭家坪南北两山,山头张幕,鱼鳞相

掩叠, 官兵分道并进, 南山贼拔寨先走, 北山贼驰下, 直击官军, 官军力战 , 贼退守山巅, 官军分兵绕山后而上, 前后齐登, 贼披靡窜走涧谷, 诸将皆下 马缘山逐贼,追奔四十里,斩首千二百级,贼奔迎仙寺岭。癸卯,三省官兵 , 合击贼于岭上, 贼营大乱, 斩首千余级。秦良玉夺罗汝才大纛, 擒其老营队 副,塌天贼突围遁走七箐坎,入于乾溪。丙午,罗过诸贼,犯夔州下关城,谋 归湖广,以瞿塘水涨不得渡。总兵嘉栋、副总兵应元、云凤,自云阳出邀其前 , 监军元吉、副将人龙等, 间道疾走尖山以截之。夔城山溪险隘, 炎暑毒人 , 贼人马俱病, 汝才、小秦王、上天王、混世王、一连鹰五营, 走云阳尖山坝 , 过天星、关索二营走云阳水碓口, 期同会于开宁。戊申, 人龙等追贼至七箐 坎,贼简其锐为殿,以挑官军,潜以老营先走,人龙击殿后贼,破之,长驱捣 其中坚,贼大败。追至马溺溪,压贼垒而东。六月辛亥昧爽,人龙等前薄贼营 ,三路并进,大呼腾跃而上。贼惊溃,官军逐之,斩首千二百人,俘六百人 , 赦其俘一杆枪、自来虎、伍林三人, 灵为前锋。壬子, 官兵蹑贼而前, 虑贼 必设伏以相邀,参军李仲兴、高光荣,勒轻骑先往,人龙、国奇潜以大兵继之 。二将入隘,贼伏起两山间,围之数重,二将战方酣,人龙、国奇麾兵并进 , 声动山谷, 围中亦奋呼以应之。贼围开四溃, 斩首五百余级, 生擒贼渠掠山 虎等十六人,汝才东走大宁之小岭,官兵控之于夔东。己卯,过天星、关索走 开县, 屯南坝, 知汝才东窜, 而官兵渐迫, 因北走。丁巳, 郑嘉栋率诸将追击 贼于观音山,逐北二十里,至于临江,斩首二百余级。张应元穷追至窦山,遇 贼百余骑,击贼二十余骑,余皆大呼释甲,贼首托天王请降。托天王,即常国 安也。应元止兵,裂帛作书,令国安所部抓地虎往谕过天星,过天星曰:"必 托天王身至为信,乃降。"庚申,贼首高守达率麾下二百骑来奔,过天星逐之 , 邀去百余骑, 来归者七十五骑, 皆关西健儿。辛酉, 过天星西走, 官兵拔营 逐之,至新宁西关外,贼骑三千,不战而走,高守达率其健儿当先陷阵,贼大 乱,马窜禾黍中,惊■相腾践,官兵蹙而射之,斩首千七百余级,擒贼首流金 锤、金狗儿。过、关二贼东奔达州,张应元等追逼之。丁卯,常国安前驱遇贼 , 官兵并进, 斩首三百余级, 夺其营, 贼奔袁坝驿, 设伏沟涧中。戊辰, 应元 等前驱搏战,令高守达、常国安绕谷中,出捣其胁。贼伏发,方接战,国安、 守达突出,大呼击贼,贼惊,堕山涧中者无算,斩首九百余级,生擒滚地狼等 十七人,降其管队柯天虎等四十人。庚午,贼自袁坝驿东走开县,诸将分营出 战,郑嘉栋将中军,罗于莘将左军,降将杨旭将右军,战于城下,贼大败,走 大昌。

张献忠自兴、房走白羊山,入巫山间,川兵蹑之,盖西入深谷中,掩旗息鼓若无人。参将曹进功率兵入山侦贼,不见一人而归。初,杨嗣昌以左良玉跋-87-

扈难制,而贺人龙所将关兵骁勇善战,屡杀贼有功,请以人龙代良玉,佩将军印。既而良玉奏玛瑙山之捷,度未可动,复奏留左良玉佩印如故,别加人龙总兵衔,须待后命。人龙骤闻大将之信,踊跃动三军,既而报寝,殊怏怏;良玉知其故,意亦怀恨。当献忠之窜伏兴、房山中也,所存千余骑耳,剿之可立尽,乃良玉以夺怀惭,人龙复以归印觖望,遂互相推诿,不复深入,以致献忠复炽,皆嗣昌失二帅之心所致也。

过天星素与张献忠有郄, 闻罗、张既合, 遂诣嗣昌乞降。嗣昌令良玉抚其 众七千人, 简其精锐, 隶良玉军中, 安其老弱于郧西, 以降将扫地王李靖隶监 军万元吉标下。过天星, 既惠登相也。七月, 罗汝才、小秦王、上天王、混世 王、一连鹰距大宁,元吉遣游击刘正国、降将伍林招之。先是,汝才与金翅鹏 不相能, 金翅鹏尝惧为所并。至是, 小秦王、金翅鹏相率降于嗣昌, 汝才遂杀 刘正国、伍林,东走巫山。良玉分兵屯房、竹间,汝才屡败,党羽多降,势益 孤。献忠时在巫山,汝才往会之,谋渡川西走。诸将贺人龙、李国奇、张应元 、汪云凤、张奏凯等合兵击之。应元、云凤屯于夔之土地岭待人龙兵,三檄不 至。癸亥,人龙兵噪而西归,献忠知官无后继,悉锐来攻,而应元、云凤所将 湖广兵三千皆新募, 未经行阵, 贼骤至, 二将简锐卒千人搏战, 晨至日中未决 , 贼分兵绕后山而下, 突冲营中, 守营新兵皆心华, 贼乘之, 前后皆围, 二将 殊死斗,应元中流矢,奋击突围出。贼方渡河,应元赴河上,燃炮击杀一贼帅 衣绯者,贼不得渡。云凤苦战久得脱,渴甚,饮水斗余卧,血凝臆而卒。时张 、罗新合,嗣昌命金翅鹏部下飞上天入罗汝才营招之。汝才逡巡不决,献忠惧 汝才之再降也, 日说汝才曰: "杨阁部已俘过天星献阙下矣, 尔慎自为谋。 "元吉请檄左良玉携惠登相至陈前招汝才必来,嗣昌不听,汝才遂不果降。己 丑,嗣昌屯巫山,遣人至关索营中招之。先是,关索屡败,伏深山中,过天星 降,益惧,遂与其党王光恩,杨光甫等,诣嗣昌军前,顿首涕泣请死罪。嗣昌 抚慰之,给以金币,所部三千人,嗣昌简其精锐赴军前杀贼。罗汝才之人川也 ,凡九股,整十万、扫地王、小秦王、金翅鹏、托天王、过天星、关索,惟罗 、张相抗,其七相继俱降矣。嗣昌飞章上闻,叙赍文武将吏有差。

九月,官兵大败李自成于函谷。自成奔汉南,李国奇等蹙之于北,左良玉扼武关以南。初,诸将围自成崤、函山中,分守要害,合围甚密,将坐毙之。嗣昌曰:"围师必缺,不若空武关一路,待其走而击之,可立尽也。"自成令军中尽杀所掠妇女,同养子李双喜,乘隙率五百骑突围而出,诸将不能御,遂自武关逃入郧阳。时河南大饥,饥民所在为盗,自成乃至郧阳走伊、雒,饥民从者数万,围永宁,陷之,杀万安王朱钅轻,再陷宜阳,势复大振。

是日,张、罗二贼陷大昌,进屯夔州山北。时贼行营辎重妇女甚重,众官

兵多观望不前,但尾贼后,所至关隘,守将多远遁,遂长驱趋达州。十月壬戍 ,贼渡河,入巴西,陷剑州。甲子,过剑阁,由广元走阳平关,从间道出百丈 山,将入汉中。总兵赵光远守阳平甚严,贺人龙、李国奇复整旗而东,贼乃逾 昭化,走西川。丙寅,川兵迎贼于剑州,败绩,贼缚四将去。降将扫地王、张 一川击贼于梓潼被擒,贼招之。元吉请恤其妻子于夷陵。

十一月庚辰,嗣昌、元吉,大飨将士于保宁,以诸军进止不一,立大帅以统之,以总兵猛如虎为正,张应元为副。癸未,发保宁,趋绵州。癸卯,贼知大兵至,走江内。乙已,猛如虎选骁骑逐贼,元吉、应元屯兵安岳城下,以遏贼归路。十二月辛亥,贼南陷泸州。泸州三面皆陡绝临江,止石立站一路可北走,贼既走绝地,元吉谋以大兵自南捣其老营,伏兵旁塞险要,蹙贼北走永州,逆而击之,可尽歼也。乙卯,元吉等至石立站,贼先移渡南溪,官兵隔水追之,不及。癸亥,贼抵成都,副将某统千余骑夜捣贼营,贼预取土像数百置帐中,四面悬灯,而潜伏暗处,千骑望灯而趋,大呼直入,则所劫者,诸土像也,急退,而贼众四合,歼戮无孑遗。自是成都专意固守,不复言捣营矣。贼趋新都,知县黄冈固守,贼复至绵州。

是年,山、陕、河南大旱,蝗起。冬,大饥,人相食,草木俱尽,土寇并起: 开州人袁时中聚众数万,破开州。时寿州有袁老一营,时中自号"小袁营"以别之。后官兵复开州,时中走河南。

江北贼革里眼、左金玉复犯霍、英,上命太监刘元斌率营兵六千驰赴北江,击贼于霍山,败之,贼走湖广,陷麻城、黄梅。

河南郏县盗李际遇、申靖邦、张鼎聚众至五万,总兵王绍禹遣游击高谦击之,一日三捷,斩首二千余级,追击菜园,斩首千级。

●卷七

十四年辛巳,逮江西巡抚解学龙、布政司都事黄道周下镇抚司究问。学龙升兵部侍郎,循例有荐举疏,内荐道周有"学问直贯天人,品行无忝孔孟"之语。滑县票旨,以:"群臣结党标榜,欺侮君父,屡旨训诫,毫不省改。"学龙、道周,俱遣缇骑逮下诏狱,鞫讯同党姓名,道周供出编修黄文焕、吏部主事陈天定、工部司务董养河及从父共四人,俱下刑部狱。

清兵陷宁、锦,总督洪承畴、总兵祖大受降。自袁应泰丧辽阳退守广宁 ,王化贞弃广宁退守宁、锦,至是清兵复犯宁、锦,总兵祖大寿固守,告急于 朝。先是,有祖大粥者,其勇为祖氏冠,历官副总兵,前是清兵来攻,相顾莫 敢先进,城中大恐,大弼戒无动,自率锐卒五百,直冲清营,往来驰击,清兵 披靡不能御,遂拔营去。及是,病不能师。报至,上命总督洪承畴帅大同总兵 王朴等六总兵、援兵十余万人往救,祖寄语于洪,谓:"清兵强甚,难与争锋 ,可用车营法,步步进兵,即步步列营,使彼不得逞志,逼之出塞乃可。"洪 从其言。上以师久无功,今职方郎中张若麒往探机宜。若麒至,不度彼此,妄 谓清兵一鼓可平,严促进剿,承畴不能制。清兵侦知之,临夕,设伏以待。前 军甫发,王朴率本部先遁,诸总兵至半途闻之,皆仓皇西奔,清兵以铁骑乘之 ,士卒死者大半,张若麒及总兵杨国柱等仅以身兔。所丧器械辎重,不可胜计 。承畴、大寿皆降。事闻,举朝震动,若麒逮问下狱,王朴处斩,国柱等革职 充为事官,立功自赎。而承畴谬以殉难闻,恤赠太子太保,荫锦衣千户世袭 ,与祭十六坛。

召予告大学士周延儒于家。先是,阁臣虽内外兼周,鲜有当圣意者。众推 宜兴颇有机巧,或能仰副,而圣意亦及之。于是,庶吉士张溥、礼部员外郎吴 昌时为之经营,涿洲冯铨、河南侯恂、桐城阮大铖等,分任一股,每股银万金 ,共费六万两,始得再召。庚辰孟冬,上祭太庙,诸臣先至殿门外候驾,时殿 门未启,忽闻内有异响,众共惊耸,俄见殿门大开,有冕旒者十余位从内走出 ,顷之不见,而殿门闭如故,众秘之不敢言。驾至,行礼之时,怪风暴起,灯 烛皆灭,助祭诸臣,仆地者久之始能起。上亦以惊悸成疾,下体软麻,不能行 立,百余日始瘳。及是,孟冬祭庙之日,天气晴和,上喜谓近侍曰:"周阁老 毕竟有福人。"故眷注最深。

黄道周之案,久不得结,一番招上,一番严驳。户部主事叶廷秀疏救,并与廷杖,淹留狱中者几一年。宜兴再入政府,竭力周旋。先是,部拟学龙、道周烟瘴充军,不允。至是,刑部尚书刘泽深上疏,略曰:

"黄道周之罪,至瘴戍尽矣;进此,惟有论死。死生之际,臣不敢不慎也。从来论死诸臣,非封疆,即贪酷,未有以建言诛者。今以此加道周,道周无封疆、贪酷之罪,而有建言蒙\之名,于道周得矣,非我皇上覆载之量也。且皇上所疑者,党耳。党者,观诸行事。道周具疏,不过空言,一二臣工,其相与者,皆从罢斥,乌有所谓党而犯朝廷之大法耶。去年行刑时,忽奉旨停免,今皇上岂有积恨于道周,万一转圜动念,而臣已论定,噬脐何及?敢仍以原拟请。"

有旨: "依议。"既而黄文焕等各疏辩,有旨: "该部查议。"部覆上,有旨: "准各复原官。"是岁,江南大旱,自春及夏无雨,高区竟未及插莳,贫民嗷嗷,望赈蠲之诏。宜兴首先输米三百石,为诸臣急功者倡。于是抚按不敢言旱,各县苛徵漕粮如额,斗米至三钱,民不堪命。

尔时当国者,不必请蠲请赈,取厌帝听,但就内外积弊,力为清查,便可宽民命于万一。如光禄寺岁派无锡县上供白米一千三百三十石零,岁用七百余石,则每年多存六百余石。浙直各府,岁派分给部堂、翰林、尚宝、科道等衙-90-

门白米一万二千一百余石,岁用共八千余石,则每年多存四千余石。每年卫所 运解漕粮入禄米仓者五百余万石,除文武各官支过俸米外,具蚕食其中者,则 有营兵、卫军、卫役三蠹。营兵则有冒名之弊,如司苑局、四骧军勇、神木黑 口等厂,以中涓为三窟,岁縻饷三十万石矣。卫军则有造册之弊,今溢额者将 及二万人,一军应支饷十二石,是岁耗米二十四万石矣。卫役则有卖票之弊 ,凡官锦衣者,虚领十余票,皆托名吏役,每票支米六七石不等,是岁耗米二 三十万石矣。漕抚标兵五千皆食江南粮,卫军领解止行给八百里行粮,不应与 解京者同给三千七百里行粮。此项厘剔,亦可省米三万石。更由此而推之,内 府收贮香蜡、灯草、丝绵等项,额徵银五万余两,年年委积无用,此项不可裁 乎?蓟辽犒赏公费,重复支用,多至二十三万两,举一边而各边可知,此项不 可节省乎?又如上供磁器,又料价药料一切不急之需,暂停一二年,可省金钱 数十万。若能逐项清查以佐国用,将朝廷不苦于亏额,苍黎咸乐于更生,相臣 造福, 岂不普哉? 不此之图, 而沾沾首输为天下倡, 将以是尽臣职乎? 甚矣 , 其不讲于大道也! 诸令中, 长洲知县叶承光尤酷, 拔取富室充兑, 贿入则免 。有过客问讯其宦况者,曰:"赖有此荒耳。"众心愤恨,几激民变。巡抚黄 希宪曲庇之, 仅以调简。行, 复以标兵护之出境。

是年正月,李自成围河南府,福王募死士逆战,斩获颇多,贼引退。贼复以大炮攻城,守严不动,及昏而退。总兵王绍禹标兵有驰呼于城上者,城外亦呼以应之。北兵既执守道王允昌于城上,绍禹驰解之。诸军曰:"贼已在城下,即总镇其如我何?"挥刃杀守陴者数人。守陴者皆惊散,贼缘堞而上,叛兵迎之,贼遂入城,焚福王府,福王世子俱缒城走。王允昌等各官俱被执,俱不死,惟一典史不屈见杀。后自成迹福王所在,执之,并执原任兵部尚书吕维祺。遇王于西关,谓王:"名义甚重,毋自辱。"王见自成,泥首乞命,自成历数其罪,遂遇害。维祺骂贼不屈死,世子奔怀庆。自成伪称"闯王,"雄诸贼。事闻,上震怒,逮总兵王绍禹磔之,籍其家。

山东土贼李廷实、李鼎铉陷高唐州。时山东盗起,兖属州县,一时啸聚响应,东平令胥迎贼入城据之。巡抚王国宾发六道官兵防兖州,檄总兵刘泽清击破东平贼,复其城。

河南土贼艾一、侯二等啸聚数千人, 武邱知县苏茂柏击破之。

献忠潜至巴州,乘其迎春,袭破之,恣掠三日,趋达州、新宁、开县,焚毁驿道,人烟绝断者七百余里。初,贼之南窜也,元吉欲从间道出梓潼,扼归路以待贼,嗣昌檄诸军蹑贼,追逐不得,距贼远,令他逸,诸将皆尽向泸州,贼折而东返,遂莫为堵遏。贺人龙顿兵广元不进。己丑,猛如虎率诸将追及贼于开县,日暮雨作,诸将咸以人马困乏,诘朝请战,参将刘士杰曰:"自泸

州逐贼,驰驱四旬,仅而及之,今遇贼不战,纵敌失贼,谁执其咎乎?请为诸军先,挥戈独进。"贼屡却,如虎亦率亲兵从之。献忠凭高而望,见后军无继,左军皆迟回不前,因简精锐,绕官军后,驰而下,左军先溃,士杰及游击郭关、如虎子猛先皆战死,前军已覆,如虎突战溃围出,马仗、军符尽失。贼东走巫山、大昌。监军元吉赴开县收集残兵,祭阵亡将士,哀动三军。嗣昌在云阳,闻开州失利,始侮不用扼归路之谋矣。初,贼由达州而西也,嗣昌策其必入陕,檄左良玉自兴山趋汉中。及贼东走,复檄良玉自夔门进剿,使者惮行,中途返命曰:"贼已入汉中矣。"既又使人谓良玉曰:"贼向汉中,可急援。"良玉不应。嗣昌之使十九返,良玉怒曰:"向从都督命,玛瑙山安得给乎?"遂撤兵去。贼下夔门,竟无一人相拒者。贼既渡险出巫山,昼夜疾走,入归兴山中,罗汝才亦入湖广,惟摇天动留川中,元吉屯兵八百于白帝以备之。

二月,李自成以邵时昌为河南伪知府,而席卷子女玉帛入山。巡抚李仙风 侦贼已去,引兵入城,收时昌斩之。时土贼蜂起,一斗谷、瓦罐子等诸盗,皆 合于李自成,同攻开封。巡按高名衡率司道官婴城固守,贼攻七昼夜不克。周 王恭Φ,出库金五十万助饷,复悬金募死士,能杀一贼者,立与五十金。兵民 踊跃争先,贼死者甚众。贼惧,退数舍。巡抚李仙风率诸将高谦等驰至开封,与总兵陈永福内外夹击,大破之,永福射自成,中其左目,贼乃退。既而仙 风、名衡互相讦奏,谄逮仙风,以名衡巡抚河南。

献忠、汝才,复从山中出,趋当阳,郧抚王永祚扼之于房、竹,遂走宜城。侦知嗣昌有檄之襄阳,要之于途,取檄遣贼伪充公差,夜叩襄阳城门,巡道张克俭见有符验,延之入,时二月初八日也。先是,官兵获献忠妻孥及贼党徐以显、潘应鳌等,俱禁襄阳狱,知府王承曾素纵饮渔色,见献忠,易视之,疏其防,贼乃入狱,与徐、潘等相约,漏四下,徐、潘等破狱出,杀守门卒,开城门迎贼,贼尽入,先攻襄王府,焚端礼门及诸楼台,合城鼎沸。初九日,献忠入城,执襄王,僭坐襄王殿,坐王堂下,劝之以卮酒,曰:"吾欲斩杨嗣昌头,而嗣昌远在川,今当借王头,使嗣昌以陷藩伏法,王其努力尽此一杯。"遂遇害,宫眷无一存者,并杀桂阳王常法。时城内守兵数千,军资器械山集,尽为贼有。推官邝曰广被执,大骂不屈死。署襄阳知县李天觉,北面叩头,置印于案,自缢死。左良玉在唐县,闻襄阳陷,股栗不能起。久之,与郧抚王永祚统兵赴援。癸丑,贼弃襄阳,渡江破樊城。己未,陷当阳。乙丑,陷新

江北革、左诸贼,因官军四集,急而议款,监军杨卓然议安插于潜、太间。然二贼实无降意,公行劫掠,卓然每左右之。及襄、福二藩相继遇难,二贼乘机复炽,命朱大典督诸军讨之。

野、光州。

河南贼孟三陷河阴, 据之。游击高谦攻拔河阴, 斩孟三。

三月丙子,杨嗣昌自尽。嗣昌以连失二郡,丧两亲藩,度不能免,遂自缢死。监军万元吉部署行营,令猛如虎驻蕲州,防献贼东轶。事闻,左良玉削职,戴罪讨贼。郧抚王永祚、知府王承曾、襄府长史唐时,俱着抚按解京提问。

山东巡抚王国宾革职,以王永吉代之。时东省大饥,民间父子相食,徐、 德数千里,白骨蔽野,行人断绝,饥民相聚为寇,曹、濮上贼尤炽。上命总兵 杨御蕃、刘泽清合兵剿之。

四月,以丁启濬代杨嗣昌,总督军务。左良玉自襄阳进击李自成,屯南阳。自居屯庐氏。庐氏举人牛金星迎降,又荐卜者宋献策。献策长不满三尺,见自成,首陈图谶云:"十八孩儿兑上坐,当从陕西起兵以得天下。"自成大喜,奉为军师。

张献忠犯应山,知县章自辉击却之;遂陷随州,知州徐世淳合家死难,吏 民屠戮无遗。随州为四冲之地,其初陷也,知州王焘死之,至是三陷矣。

五月,以东寇孔棘,特设津、徐、临、济四镇总兵,专护漕运。又以河道 张国维工部侍郎衔,不便节制四镇,乃改衔兵部侍郎。

河南土贼袁时中犯蒙城,朱大典击败之;总兵刘良佐简骁骑自义门追击,贼大败奔溃,时中以数百骑宵遁入河。

泰安土贼掠守阳、曲阜,闻青州兵多,遂走邳州,焚其南郭,至沙沟,屠 戮甚惨,遂犯徐州北关,转至南河店,毁漕船十六只。

贺人龙破李自成于灵郏山中。时保定总督杨文岳屯禹州,左良玉屯南阳,猛如虎屯德安,适疽发于背,退屯承天。

癸巳,出傅宗龙于狱,总督陕西兵讨贼。丁丑,宗龙至新蔡,会杨文岳、贺人龙、李国奇、虎大威等,共结浮桥渡河,合兵趋项城。戊寅,诸君毕渡,走龙口。是日,李、罗二贼,将趋汝宁,觇官军至,尽伏精锐松林中,阳驱诸贼西渡。人龙□□,贼追及之于项城,执宗龙至城下,令呼开城门。宗龙大呼曰: "我已为贼所执,尔等当死守,毋堕贼计。"贼斫其耳目,死城下。人龙、国奇俱西归,贼陷项城,屠之。诏复宗龙兵部尚书,赠太子太保。李、罗二贼,合兵击叶县,守将刘国能,即飞来虎也,誓师力战,贼悉众来攻,国能身被数十创,气愈厉,部下劝暂逸,图复举,国能曰: "朝廷既赦我死,又加爵命之荣,万死何辞!自成羽毛已成,不可复制,何再举之可图?"尽杀其军中马骡飨士,黎明,分兵为十队,偏裨各率其属,驰逐大战,至辰复聚,则死者过半矣。又分为五队,贼亦分兵围之,更番迭战,以逸待劳,国能率残丁短兵相搏,至夜,度不能脱,仰天呼曰: "我力尽矣!"遂自刎死,部下无一降者。事闻,诏赠国能左都督。

六月,左良玉击张献忠于南阳之西山,败之。献忠西走,攻南阳,知府颜 日愉坚守不下,遂袭泌阳,陷之。

七月,献忠围郧阳,守将王光恩御之,多杀伤,遂退。总兵黄得功标下兵叛去,投献忠,令之破郧西。辛卯,郧兵与献忠战,败绩,献忠将被擒者人断一手纵归,以辱官军。

八月,献忠乘掠信阳。时总督丁启濬与左良玉俱屯南阳,顿兵不进。至是,良玉始至南阳,引兵逆击献忠于信阳,大破之,斩其渠魁五人,献忠负重伤

- , 易服夜遁, 良玉军声大振。戊午, 献忠收余众走郧阳, 骤遇官军, 不战而溃
- ,还走南阳。越十余日,良玉始至,则献忠越南阳而东久矣。时罗、李方合
- ,献忠因汝才以奔李自成。自成方强,欲屈之,献忠不为下,自成怒,欲杀之
- 。汝才阴选五百骑资献忠,令他往,献忠乃昼夜东驰,与革、回诸贼同入霍。

十月,太监刘元斌、卢九德率京营京兵追贼至寿州,及之。元斌留四十日,不进,城门昼闭,纵兵大掠,杀樵汲者以冒功。既而欲攻城,州民敛数万金赂之,乃免。

十一月,总督汪乔年率总兵郑嘉栋、牛成虎、贺人龙趋河南。先是,乔年于陕西发李自成先冢,得小蛇,即斩蛇以殉,誓师东下,抵浃县。襄城举人张永祺率邑人迎官军,屯于城中。自成闻之,尽众来迎战。时乔年安营未定,有二将先逃,官军大溃,贼乘之,一军尽没。乔年以数百骑入城,拒守五日,襄城陷,乔年自刎未殊,被执,见杀,并杀守将李万庆,即射塌天也。自成深恨诸生,劓刖百九十人。又购永祺,永祺远遁,屠其族人九家。乘胜围南阳,破之,唐王遇害,总兵猛如虎死焉。邓州等处皆降,知州刘振世死之。太监刘元斌统兵救襄城,闻南阳陷,乃拥妇女北去。

十二月,自成连陷许州、鄢陵等县,知县刘振之衣冠北向再拜,自刎死。 复陷禹州,徽王遇害。再围开封,高名衡、陈永福等竭力守御,周王贮库金于城头,擒一贼者百金,杀一贼者五十金,战殁者恤其家五十金,被伤者以轻重为差。杀贼者甚众,永福射自成中其左目,乃屯朱仙镇。

上以朱大典受命督师,纵贼流毒,着革职听勘,以高斗光代之。

十五年壬午,正月元旦,上御殿朝贺毕,下宝座,南面正立,顾内侍曰:"召阁臣来。"阁臣由殿东门入,再奉旨趋至殿檐,行叩头礼毕,跪以俟命。上曰:"阁臣西班来。"盖以师席待诸辅也。阁臣起立,不知圣意,拟取东西两班。上又曰:"阁臣西边班来。"随有一奄下引而前。上宣阁臣来,诸辅趋进,上曰:"古来圣帝明王,皆崇师道,今日讲官称先生,犹存遗意。卿等即朕师也,敬于正月端冕而求。"圣躬转而西,面向阁臣一揖曰:"《经》言:修身也,尊贤也,敬大臣也,体群臣也。朕之此礼,原不为过。"又曰

:"自古君臣志同道合,天下未有不平治者。"上谕至此,辞意其严重。又曰 :"职掌在部院,主持在朕躬,调和在卿等。"诸阁臣跪伏谢:"菲才不敢当 。"上曰:"先生正是朕该敬的。"言之再三,随谕:"先生起来。"诸辅臣 始起,转下叩头。上还宫后,复补赐圣谕一道。时诸勋臣不知所以,亦相率疾 趋,上曰:"东班去!"

时行取各官,待命阙下,皆仰祈宜兴手援。适漕运愆期,宜兴因言:"漕艘至今,尚未开封南回。皆以巡漕未补,无人催趱,请速下诸科道缺。"上从之。于是,马嘉植等咸授科道,无授部曹者。滑县接韩城衣钵,每票旨,辄深文诋谪,黄道周之狱,皆出滑县手。宜兴再召,井研辈事事请教惟谨,而滑县专行自如,宜兴大不以为然,御史杨学愿具疏将纠之。或谓滑县曾巡抚江西,于杨有部民之谊,不便,乃授马嘉植上之,滑县一疏引疾,宜兴即票旨:"准回籍调理。"

大学士谢■6A罢。德州由外廷入,圣眷颇隆。去冬,上用十一般茶饭礼祭 光庙御容,诸阁臣陪祭,德州最后至,纠仪台省纠之。德州疏辩言: "臣将出 门,而衣带忽断,再续再继,以是后期,乞将臣与缝衣者同下法司,严加讯鞫 。"虽奉旨免议,而圣意已移矣。时边塞议款,上颇秘其事,德州与新甲咨台 省,讼言其不可,给事中朱徽首先纠劾,谓: "事关宗社,谢■6A身系大臣 ,既知不可,即当极谏,乃谏诤不闻,而昌言于众,以暴扬皇上之过,大不敬 无人臣礼。"上震怒,奉旨有"朕心甚痛"之语,将大有所处分,而群臣随声 附和,不下百余疏,圣意遂从轻,止削籍为民。

御史杨学愿疏,略曰:

"臣伏读圣谕,申饬交结内侍之律,因稽太祖高皇帝时,初无所谓缉事之令,臣工不法,正有明纠,无阴讦也。臣待罪南城,所见词讼,多假番役,妄称东厂。甚者诿人作奸,挟仇首告。夫饵人以陷祸,择人而肆喙。惟恐其不为恶,又惟恐其不即罹于法。揆之皇上泣罪解纲之仁,岂不伤哉?伏乞皇上先宽东厂条例,夫东厂宽而刑罚可以渐省。抑臣又有请焉:外臣获罪,但敕抚按槛车,送诣阙下,未为不可,若缇骑一遣,有资者家产破散,无资者地方敛馈,为害滋其。"

有旨: "东厂所缉,止于谋逆乱伦。其作奸犯科,自有有司在,锦衣卫校尉,毋得奉差需索。"

五月,逮凤庆总督高光斗、安庐巡抚郑二阳,起马士英总督凤庆军务。士英先为王坤所纠遣戍,至是,会推凤庆总督,士英列名其中,上怒甚,曰:"会推大典,辄以废弃窜名其间,冢臣欺蔽殊甚。"刑部右侍郎徐石麒奏曰:"冢臣岂敢欺蔽,实以马士英曾历边疆,颇有才略,禁锢可惜,今止开列

,候皇上裁夺。惟是冢臣不先奏明,诚为有罪。"上怒始霁,曰:"马士英既说他有边才,即着他去。"遂起升兵部右侍郎,总督凤卢安庆等处军务。

六月,吏部尚书李日宣罢。时当枚卜,外僚房可壮、张三谟、宋玫预焉。 先是,御史廖惟一,井研姻戚也,时当考核,井研托可壮为道地,不应,井研 因步蜚语,谓:"此番枚卜,皆可壮三人主持。"上入其说,召廷臣于中左门 ,上青袍,皇太子、定王、永王侍。上诘吏部尚书李日宣曰:"朕屡谕诸臣 ,毋宁背君父,不背私交,宁隳职业,不破情面。今日枚卜大典,公聚推举 ,自当矢公矢慎。乃称许询情,如房可壮、张三谟、宋玫,并滥与会推,此岂 大臣之道?"并责吏科都给事中章正宸、河南掌道御史张暄,几欲重典。阁臣 力救,乃下日宣等于狱。时吏部左侍郎现缺,右侍郎雷跃龙久不到任。上呼礼 部左侍郎王锡衮出班,曰:"吏部印着你署掌。"王遂改吏部左侍郎,署部事 。阁臣以枚卜请,上点用晋江蒋德、黄景,兴化吴,俱以礼部尚书入阁办事 ,而起升郑三俊为吏部尚书。蒋、黄同邑、同时,极称盛事。

四月中,顺天三河县地方,半空中忽堕下一龙,牛头而蛇身,有角,有麟,宛转叫号于沙土中,以水沃之则稍止。抚按不敢奏闻,如是者三昼夜乃死。

东宫田妃最有宠。是夏,田妃病笃,遍走群望,上咸躬致祷焉。临终,上适往他殿行香,不及永诀,回宫大恸,丧礼备极隆厚。田妃有妹,曾入宫,上授以花一朵,即令插髻上,曰:"此是我家人也。"妃薨后,上留心其妹。甲申春,己有旨采择淑女,以备六宫,候冬间举行,未几遇变。

金坛盛顺者, 宜兴幕客也, 欲题内阁中书, 而又欲得科目为重。壬午, 北围, 大理评事李森先, 已有成约, 外议颇著。给事中杨枝起疏纠之, 森先降调, 不及预同考。及榜发, 盛仍列名, 监场御史徐殿臣力持不可, 乃抽出。

乡试大典,虽曰矢公,然夤缘未能尽绝。至关防溃裂,显行无忌,则莫若 壬午时宜兴弟肖儒、子弈封以及亲识子弟,无不入彀。众官效尤成风,不复问 文艺矣。说者谓隐匿灾荒,滥黩大典,上负圣眷,下负舆望,赐死之祸,实自 取之。后有坐以纵敌之罪者,夫力能歼敌,方能纵敌,不坐以不可逃之律,而 加以莫须有之案,恐反授宜兴以口实也。

十月,吏部题臣父生死蒙恩等事,奉旨:"文某准赠礼部尚书,荫一子,入监读书。"先文肃以九年六月弃世,十一年二月南京给事中张焜芳疏余,末有云:

"故辅文某,骨鲠性成,劲介绝俗,以天下为己任。数月揆席,正色危言 ,触著去辅,祸机遄发,以致忠愤填膺,赍志以没。今历二年余矣,子孙不敢 陈乞,抚按不敢代题,竟与草木同其朽腐。皇上恩礼旧臣隆赐讲幄,而使文某 幽光弗耀,典礼缺如,优恤易名,岂可一日缓乎? 六月,淄川请告,给事中吴麟徵疏言:

"张至发之归,皇上优礼有加,臣知皇上始终优礼大臣也。因念故辅文某与至发同蒙特简,两月政地,一语招尤,省过责躬,溘焉朝露。其进也,由圣明特达殊恩,非藉旁门幸窦;其去也,由同官意见相左,非系纳贿徇私。今弃世已二年余矣,抚按不敢代题,子孙不敢陈乞,惟皇上哀而矜之!"

韩城票:"恤典出自朝廷,何得徇私市恩?"御笔抹去,止批:"该部知道。"十二年四月,吏部验封司署司事主事胡璇案呈,前署部左侍郎董羽宸具题,奉旨:"文某准复原官致仕。"九月,不肖秉上疏:"请恤臣父,生死蒙恩,微臣感戴中悃"等事。奉旨:"该部知道。"十三年三月,礼部祠祭司郎中刘大垣案呈前事,尚书林欲楫具题。奉旨:"恤典必须实迹,这本如何竟请,还着再行核奏。"亦韩城所票也。后韩城获谴,宜兴再入政府。十五年四月,祠祭司署司事员外吴泰来案呈前事,尚书林欲楫具题,奉旨:"文某准与祭一坛,减半造葬,仍加祭一坛,以示优礼。"至是,吏部验封司署司事主事张文延案呈前事,署部事左侍郎王锡衮具题,奉有令旨。

兵部尚书陈新甲处决。新甲,四川人,由举人历任本兵,盖杨嗣昌荐以自代,为款局地。上亦知边防不足恃,姑藉款以暂纾目前。后以傅宗龙言,召新甲切责。■6A独进曰: "清果许款,款亦可恃。"于是遣马绍愉往建州,清不表谢,而复得大嫚书,上大悔恨。然自张若麒偾事后,举朝之人,无不愿款者,新甲复申其说。上亲发玺书,加绍愉太仆少卿衔而郑重遣之,乘传至塞外,边臣张筵宴清使,清使一语不答,云: "待国主命。"及国主至义州,责诸酋私通中国,将杀我使;译事者再四叩头祈请乃免。马绍愉匍匐窜归,科道诸臣,恶其辱国,连疏纠之,并尽列新甲奸罪。上虽怒甚,隐忍未即发。适新甲有疏,细陈款事颠末,内多援引圣谕。此疏误为书役发魁抄传,兵某据疏抄纠参。上意新甲见卖,下严旨切责,且令回话。新甲具疏回话,绝不引罪,反自诩其功,有"有某事,人以为大功,而实臣之大罪"等语,不一而足。上愈怒,着"革了职,刑部提问。"部引失陷城寨律斩,宜兴、井研合词求免,以北清未薄城为言。上曰: "陈新甲职任中书,一筹莫展,致令流贼披猖,戮辱我七亲藩,不更甚薄城乎?"遂奉旨: "陈新甲着即会官斩决。"

新甲去任,以冯元飚为兵部尚书。元飚素习占风望气,揣知寇虏交讧,剪 灭无术,乃佯称病。一日,在朝班,伪称疾发,贵眩仆地,扶曳而出长安,班 役妇孺,皆嗤其为细人伎俩,辱朝廷而羞当世之士也。元飚去,以张国维代。

十一月,清兵入犯。盖于今四犯矣。越畿甸而南掠山东,破兖州,鲁王南走,守道陈之伸逃,知府邓藩锡死之。破莒州,知州景淑汴大骂,不屈死。复阑入南直界,烽火及于徐、邳、沐阳。时江浙九省入觐官既升任,差回各官

,俱麟集于淮安度岁。是年正月,山东贼李青山攻兖州,给事中范淑泰、鲁府 长吏俞起蛟击败之,擒青山,献阙下。曹、濮诸贼,亦次第剿散。

李自成攻开封益急,穴城,而置炮于中,选锐贼披甲以待,炮发,城崩,即乘势冲入。乃炮反外向,锐贼皆死,而城岿然不动,贼骇,解围去。至五月复来,用宋贼计,围而不攻,以坐困之。

三月,李、罗二贼围陈州,兵备关永杰率士民固守。贼周围四十里,更番进攻,力竭,城陷,永杰战死。城下乡绅崔泌之、举人王受爵等,咸手刃数贼,被擒,大骂,被杀。贼屠陈州。

张献忠攻舒城,四月,舒城陷。时舒城无令,参将孔廷训领兵千人与乡绅胡守恒率士民固守。廷训降于贼,开门纳之;贼执守恒,大骂不屈,以刃刺其腹心死。随令廷训攻霍山。

李自成陷太康、睢州,进围归德。归德无兵,民自为守,贼鳞次穴城,城陷,推官王世琰死之。

五月,复孙传庭原官,总督陕西兵讨贼。传庭檄召诸将于西安听令,固原总兵郑嘉栋、临洮总兵牛成虎,系总兵贺人龙,坐旗下,数之曰: "尔奉命入山讨贼,开县噪归,猛帅以孤军失利,献贼出押,职尔之由。尔为大将,遇贼先溃,致秦督师委命贼手,一死不足塞责也!"因命斩之,诸将莫不动色。以人龙军分隶诸将,刻期进讨。襄城之役,朝议,疑人龙与贼通,故传庭杀之。诸贼闻人龙死,咸酌酒相庆。

张献忠袭陷庐州,时督学御史以较士至郡,贼数百,伪为诸生应试者,潜寓城中。甲戌夜三鼓,献忠卷甲趋至城下举火,城中贼亦举火以应之,守城者惊溃,遂陷。督学某、兵备蔡如蘅逃,知府郑履祥死之。庐州城池高深,贼屡攻不能克,至是一夕陷。

革、左诸贼趋寿州,颖川参将李诩侦知之,伏兵城东南隅,而统锐师迎战 于城南樊家店,伏兵绕其后夹击,大败之,斩首千余级。

六月, 起侯恂兵部侍郎, 总督官兵剿贼, 与孙传庭协办援开封。

七月,各镇援兵溃于朱仙镇。时山西总兵许定国援开封,先溃于怀庆。总督丁启濬,保督杨文岳,总兵左良玉、虎大威、杨德政、方国安等,各统兵会于朱仙镇,与贼累相望。启濬诸军进战,良玉曰:"贼锋方锐,未可击也。

"启濬曰: "汴围已急,岂能久待?必击之!"诸将咸惧,请诘朝战。良玉归营,即率军走襄阳,诸军相继而走,二督营乱,启濬、文岳联骑走汝宁,贼逐之,追奔四百里,丧马骡七千,军杖粮草无算,官兵数万降于贼,启濬敕书、印、剑俱失。事闻,启濬逮下狱,文岳革职候勘。

张献忠陷卢江, 焚戮一空, 还陷六安, 将州民尽断一臂, 男左女右。总兵

黄得功、刘良佐来援, 再战败绩, 献贼遂谋渡江入南京。

八月,河决开封。时开封被围久,周王先后捐库金,金尽,再捐岁禄,岁禄亦尽。城北十里为黄河,巡抚高名衡、推官黄澍等,欲引河水环壕以自固,更决堤灌贼,贼可鱼也。及决河,贼已先营高处;其移营不及者,亦死万人。河流下冲汴城,势如山岳,自北门入,穿东南门出,出涡水,水骤长二丈,士民溺死者数十万。高名衡、陈永福咸乘小舟至城上,周王率宫眷及诸王从山逸出,露栖城上雨中者七日。总督侯恂以舟迎王,总兵卜从善水师亦至,推官黄澍从王舟乘夜渡,达堤口。城中遗民,尚余数万,贼乘舟入城,尽虏以去。邳、毫以下,皆被其灾。上闻之,痛愤,下诏优慰周藩,授黄澍为御史。

孙传庭兵至南阳,李、罗二贼西行逆之。传庭设三伏以待,牛成虎将前军 ,左襄将左,嘉栋将右,高杰将中军。成虎佯奔以诱贼,贼逐之,入伏中,成 虎还兵力战,高杰、董学礼突出翼之,左襄、嘉栋左右横击,大败之,斩首三 千级。贼溃东走,追击,又败之。贼尽弃甲仗军资于地,官军争取,无复队伍 ,贼兵即乘之,左军先溃,诸军皆走,丧材官将领百七十人。事闻,诏传庭立 功自赎。

九月,黄得功、刘良佐复统兵逐献贼,贼走潜山。贼将一堵墙为殿营于山上,二将卷甲急趋,夜半,缘山后噪而登,贼惊起失措,官军奋击,贼大奔,追逐六十里,斩首千余级。献贼溃围走安庆,执一堵墙,焚杀之。十月,良佐再击献贼于安庆,败之,献贼走蕲水。

闰十一月,李、罗二贼围汝宁。将军孔贞会以川兵屯城东,杨文岳以保定兵屯城西,与贼相拒一昼夜,川兵溃。次日,贼四面环攻,云梯如墙而立,一鼓百道,并登城,遂陷,执文岳及兵备王世琮于城上,皆厉声大骂,贼怒,缚二人,以炮击之,縻烂死。世琮初为河南府推官,御贼,矢贯耳不动,号"王铁耳。"贼屠士民数万,留八日,拔营走确山回襄阳,掠崇王由贵及世子、诸王、妃嫔以行。

十二月,李、罗二贼以数万骑至樊城,左良玉营于樊城高阜,乘高飞炮,击杀贼千余。贼从间道至白马渡,良玉移营拒之,贼分兵陷荆门、夷陵、逼荆州。良玉全师出汉口,下武昌,次于金沙洲。巡抚陈睿谟弃荆州,奉惠王走湘潭。李贼遣老犭回犭回据夷陵,革里眼趋德安,荆州士民开门迎贼,李贼遂入荆城。

十六年癸未,大学士周延儒请督师剿清兵,又以军机事密,章奏无以为信,携文渊阁印以行。说者以阁印不宜移动,动必有咎,后果罹韩城之祸。

大学士吴奉命督师剿贼, 钦给银五万两军前支赏, 加万元吉兵部职方司郎中, 督辅军前赞画。

四月, 北兵尽行出口, 京师解严, 大学士周延儒仍入阁办事。

大学士吴罢。兴化向巡历山、陕,以能折冲名。今春督师剿贼,与宜兴同时受命,兴化留寓京师,料理各项,复上疏邀请诸事件,迨宜兴事竣,已复命矣,犹未成行,奉圣谕:"辅臣受命督师讨贼,自当星驰受事,乃三月以来,迁延不进,未出都门,筹画莫展,若在行间,何以制胜?还宜在阁佐理,不必督师。"兴化具疏引罪乞休,有旨:"准回籍。"

廷杖行人司副熊开元、给事中姜采,仍下之狱。开元由给事中调外,既转司副,满望即升京卿,而稽迟不迁,颇生觖望。时楚事方盛,正媒孽宜兴,上以边警,广求直言,开元疏请对,上召入德政,开元讼言: "群臣徇私结党,皇上孤立无助。"且奏且目宜兴,宜兴惶悚无地。上谕: "速补疏进览。"宜兴一面令人邀结开元,阻其补疏,一面进揭,言: "臣孤孑寡援,蒙皇上宠眷,每事不敢避忌群小,非一日矣。即今开元所陈,皆无实指,因言楚中若某若某,皆朋谋树党,其事刂刃于臣者,皆为拥戴邱瑜,代为扫除耳。"上览揭心动,急促开元补牍,开元已吞宜兴之饵,迟回不即具疏,严旨频下,始具疏,言: "延儒以释累囚,蠲宿逋,起废籍,自谓有裨于圣德,孰敢起而攻之?愿皇上遍召群臣,问延儒贤否?即以所论贤否,定其人之贤否。皇上若不加体察,一时将吏,狃于贿赂,虽失地丧师,皆得无罪,谁复为皇上捐躯报国者?"

疏入,上怒甚,下锦衣狱。适是时密云巡抚王继谟奉旨议处,宁武兵备钱 天锡欲得其缺,求援于给事中杨枝起、廖国遴二人,期以事成,万金为筹。杨 、廖为恳于宜兴,宜兴许之,然未言及为筹事。杨廖出,再为请益,复益万金 。嗣天锡会推,谕旨已下,时又有匿名书二十四气之说,隐诋朝绅,上特为颁 谕一道,戒饬言官,内有"为人出阙"之语,盖皇上破群臣之积习而靠诫之 ,非为天锡发。给事中姜采探之未真,疏言:

"皇上修省罪己,又致诫言官,惟视言官独重,故望之独切。若云代人规御,安敢谓尽无其事。臣独展转而不得其故,皇上何所闻而云然乎?如诽语腾谤,必大奸臣憝,恶言官而思中之,谓不重言官之罪,不能激皇上之怒,箝言官之口,后将争效寒蝉,壅闭圣听,谁为皇上言之哉?"

疏入,宜兴激上怒,下诏狱根究主使。招上,俱与廷杖。宜兴必欲致开元于死,缇帅骆养性曲为护持得免。开元下狱后,始知前之诏谕,非为密抚,而密抚之更替,宜兴实无所私,乃自悔其多事。有南京御史孙凤髦,从狱中视之,开元吐其情,愿一白而无由。孙,山东产,直质人也,愿为代白,先具疏引其端。有旨:"着明白具奏。"孙正拟畅言其事,杨、廖危甚,急乘间鸠之,其子具揭申究,杨、廖百计潜消之。然其事传布长安,宜兴之心迹已明。于

是王继谋仍照旧巡抚, 钱天锡革职逮问, 与杨枝起、廖国遴俱革职同下狱。

上传谕黄道周着以原官起用。宜兴承上深眷,其应对实敏绝,凡圣怒人莫能挽回,惟宜兴谈言微中。道周之狱,人皆以为不可救,宜兴业已周旋得释矣,上偶言岳忠武事,叹曰: "今安得如岳飞者而用之?"宜兴进曰: "飞自是名将,然如破女真事,史氏亦多虚张。即如黄道周之为人,传之史册,不免曰:'其不用也,天下惜之'。"上默然。次日,即有此谕。

左都御史刘宗周、刑部尚书徐石麒、左佥御史金光宸同罢。时上召廷臣于中左门,问御敌剿寇及用督抚事。宗周奏曰:"使贪便诈,此最误事。为督抚者,须先极廉。"上曰:"亦须论才。"时西人汤若望等精于火器。御史若杨乔奏:"火器为中国长技,当从西人演习。"宗周奏:"唐宋以前用兵,未闻火器,自有火器,辄依为长城,误实在此。"上色不怿。宗周又请释熊开元、姜采,云:"厂卫不可轻信,是朝廷有私刑也。"上怒,仰视屋梁,曰:"厂卫俱为朝廷,何公何私?"光宸奏:"宗周无他意。"上益怒,宗周免冠谢,既退,各具疏引罪,有旨:"宗周为民,兴宸调用。"时开元等已上刑部拟罪,尚书徐石麒拟"姜采遣戍,开元赎徒。"宜兴大忤,遂票严旨以进。石麒再疏乞休,有旨:"着冠带闲住。"

下顺天府丞戴澳于锦衣狱。澳,浙江奉化人。奉化,小邑也。澳起家进士,宦官吏部,威行郡邑,其子尤恃势纵恶。奉化钱粮共二万余,戴氏居其半,历任知县,皆以钱粮拖欠罢官。至是,吏部特授进士胡昱泰为奉化令,胡下车,即延耆老谕之曰: "吾知奉化钱粮所以不起者,专由戴氏,吾今先徵戴氏,而后徵民户。"乃签提戴氏家人追比,而恃顽如故,即提戴子亲身赴比。戴子怒,急走京师,诉之澳,勒澳立刻出疏参胡。澳曰: "胡令初到,无款单,且以部民参父母官,亦觉不便。"而怯于其子,姑出一疏,略言: "天下治乱,系于守令。守令得人则治,不得人则乱。"有旨: "奏内所陈,必有实据,着指名回奏。"澳窘极,乃以嘉兴推官文德翼入告事下抚按,既而抚按皆为文讼冤,给事中沈迅遂疏参澳,谓: "澳之疏,专为胡昱泰,而所以欲参昱泰者,专为钱粮拖欠,昱泰遵法追比耳。"于是有旨: "戴澳革职为民,下锦衣卫究问。"

●卷八

十四年八月十九日,圣驾视学,释奠礼成,步至东西庑,遍阅诸先儒神位 ,因召礼部左侍郎王锡衮、右侍郎蒋德、祭酒南居仁三臣谕曰: "宋儒周、程 、张、朱、邵六子,有功圣门最大,今称以先儒,位在汉、唐诸儒下,礼殊未 称。尔部会同詹翰等官,议所以尊崇之。至于六子格言,即督令儒臣编纂成书 ,以弘圣教。"三臣承旨,即于九月题请开馆编纂六子诸书。而尊崇位号,时 - 101 - 廷议不一,不果行。

大学士周延儒罢。延儒林居时,长兴周仲琏特往通谱,叙叔侄礼,事之惟 谨。延儒之再召也, 秀水吴昌时为之效力奔走。延儒入都, 仲琏宫兵部员外 , 昌时官礼部郎中, 共入其幕下。每朝夕, 辄便衣直达卧室, 与侍者交通, 探 听阁中消息,随在外招摇市权。昌时醉心吏部,诚得一日称吏部郎,即死无恨 , 宜兴亦拟借此塞其望而远之, 遂以郎中调文选司, 破格极矣。往时科道年例 在二、八两月,科一人,道二人,间或吏部一人,此旧例也。昌时为政,例推 给事中范士髦等四人,御史陈荩等六人。科道群起大哗。吏科都给事中吴麟徵 、河南掌道御史祁彪佳率两衙门集于公所,与时昌面议。及是日,科道齐集 ,援集例相责,昌时怙过,绝无引咎意。御史某不胜其愤,以所坐椅搏之,昌 时仓皇而出,且曰: "若奚为待我如此?我当尽例出诸御史。"诸御史闻之 , 咸怒发上指, 与时昌有不两立之势矣。又宜兴自恃圣眷, 视同官蔑如也, 井 研辈皆有愠心。缇帅骆养性有阴事, 宜兴刺得之, 以挟制骆, 使为己用, 往来 传递者,昌时也。养性时有厚馈,宜兴不受,昌时竟隐匿焉,养性以此饮恨刺 骨。内奄王之心颇不乐宜兴,曾向宜兴云:"我们才力有限,还求老先生包容 。"闻者危之,而宜兴不以介意。清兵入犯,宜兴督师逐之。总督范志完,宜 兴辛未所取士,其人大言不惭,无纤毫实用,宜兴以一切军情委之。宜兴之出 督师也,上注望甚殷,刻刻遣人侦伺。而宜兴驻通川,每日幕客攒集,午后始 开门收文书,应故事,所谓躬历戎行,鼓舞将士者,未之能也。清兵出口,各 路援师尾之而行,不敢邀击,厚贿宜兴以求叙功,宜兴诺之。襄城伯李国祯与 王奄俱有私人,欲入叙功疏中,宜兴不从,乃比而揭其短入告,谓:"清兵已 骄,邀而击之,可只轮不返,宜兴私通清兵,禁诸将不得一矢相加遗,坐是 ,安然出口。"上信以为然。适给事中吴甘来、御史王章疏参本兵张国维,而 德州兵备雷演祚亦疏参范志完,皆与宜兴有连。奉旨: "周延儒着府部九卿科 道议处。"阁臣各词申救,得旨:"内外多艰,用人罔效,误国害民,皆朕不 德所致。周延儒着致仕去。"

特旨: "修撰魏藻德升礼部左侍郎兼东阁大学士。"藻德辞,陈演请 : "改少詹事办事,仍照三品用。"上从之。此与刘之纶同一破格。然之纶以 戒事超授,虽未成功,犹殁于陈,与藻德天渊矣。

八月,会试天下士,命大学士陈演、魏藻德为试官,取中陈名夏等三百五十人。时以边警,大计改五月,会试改八月,阁臣循序,应以蒋德为副,时上究心天象,凡日月见食,及星宿缠犯,取中国历验之不甚应,以西历验之辄应,遂加西人汤若望尚宝司卿,专理历法。先是召对,德奏及之,曰:"汤若望有何好处,皇上如此优礼?"上曰:"古帝皇招来远人,汤若望远夷慕化,朕

故优待之有加。卿言清兵屡次内犯,震惊宗庙,卿何不撵之使去?"及是,遂 抑德而用藻德。而棘闱之役,亦止于此。藻德离李廉未三年,骤典文场,说者 谓文脉亦促甚矣。

兵部尚书张国维罢,逮总督范志完、顺天巡抚潘永图下狱。时给事中吴甘来疏论: "国维昔任抚江南,惟以巧言令色为务,有'浪子中丞'之称。及任本兵,寸筹莫展,惟首辅意旨是徇,打恭作揖,便成职业"云云。上颇知国维罪状,疑加重谴,国维捐厚资,乞援于内奄。乃得旨: "闲住。"德州兵备雷演祚,疏论志完在山东纵兵淫掠及金银鞍数千两,马百匹,行贿京师等事。有旨: "志完革职逮问。"永图以失机,亦奉旨: "革职逮问。"

范志完伏诛。上特召雷演祚入朝,与志完面质于中左,问疏内所奏事款,历历有据。上又问演祚曰: "尔所言称公颂德,遍于班联者,谁也?"演祚对: "周延儒招权纳贿,如起废清狱租,皆自居为功;考选科道,尽收门下;凡求总兵、巡抚者,必先通贿幕客董廷献,然后得之。"上即命逮廷献,上问志完金鞍马匹,招称送右谕德方拱乾。上并召拱乾,拱乾力辨云: "臣以词林冷局,无票拟招驳之责,且甫入都,安有此事?"上即令拱乾去。志完被逮,知上方注意封疆,决无生理,满载辎重,望门投送,而不得要领,卒置于法。永图亦坐封疆失事律,决不待时。

逮大学士周延儒于家,吏部尚书郑三俊罢。先是,御史祁彪佳贺登选各疏,参吴昌时紊制弄权,给事中郝昌疏劾:"吴昌时、周仲琏窃权附势,纳贿行私。内阁票拟机密,每事先知。总之延儒天下之罪人,昌时、仲琏,又延儒之罪人。"至是,御史蒋拱宸疏论:

"昌时入延儒之幕,与董廷献表里为奸,无所不至,赃证累累,万目共见。即如南场一榜,非其亲戚,即以贿赂,皆昌时为之过付,伊弟肖儒、伊子弈封公然中式,毫无顾忌,以至白丁铜臭汪庶、陈咨稷等,皆夤缘登榜。其贪横如此,尚知有朝廷法纪哉!"

末又指"通内"一事。时缇帅骆养性细刺昌时与延儒通贿诸款,具事件上闻,诸奄亦尽发延儒蒙蔽状,复遣缇骑逮延儒对勘,而三俊以举用昌时引罪回籍。延儒就逮,将所居楼阁三楹尽行焚毁,盖生平宝藏,咸集于此。紫貂帐以十计,清河参有一只重十两者,金珠非最上乘不能登此楼。焚时,火焰皆作五色云。

蒋拱宸疏参宜兴及吴昌时,内有"通内"一事,为上所最忌。七月二十五日,召府部九卿科道廷鞫,上角素,率太子与定王同讯。呼昌时前,诘其通内,上声色俱厉。昌时辨:"祖宗之制,交结内侍者斩,法极森严,臣不才,安能犯此?"上呼蒋拱宸面质,拱宸战栗,匍伏不能措一语。上愈怒,叱退拱宸 - 103 -

,然上意已有成局,不待拱宸之对质也。昌时始终不为屈,曰:"皇上必欲以是坐臣,臣何敢抗违圣意?自应承受。若欲屈招,则实不能。"上即命内侍用刑,阁臣蒋德、魏藻德出班奏曰:"殿陛之间,无用刑之例,伏乞将昌时付法司究问。"上曰:"此辈奸党,神通彻天,若离此三尺地,谁敢据法从公勘问者?"二阁臣奏:"殿陛用刑,实三百年未有之事。"上曰:"吴昌时这厮,亦三百年未有之人。"二阁臣口塞,叩头而退。内侍遂进用夹,两胫皆绝,昏迷不省人事,乃命下锦衣卫狱,昌时已不能行,卫役负之以出,进见卫帅骆养性曰:"请受刑。"养性曰:"汝甫受刑,尚不省人事,且俟后审。"越数日,卫审一如廷鞫,语不稍屈,乃刑其两家人,亦终无所招,后有旨:"送法司。"咸谓有生机矣。不数月而斩决之旨下。先是,韩城之逮也,昌时本无所置力,而掠之居以为功。王陛彦临刑恚恨曰:"吴昌时杀我也!"旁人皆为咋舌,而昌时更扬扬自得也。及是,奉旨:"吴昌时着即会官斩决。"与王陛彦之旨同,人以为有天道焉,其实不尽然也。

逮张国维下狱。时追论其中枢误国之罪,故部拟"赎徒。"有旨:"张国维中枢溺职,一徒岂足蔽辜,还着再拟具奏。"

九月。廷对策士,赐杨廷鉴、陈名夏、宋之绳进士及第有差。

上点礼部尚书李建泰、左副都御史方岳贡,俱以原官兼东阁大学士入阁办事。岳贡守松江十五年,以钱粮拖欠,停俸督徵,故久稽不迁。今春入觐,有以岳贡操守廉洁荐者,上特授左副都御史。适吏部某以某事奉旨诘责,尚书李遇知曰: "臣正行纠驳。"岳贡云: "何不即行题参?"一语深当圣意,遂同建泰入阁。从来阁臣无带都御史衔者,亦变例也。

给事中时敏,例推金华太守,敏求援于岳贡。岳贡令急进一条陈,疏方具, 忽奉严旨: "下部议处。"众相讶不解所谓,及例推本上,岳贡票旨: "时敏方在议处,何得遽行升擢?员缺另推。"议本上,奉旨: "时敏着降三级照旧管事。"仍严然文郎矣。

周延儒赐死。宜兴逮至旅邸候命,所挽回者,不遗余力,欣欣向荣之念。 及是夜半,而勒令自尽之旨下,宜兴从幞被扶起听旨。旨内先历数其罪,至姑 念句,内奄止不即读,宜兴意有非望,稽首称圣恩者再四。奄候其稽首毕,始 宣"着勒令自尽。"宣兴悸魄丧魂,左右不能自持,绕屋而走,妄思窜逸,缇 帅令二缇骑执持之,延至四鼓,缇帅乃勉强从事。又宜兴素服参附,气断矣 ,四肢犹暖润如生,缇帅惧有他虞,急以钉钉入脑门,始敢复命,较之韩城为 尤惨云。先是,上与阁臣语及宜兴曰:"朕恨其太使乘。"晋江以告宜兴。曰 :"事如此英主,不使乖,不得也。"周仲琏费四万金,乃免于难。

上特起沈自彰为文选郎中,改四川布政张法孔为职方郎中,加太仆卿衔

, 皆以其有廉名也。

上禁诸臣服饰,袖长不得过一尺,宫中尽撤金银等器,俱用陶器,并谕诫诸臣,不得擅用金银。说者谓黄钟大吕,清庙明堂之器,文质彬彬,斯为美矣。 (塞极则鬼,君子病之。今以玉食万方之主,而降为污尊怀饮之事,是貉道也,何以能久。

北兵退后,京城瘟疫盛行,朝病夕逝,有全家数十口一夕并命,人咸惴惴 虑其不免。上时令张真人建醮祈安而终无验,日中鬼出为市,店家至有收纸钱者,乃各置水一盂于门,市者令投银钱于水,以验真伪。民间终夜击铜铁器声,以驱厉出,示声达九重,上不能禁。景色萧色,早知有黍离之叹矣。

宫中有□库累朝不开,上至是忽欲开阅。珰以从来未开为言,而上意甚坚,珰不敢逆,开进,空无所有,止后架贮小红箱一只,捧至,预书崇祯某年某月某日开。上以其预定也,益异之。及启视,止盛画三轴:其一则无数军民,相背而立,上曰:"此殆言军民背反耶?"其二,则无数官吏士民,俱若仓皇逃窜之状,上曰:"嘻,乱离不远矣。"其三,则止有一人被发赤体,其貌则俨然御容也。群珰相顾动容,上怃然不乐而出。

是年正月,李贼围承天,知府某开门迎贼,巡抚宋一鹤、钟祥知县萧汉皆死之,巡按李振声迎降,与贼通谱。饮天监博士杨永裕亦降,请发显陵,忽大声起山谷若雷震,贼惧而止。贼至黄陂,知县某挈印走,贼设伪官,士民杀伪官,贼怒,反兵屠之,遂陷德安。黄州守将王允成弃城东下,方国安诸贼退屯汉口,左良玉亦东下。

江陵举人陈万策、李开先为贼侍郎喻上猷所开荐。贼檄下,万策自缢,开 先触墙死。

献贼袭陷蕲州,屠之,兵备许文岐徇难,复陷蕲水,亦屠之。

二月,湖广贼陷澧州,又陷武冈川,岷王遇害,随合于闯。闯贼令老犭回 犭回守承天,罗汝才守襄阳,而自攻郏县。知县李贞率士民坚守,杀贼甚众 ,力竭乃陷。李贞骂贼不已,贼怒,褫其衣冠,倒悬于地,贞大呼曰:"高皇 帝有灵,我必诉之,愿为厉鬼以杀贼!"贼愈怒,断其舌,剐之;母乔氏及妻 俱死。贼还屯荆州。

五月,李贼攻常德,巡抚陈睿谟逃,城遂陷。嗣是辰、岳相继俱陷。献贼 自蕲水一夕驰至黄州,乘大雾攻城,城遂陷,原任副使樊为城骂城,贼刺之 ,洞胸死。麻城周文江降,贼署为伪知府。

闯贼袭杀革里眼、左金王、并其众。时群贼俱奉闯贼约束,惟革里眼不相下,闯贼置酒宴左、革,杀之席上。革里眼,即贺一龙也。

四月, 闯贼突入罗汝才营, 即其帐中斩之, 并杀其谋主袁圭。

五月,贼攻袁时中,杀之。时中初合于闯,闯许配以女。至是,时中通款于河南巡按苏京,又擒闯贼零骑请攻剿,故杀之。

五月,献贼逼武昌。时议募兵守城,而库藏空虚,三司长诣楚王请贷数十万,王不应。募兵皆谓宜募土著。适承德溃兵东下,楚王尽招之,号为"楚府兵。"乃献贼陷汉阳,临江欲渡,武昌大震,议撤江上兵,婴城而守,都指挥崔文荣曰:"磨盘、煤炭诸洲,浅不过马腹,纵之飞渡,而婴城坐困,非策也。"议者不从,贼果从煤炭洲南渡,直逼城下,攻武胜门,文荣率军御之,多杀伤。而楚府新募兵,开门迎战,文荣跃马持矛大呼,杀贼三人,贼攒刺之,死。旧辅贺逢圣合家投塾子河死。长史徐学颜与贼格斗,左臂断,右臂持刀扑之,贼脔之。游击朱士鼎为贼所执,戟手大骂,贼去其左右手,自沉于江死。贼执楚王,尽取宫中藏金,辇数百车不尽,楚人于是憾王之愚也。贼沉王于江,屠戮士民数十万,沿江积尸千里。其幸存民,或刖手足,或凿自鼻,无一全形者。

闯贼陷保康,知县石维坛死之。别贼至禹州,守将杨芬、张朗降。

七月,总督孙传庭发兵潼关,以总兵牛成虎、卢光祖为先锋,会河南总兵 卜从善、陈永福,合兵雒阳之下池寨,檄左良玉赴汝宁夹击。令副总兵高杰将 降丁为中军,总兵王定官抚民,率榆、宁二镇兵为后劲。

总兵方国安合副将徐懋德、马士秀等由蕲州进发,夜击贼于大冶,斩首千级。前锋既胜,左镇诸军并进,献贼令贼将守武门为浮桥于金口,悉众西渡向岳州。

八月,孙传庭师次阌乡,闾贼亦进,尽发荆、襄诸贼,会于河南。牛成虎前驱,遇贼于雒阳,击败之,再击于河岸,又败之,追走至汝州,成虎以孤军 无继,退屯渑池。

丙寅,方国安等复黄州,斩伪官。癸酉,诸将进次杨逻堡,距武昌三舍。 监纪推官吴敏师联络蕲、黄义勇万人,与师会,总兵常安国以舟师先进,转战 金沙洲,夺贼百艘。丙了,诸将齐至武昌,献贼出战,大败,遂西走,陷咸宁 、蒲圻,距岳州百里,湖南巡抚李乾德、总兵孔希贵,尽移居民远徙,而伏兵 于内,开门迎贼,贼入,伏兵尽发,尽歼之,留四贼,各割一耳,贯箭纵回。 献贼怒,益来攻,乾德虚立营垒,下伏大炮,而积薪其上,贼以火攻之,大炮 发,杀贼数千。贼愈怒,悉众围岳州,百道并攻,遂陷,乾德、希贵走长沙。 戊寅,贼至湘阴,城已一空,献贼登舟南渡,忽大风起,覆舟,溺死贼数千 ,复还岳州,尽杀所掠妇女,焚其舟。陆行抵长沙,士民空城走,乾德奉吉王 、惠王走衡州。守将尹先民迎降,推官蔡道宪不屈,杀之。健卒林俊等,解衣 裹尸,葬道宪于南郊,俱自缢。 九月,孙传庭次汝州,伪都尉四天王李养纯率所部来降,知贼在宝丰,传庭进围宝丰,贼坚守不下。闯贼以轻兵来援,白广恩、高杰、卢光祖逆战于城东,败之。次日,复以精骑数千,直攻官军,复击走之。传庭曰:"宝丰不急下,而援兵大至,贼腹背受敌矣。"亲督诸军,悉力攻城,拔之,斩伪官陈可新等千余人,遂以大兵捣唐县。时贼家口尽在唐县,官兵入城,尽杀之。甲辰,传庭复郏县。县甚穷,官军乏食。闯将将精骑万余逆战,官军击断闯贼坐纛,三战三胜,闯将奔襄城,官军进逼之。时河南所在饥荒,官军馈粮不继。壬子,兵噪于汝州,降盗李际遇阴通贼。癸丑,贼率精骑大至,传庭问计于诸将,高杰请战,白广恩曰:"师老矣,宜分据要害,步步为营,以图万全。"传廷恐贼遁,曰:"将军何怯也,独不如高将军耶?"广恩不怪,引所部八千人南走。贼设伏以待官军,官军接战,陷贼伏中,大败。高杰乘岭上望之,曰:"不可支矣。"麾众急退,官军大奔,贼驱大队来,追至孟津。是役也,士卒死者四万余人,尽丧其军资甲仗,传庭与杰走河北。戊午,闯贼向潼关,白广恩击走之,传庭亦加军潼关,众尚有四万人。

献贼袭陷衡州,桂王及吉、惠二王走永州,献贼复追之,湖南巡抚刘熙祚 遣兵护三王入广西,而自入永州拒守。奸人内应,熙祚不屈遇害。戊戌,官军 复岳州,尽诛伪官。献贼东犯江西萍乡。

十月辛酉朔,副总兵沈万登复汝宁。是日,贼将军马司尚志莅任,万登拥众突入,诛尚志,并杀诸伪官。时襄、雒豪杰并起,万登与毛显文、刘洪起皆起布衣,聚众数万,各保寨以逐贼。闯贼伪授万登威武大将军,不受。凤督马士英承制,授为副总兵。

闯贼遣弟一只虎陷阌乡,遂攻潼关。闯贼间道缘出崖出潼关后,官军大惊,遂溃,贼尽入关掠。传庭、白广恩退屯渭南,贼合众十余万陷渭南,传庭阵亡,知县杨暄死之,随陷商州,商雒道黄世清死之,直抵西安,巡抚冯师孔督兵出战,被执不屈死。西安陷,按察使黄纲自尽,长安知县吴从义、指挥崔尔达、秦府长史章尚纟,俱投井死。乡绅右都御史焦源溥、御史王道纯、礼部主事南居益、都司使邱从周,俱骂贼死。宣府巡抚焦源清、山西参政田时震,俱不受伪职死。磁州兵备祝万龄自经。学官山东佥事王徵七日不食死。举人席增光、朱谊俱投井死。而左布政陆之祺、总兵白广恩俱降。闯贼据秦王府,授秦王伪将军世子,妃刘氏曰:"国破家亡,愿一死!"闯贼遣归母家。秦藩富甲天下,尽为贼有。贼分兵徇诸县,蒲城知县朱一统抱印投井死,中部知县华堞与一妻一妾俱自缢。贼改西安为长安府,榜掠巨室助饷。

献贼陷袁州,令贼将邱仰寰居守。左良玉遣兵攻袁州,参将高山奋身先登,斩贼数百级,擒斩邱仰寰,遂复袁州。

献贼至长沙,突至吉安,官军惊溃,兵备岳虞蛮逃,城复陷,贼复入袁州

十一月,闯贼命贼将由斌守西安,而自往延安大会群贼。分五百骑按行,凤翔守将诱而杀之。闯贼怒,亲攻凤翔,陷之,屠其城。遂逼榆林,兵备都任及原任总兵尤世威、王世显、侯世禄、惠显、侯拱极等,敛各堡精锐入镇城,歃盟誓神,推世威为主,协力拒守,贼诱说三日不听。贼四面环攻,城上强弩叠射,贼死尸山积,贼攻益力,逾旬日不克,贼以冲车环城穴之,城崩数十丈,贼乘势拥入城,遂陷。都任各家自缢死。尤世威纵火焚其家百口,挥刀突战死。诸将各率所部巷战,杀数千贼,至死无一降者。合城妇女俱自尽,无一受辱者。贼攻甯夏,总兵官抚民迎降。贼攻庆阳,坚守四日,力屈,城陷,守、巡二道段复兴、董琬、乡绅太常少乡麻禧俱死之。贼屠庆阳,执韩王。

献贼知官兵陷岳州,沿江设伏,而令贼千人,以巨舰载辎重顺流下,副将王世泰、杨文富邀击之。贼佯走以诱官军,官军溯流争上,尽夺辎重,贼伏发,四面夹攻,官军大溃。贼复入岳州,左良玉令马士英趋长沙,马进忠等趋袁州,士秀等复临湘,进逼岳州。贼将混天龙统万人乘轻舟迎战,士秀三分其军,绕贼舟后反击之,贼大败,趋入城,士秀麾诸军登岸,急攻之,贼突门出,走长沙,遂复岳州。马进忠等进薄袁州,贼西走,遂复袁州,尽诛诸伪官。总督吕大器亦统兵复吉安。

杀太监刘元斌。元斌监国讨贼,贼在陕雒,元斌留归德不敢进,纵兵大掠,杀樵汲者冒功。及论辟,未得旨,即奏辩,上怒诛之。

十二月,闯贼徇西北庄浪、凉州二卫,俱降,遂围甘州,乘夜雪登城,巡 抚林日瑞、总兵郭天吉、同知蓝台等皆死之。杀军民四万七千余人,余处俱投 降,惟西宁卫固守不下。

十七年甲申正月庚寅朔,大风震屋扬沙,咫尺不见,占曰: "风从乾起,主暴兵至,城破。"癸丑夜,星入月中,占曰: "星入月中,国破君亡。"时闯贼僭伪位于西安,伪号"大顺,"伪元"永昌。"宋献策伪军师,牛金星伪丞相。设伪六政府: 伪吏政宋企郊,伪户政杨建烈,伪礼政巩育,伪兵政喻上猷,伪刑政陆之祺,伪工政李振声,皆明臣降贼者。

上困寇氛孔棘,临朝,向阁臣叹曰:"贼势如此,阃外无人承认,府库殚竭,将如之何?"李建泰奏:"主忧如此,臣敢不竭驽力,臣家曲活,愿以家财佐军,臣请提兵。"上大喜,慰劳再四,曰:"卿若行,朕当访古推毂礼,亲饯卿郊外,不敢轻也。"建泰退,即具揭,题用卫贞固、凌回,又题郭中杰加副总兵衔管中军事,又请马兵五百及旗牌等项,遂于二十六日启行。上预传:"至期行遣将礼,朕御正阳楼宴饯督辅,并召内阁五府部院掌印官侍坐

- ,鸿胪赞礼,御史纠仪,大汉侍卫,应用法驾宴桌,该衙门预备。"上又命查《大明集礼》中遣将授钺告庙礼,看议酌行,是日乙卯,上御正阳门楼亲饯之,曰:"先生此行,如朕亲征。"建泰受饯,叩首谢恩,既去,上目送久之。返驾,复大风沙。占曰:"不利行师。"
- 二月,闯贼统众四十万,从禹门渡黄河,陷绛州、曲沃、临晋、河津。破蒲州,旧辅韩广死之。破平阳,知府张嶙然迎降,巡道李士焜逃,总兵高杰退至泽州,沿途大掠,贼遂薄太原。时初六日也。巡抚蔡懋德遣标下骁将牛勇、朱孔训出战,孔训伤炮死,牛勇阵亡,一军皆没,城中夺气。懋德知事不可支,写遗表令贾士章走京师上闻。中军盛应时先杀某妻子,誓将死敌。初八日,风沙蔽天,贼夜乘风登城,懋德应时赴斗死。布政赵某、副使毛某及府县乡绅等官,共四十六员,皆死之,晋王遇害。

上传工部尚书范景文、礼部侍郎丘瑜, 俱以原官兼衔, 入阁办事。

上御书亲敕督辅: "朕仰承天命,继祖宏图,自戊辰至今甲申,十有七年矣,兵荒连岁,民罹干戈,流毒直省。今卿代朕亲征,鼓励忠勇,选拔雄杰。其骄怯逗玩之将,贪酷倡逃之吏,当以上方剑从事,行间一切调遣赏罚,俱不中制,卿宜临事而惧,好谋而成,真剿真抚,扫荡妖氛,旋师奏凯,勒名钟鼎。须代朕至意,遍行示谕。"

建泰甫出都,师次涿州,营兵逃归者三千人。过东光,兵不戢,士民闭城 拒守。建泰怒,留攻三日,破之。至广□,绅衿城守不纳,亦留攻三日,破之 ,杀绅王佐等及知县张宏基。

闯贼至忻州,官民迎降。进攻代州,总兵周遇吉固守,连战十余日,杀贼万余,贼悉众来攻,遇吉退守宁武关,贼复逼宁武,遇吉连发大炮,杀贼近万人。会火药尽,有请款者,遇吉曰: "三日内杀贼且万,若辈何怯耶?能胜之,一军尽为忠义;若不支,缚我以献。"于是开门奋击,杀贼数千人。贼惧,欲退,或为贼谋,请分为十队,更番迭战,且去帽为识,有帽者辄杀之。贼乃引兵复进,去帽以自别,官军不能支,城陷,遇吉纵火焚其家,而自挥短刀力斗,身中流矢,牙兵俱尽,遂见执,骂贼甚厉,贼怒,缚于市磔之,屠宁武。

太常寺少卿吴麟徵请弃关外宁远、前屯二卫地,徙总兵吴三桂入关,屯兵近郊以卫京师,廷臣皆以失地非策,莫敢主其议。

上谕: "吴昌时着即会官斩决。其财产并罪辅周延儒贮产籍没充饷。"上 又谕: "周延儒见贿忘法,本当全没家产,今量追十二万,着周肖儒、周奕封 完纳;吴昌时量追五万,俱免籍没。"

上命太监阎国辅等, 赉饷往蓟、宁等处给军。时始闻山西全陷。

上分遣太监监制各镇: "卢维宁往通、津、临、德,方正化往真、保,杜 勋往宣府,王梦弼往大名、广平,阎思印往顺德、彰德,牛文炳往卫辉、怀庆 ,杨茂林往大同,李宗化、张泽民往蓟镇中、西二协。

上特升兵部都给事张缙彦为兵部尚书, 又令兼翰林学士。

闯贼至大同,军民皆降,总兵朱三乐自刎,巡抚卫景瑗、兵备朱家仕、粮储徐有声皆死之。庠生李若葵合家九人,俱自缢。先题曰:"一门完节。"代王遇害,贼杀代府宗室殆尽。

上召忻城伯赵之龙、抚宁侯朱国弼中左门面对。乃命国弼总漕淮安,之龙 掌南京中军都督府印,管守备事。

闯贼陷真定。先是,知府丘茂华闻城警,预定令家眷出城,巡抚徐标下茂华于狱。标中某某,伺标登城指画守御时,乘不意,掖而投之城外,杀之,从狱中拥茂华出,茂华遂檄所属州县,预备迎贼。数日后,贼始以百骑来受降,时二十二日也。二十三日,上召诸臣面对。先是,左都御史李邦华密疏请""择大臣奉太子南行,臣等辅皇上固守。"圣意颇以为然。大学士陈演微泄之。是日召对,庶子项煜面具小疏,极言当南巡者八。上曰:"国君死社稷,正也,朕死决矣!"大学士范景文同邦华拟申前请,给事兴时亨大声曰:"奉太子往江南,诸臣意欲何为,将欲为唐肃宗灵武故事乎?"二臣乃不敢言。已而,上命魏藻德升兵部尚书,督师津、德,方岳贡升户部尚书,督漕临、济。意拟从范、李二臣之请矣。既而,复撤前命。或云:"时传闯贼已南下,故止之。"

三月,大学士陈演、蒋德罢。演以多赀,不敢出京,遂及于祸。 上召张国维于狱,同庶吉士史可程、举人朱长治中左门面对。 昌平兵噪,焚劫城中,巡抚何谦以闻,有旨:"何谦戴罪供职。" 初四日壬辰,钦天监奏:"帝星下移。"

诏封各总兵吴三桂平西伯,左良玉宁南伯,唐通定西伯,黄得功靖南伯,俱给敕印。刘泽清实升一级,刘良佐、高杰、马科、姜襄、孔希贵、葛汝芝、许定国、王承允、刘芳名、李栖凤、曹友义、杜允登、赵光远、卜从善、杨御蕃、马岱、黄蜚、高第各升一级,督抚马士英、王永吉、黎玉田、李希沉各加升二级。

诏总兵吴三桂、刘泽清、唐通帅师入援。三桂、泽清不奉诏,惟通以二千人至。陛见,上慰劳再三,同太监杜之秩守居庸。

大庸伯张国纪进助饷银万两,晋封为侯。

上召文武大臣及科道于中极殿,问御贼之策。有言"守门乏人,请考选科道。"余皆"练兵加饷"套语。驸马恐永固面奏:"贼势猖獗,官兵畏贼如虎-110-

,祈简才望大臣,重守都城,圣驾南巡,徵兵亲讨,臣号召京畿义勇,可从十 万众扈从起行。"上意不决,诸臣皆言其诞妄。既退,议分守九门,稽察出入 。召见庶吉士于中左门,特命陈名夏升修撰,兼户、兵二科给事中。

闯贼陷宣府, 叛将白广恩先移书约总兵姜襄降, 太监杜勋出城三十里迎贼 入城, 执巡抚朱一冯杀之, 巡按霍达逃。

命给事中韩如愈、马嘉植催解浙直京边正项并改折赃赎,及周延儒、朱大典、吴昌时等赃银督解。时贼信已急,诸臣咸思南窜,故二人营谋此差。如愈曾疏论刘泽清,过东昌,泽清遣人杀之。

晋封嘉定伯周奎为侯,上遣太监徐高宣诏求助。谓: "休戚相关,无如戚臣,务宜倡自十万至五万,协力设处,以备缓急。"奎谢曰: "老臣安得多金?"高泣谕再,见其坚辞,拂衣起曰: "老皇亲如此鄙吝,大事去矣,广畜多赀何为?"奎自具疏,勉助一万金。太监王永祚、曹化淳等有助三万五万者。王之心富第一,上面谕之,对以家计消乏,仅献一万,后之心为贼拷掠现银十五万两,金银什物称是。周奎抄出现银五十三万两,什器缎疋无算。

上命张国维仍复原宫,总督浙直兵饷。初,国维就逮,辇揣知库岁空虚,朝廷首急军饷,乃倡开事例一法:杀人行劫者,皆得输金赎罪。谓:"国维一至江南,数百万可立致。"上惑其说,先谕刑部:"张国维附和罪辅,蒙弊君上,本当重治。念方士亮等轻拟,着免罪候用。"至是,有总督浙直之命。时贼警已逼,遂连夜疾趋,中途已闻变矣。过苏州时,江南尚无所闻,应抚已移镇,镇江绅衿共留国维,即于苏州抵住以资弹压。国维自揣皇上已徇难,大位未定,事不可知,决意南归。俟宏光即位,诸事就绪,始抵苏州莅任。

临清总兵刘泽清虚报大捷,赏银五十两。又诡言随马被伤,再赏药资四十两。命速赴保定剿贼,泽清不从,即于是日大掠临清,统兵南下,所至焚劫一空。

闯贼陷保定。贼至城下,李建泰迎降,中军郭中杰缒城降,兵溃,遂陷。 同知邵宗元佩府印被执,不屈死之。乡绅御史金毓峒分守西府,贼执之谒伪将 ,毓峒奋拳殴贼,投井死,妻王氏自缢,侄振孙系武举人,登城射贼,应弦立 毙,贼撵杀之。毓峒女陈氏,年十八,尚未嫁,与其祖母张氏、母杨氏、嫂氏 ,同时投井,张氏抱其孙于怀同下,侍婢亦从而下。知府方文耀见城破,即自 杀。

十三日,各城门分设红夷大炮,给守城军每名黄钱百文。连日日色无光,是夜风色阴惨,沙尘刮天。

上命襄城伯李国祯团练京营兵, 又命太监曹化淳督理城守。

十五日癸卯, 日色益晦, 正阳门外伏魔庙杵忽自中劈, 又南京孝陵夜哭。

闯贼叩居庸关, 总兵唐通、太监杜之秩迎降。

总督王永吉兵败,陷贼,贼纵之归。本兵张缙彦为请召对,阁臣疑之,叩 缙彦以永吉来意。缙彦初不言,固问之,乃云:"李自成有二策,请上择之

:一如汉楚故事,画地为界;一解归诚以大将军辅政。"阁臣大骇,遂票旨

: "王永吉丧师辱国,不准召对。"

闯贼至昌平,军民争降,总兵李守钅荣力格杀数贼,贼撵刺之,乃拔刀自 刎。乡绅张罗彦自杀,巡抚何谦南奔。

十六日,上御殿,召考选各官,问以治饷安民,滋阳知县黄国琦对曰: "裕饷不在搜括,在节慎;安民系于圣心,圣心安,则民心安矣。"上首肯,即面授给事中。余递奏本半,忽秘封呈进,览之色变,即起入内。久之,谕各官退,始知为昌平失守也。闯贼破昌平,将十二陵享殿悉行焚毁,随分兵掠通州粮储。

十七日,上召文武各官。上泣下,诸臣亦相向泣,束手无计。上书御案 ,有"文臣个个可杀"语,密示近侍,随即抹去。是日,襄城伯李国桢领京营 兵出城立营,城下数万人,一时溃散。夜漏半,曹化淳开广宁门迎贼入,守城 勋卫皆逃。御史王章,贼呼之降,不应,遂杀于城上。给事中光时亨即长跪迎 降。

贼军师宋献策占十八无雨,则京师不可破;有雨,则一攻即下。至是日 , 黄沙障天, 忽而凄风苦雨。良久, 冰雹雷电交至。时贼已屯西城下, 火炮飞 入城中,西城竟日无人敢行。近暮,定武桥南火起,始知外城已陷。奄走告上 ,上曰: "京营兵何在?李国桢练兵何在?"奄曰: "皇爷安得有兵? 京营兵 皆散,今惟有劝皇爷走耳!"先是,十五夜,上复召巩永固问以前策,永固对 曰: "贼前尚远,人皆畏贼,六龙南幸,从者必多,今贼已逼近,人心瓦解 ,从行者臣不误,误陛下也。"上颔之。及是夜,叛奄杜勋至城下,呼王相尧 缒城入讲,或欲留之,勋曰:"我家万岁爷爷,威势盛强,不反命者,立屠京 师矣。"遂纵去。一鼓,上召新乐侯刘文炳及巩永固,令速带家丁护驾。二臣 曰: "臣等何敢私蓄家丁,所有家人,岂能当贼?"上亟退,召太监王承恩入 , 密语移时, 急令出部署丁为巡南计。又别传朱谕至内阁, 命成国公朱纯臣提 内外诸军,夹辅东宫,留守京师。已而,呼酒与周后、袁妃同坐痛饮,慷慨诀 绝。妃先起,上拔剑砍之,毙。后急返坤宁宫,自缢,上视之曰: "好,好。 "长平公主在旁哭不已,上叱之曰:"汝奈何生我家?"亦刃之,公主以手仰 格,臂断,闷绝于地上。又令太子定王出避民间,尽去本等冠带,戒谕:"今 后慎毋露帝皇家形迹。"时承恩复命,上即微服杂内奄出东华门,至朝阳门 , 托言王太监奉出城, 守者请以天明请验, 扈从者夺门, 守者反炮击之, 不得 - 112 -

出。朝阳系朱纯臣所守,急诣纯臣第,阍人辞以赴宴未回。上叹息而起,复走安定门,门闸坚不可举。天将晓矣,乃返厚载门,散遣内丁,随以永王、定王分送外戚周、田二家,手携王承恩入内苑。是夜,阁臣方岳贡直宿精微科,四鼓,中涓口传圣谕:"内阁诸先生速赴行在。"亟叩之,云:"倘圣驾已同巩驸马、王太监出宫矣!"太子叩嘉定门,周奎高卧不起,门役不纳,乃走匿内奄某外邸。

十九日丁未,阴云四合,城外烟焰障天。宣武门守门太监王相尧领内丁千人,开门迎贼,伪将刘宗敏整军人,军容甚肃。张缙彦守正阳门,朱纯臣守朝阳门,一时俱开,二臣迎门拜贼。贼登城,杀兵部侍郎王家彦于城楼,刑部侍郎孟兆祥死于城门下,兆祥子进士孟章明,同母何氏、妻王氏,自杀于寓。

尚衣太监何新见公主仆在未起,曰:"贼已将入,恐公主遭其辱,且至定府中避之。"乃负之出,宫人魏氏大呼曰:"贼入大内,我辈必遭所污,有志者早为自计!"遂跃入御河死,顷者从死二百余人。群贼入城,取道演象所,群象皆泪下如雨。

殉难者:太学士范景文投井死,户部尚书倪元璐从容自缢,左都御史李邦 华自缢于先文信国祠中。左副都御史施邦耀,大理寺卿凌义渠,太常寺少卿吴 麟徵,太仆寺丞申佳允,给事中吴甘来、周而淳,御史陈良谟与妾时氏、陈纯 德、赵讠巽,吏部郎中刘廷谏,主事许直,顺天推官刘有澜,兵马姚成,锦衣 卫指挥李若、王国兴,中书宋天显,俱自缢。庶子周凤翔于二十一日自缢。

中允马世奇与妾朱氏、李氏同缢。修撰刘理顺同妻万氏、妾李氏、子举人某、婢仆十八人俱自缢。检讨汪伟同妻耿氏左右,缢于堂中。武库司郎中成德、金铉同母章氏、妾王氏、弟王员金钅宗,俱投井死。光禄署丞于腾蛟,服冠服,呼妻亦服礼服同缢。生员曹文耀妻张氏,生四子一女,城破,张氏率子女哭于家祠,同文耀庶母姜氏、二媳李氏、邓氏及乳母孟氏八人同缢。居氏田某合家自焚。李小槐同妻杜氏二子一女一婢,俱自缢。内官白某亦自缢。

新乐侯刘文炳,集男妇共十六人,登楼自焚;其弟刘文耀,同祖母瀛国太夫人投井死,时年九十余。

彰武侯杨崇善自缢,惠安伯张庆臻合门自焚,宣城伯卫时春率妻孥同投大井中,无一存者,都督周镜自尽。

驸马巩永固,公主柩尚在堂,同子女四人,坐堂中纵火自焚。

逆闯入宫,问帝所在,大索宫中不得。伪尚玺卿黎志升进曰:"此必匿民间,非重赏严诛不可得。今日大事,不可忽也。"乃下令:"献帝者赏万金,封伯爵,匿者夷其族!"至二十二日庚戌,得先帝遗魄于后苑山亭中,与王承恩对面缢焉。先帝以发覆面,自补合蓝袍,白绸裤,一足跣,一足有绫袜-113-

,红方舄,袖中书一行云: "因失江山,无面目见祖宗于天上,不敢终于正寝。"又一行云: "百官俱赴东宫行在。"二十三日辛亥,殓先帝、先后于东华门,梓宫二,先帝用丹漆,先后用黝漆; 加先帝翼善冠,滚玉渗金靴,先后袍带亦如之,同移庵内。主事刘养贞以头触地,大恸,诸臣哭拜者三十人,拜而不哭者六十人,余皆睥睨过之。叛阉某献太子,逆闯留居西宫,封为宋王,太子不之屈。

宫人费氏,年十六,投智井,贼钩出之,赏贼将罗某。费氏绐曰:"我帝家人也,义难苟合,惟将军择吉成礼,死生惟命。"贼喜,卜日置酒极欢,费 氏怀利刃,候贼醉,断其喉,立死,费氏即自刎。

从贼者:大学士李建泰,兵部尚书张缙彦,户部侍郎党崇雅,礼部侍郎杨 汝成, 工部侍郎叶初春, 少詹事杨观光、项煜, 谕德何瑞徵、杨士聪, 修撰杨 廷鉴、陈名夏,编修梁兆阳、高尔俨、李士淳、薛所蕴、赵玉森,庶吉士吕崇 烈、成克恐、张之奇、杨明朗、张端、黄灿、张元琳、刘余谟、鲁梁、魏天赏 、刘廷琮、何九云、刘肇国、张元锡、李化麟、姚文然、高珩、胡统虞、傅学 禹、罗献文、白允谦、何允光、龚鼎孳、赵频、李呈祥、傅鼎铨、刘世芳、周 钟、魏学濂、朱积、吴尔埙、杨栖鹗、王自超、史可程、梁清标,右通政赵京 仕,通政参议宋学显,尚宝卿吴家周,太仆寺丞李元鼎,给事中刘昌、戴明说 、孙承、傅振铎、申芝芳、时敏、米徽、翁元益、郭充、高翔汉、金汝砺、介 松年、龚鼎孳、杨枝起,御史柳寅东、朱朗荣、马贞固、傅景星、蔡鹏宵、裴 希度、涂必泓、韩文铨、陈羽白、熊世懿, 吏部沈自彰、左懋泰、熊文举、王 显、侯佐、杨元锡、吴孳昌、郭万象,户部王凤林、金震出、卫周祚、程之、 刘显绩,礼部黄熙允、汤有庆、吴之琦、张琦、刘大巩、朱芾煌,工部潘同春 、缪元、邹魁明、方允昌、黄徽允、李登云、吕赵龙、秦、冯秉清,司务孙节 ,大理寺正钱位坤,行人胡显、李丕著、张元辅、东允谦、李之奇、许作梅 , 王予曜、沈元龙, 国子博士李森先, 学正王皋, 光禄监事林铭球, 顺天照磨 龚彝、侯以头,考推官施凤仪,知县彭三益、黄国琦、孙以敬、王孙蕙,进士 武愫、徐家麟、吴刚思。

逆冯入都,首先劝进者,陈演、朱纯臣也。向贼叩头求用,指斥先帝为无道者,魏藻德也。从狱中出而为贼策下江南者,张若麒也。其颂贼为救民水火,神武不杀者,梁兆阳也。代贼焚毁太庙神主者,杨观光也。大负先帝委任,终以拷掠死者,李国祯也。先帝求金不应,东宫出亡不纳,终赍盗粮,尽为贼有,负君辱国,贻恨千古者,周奎也。至叛奄曹化淳、王相尧辈,不足诛矣

平西伯吴三桂,如清乞师。二十七日,三桂以清兵至山海关。先是,三桂

闻京师失守,先帝殉难,统众入关投降。而三桂父吴襄,故辽东总兵也,逆闯 李自成执襄诛求金宝,索诈甚酷,三桂知之,即时返师出关,适清摄政王统兵 将入大同,中途相遇,三桂即剃发诣营,叩首诉冤,愿假大兵复仇,歃血立誓 。摄政王为撤兵西行。逆成闻三桂之来而复去也,急统马步兵四十万追之,刘 宗敏、李过等皆从,并挟太子、二王东行,追及三桂于关外。三桂见贼甚盛 ,不敢迎战,入启摄政王。摄政王令三桂先与交锋,而自登高望之,待三桂将 败, 即挥英王、豫王分左右翼以进。时逆成亦挟太子登高冈督战, 贼众三面围 三桂,势危甚,忽有白标兵二队,绕出其后,如发风涌潮,所到之处,无不披 靡。逆成顿足叹曰:"此必北兵也,三桂真挟北兵来耶?"急策马走,贼众大 溃。次日,令降兵部郎张若麒,奉太子如三桂营请罢兵。三桂留太子,而益治 兵,破逆成于关内。逆成驱贼连营进发,三桂悉锐出战,清兵助之,贼众大奔 , 自蹂践, 死者十余万人, 杀其渠帅五人。逆成走永平, 三桂又追败之, 逆成 奔还京师。时四月二十四日也。三桂同清兵压城而军, 逆成遂杀吴襄, 并杀其 家口三十八人。二十九日,逆成出阜城门西走,纵火烧诸宫殿,又烧九门雉楼 ,火光烛天。三桂遥望城中火起,知贼已走,追至保定,奋击败之,再败之于 定州北。逆成愤极,复勒劲卒返击三桂,三桂以清铁骑冲坚突入,斩其渠帅数 人、首万余级, 逆成中流矢堕马, 掖而骑,疾驰还营, 即拔营归陕西。三桂复 以清兵掠陕西, 逆成尽出锐卒迎战, 大败, 刘宗敏、田见秀等皆死, 逆成乃弃 西安,由商雒入郧、襄,渡江趋武昌。逆成屡败之后,每行军,大队在前,己 率数十骑在后。一夕,大风飞沙,对面不相睹,逆成同二十八骑趋通山,登九 宫山, 乡兵遇之, 乱刃交加, 遂剁逆成于马下。

逆成既毙,贼众无主,乃谋向何总督投降。时何腾蛟总督五省军务,驻长沙,贼党大队投诚,皆虞其诈不敢应,相持两日。长沙知府某,挺身而往,甫至,为贼所杀,贼哄曰:"我等降何总督耳,知府卑官来何为?"不得已,乃自往,贼众望见,知为总督也,列队罗拜,欢声动地。何谕之曰:"若等来降,自当题请受爵,为国家建立大功。但若无粮饷奈何?"贼众曰:"饷我等所储甚裕,毋贻军门忧。"何又虞贼众甚夥,狼心未测,于是下令:"愿归农者听!"又分莅其众,贼党散者大半。说者谓:"何尔时抚有其众,激以忠义,鼓行而前,当必能下江南,画淮而守。而逡巡顾忌,坐失机会,良可惜也。时拟谥号者,大学士高宏图也。后即有借此以攻宏图者,复改为"毅宗。"按:谥法"恩"与"毅,"于先帝俱无取也。孟子曰:"世守也,非身之所能为也,效死勿去。"《传》所谓"国灭君死,正也。"今先帝俟两宫毕命后,始自为计,义也。初拟从权,徐图后举。既慨然知天命之不可争,不难身殉以谢天下,智也。业已身殉矣,犹曰"因失江山,不敢终于正寝",礼也。从

- 115 -

容殉难,合乎大道,仁也。夫当变起萧墙,祸介俄顷,而仁、义、礼、智俱全,而无失焉,可不谓正乎?按《谥法》杀身成仁曰"烈,"临难不屈曰"正。"愚意修史者常具疏,特请更上先帝谥号曰"烈宗正皇帝,"先后谥号曰"孝烈正皇后。"

●附

○逆闯伏诛疏

总督湖广川贵广东广西五省军务、兵部尚书何腾蛟奏: 闯死确有实据,闯级未敢扶同。谨据实回奏事:

"痛自闯逆肆乱,逼我先帝,陷我神京,罪通于天。一旦被戮九宫山,差 纾神人之愤。奉旨: '何腾蛟着吏部先行议妥速叙,仍着将歼贼情形、闯贼首 级真否?该抚察奏解。若果的真,照格叙赏以昭大信。钦此。'窃惟人臣之训 , 义在勿欺。如闯死非真, 而臣谬以为死, 且居之以为功, 是欺也。欺则臣罪 也,当死。闯死果真,而闯之首级,已化为异物。如首级物化,而假托以明闯 死之为真,亦欺也。欺则臣罪,当死。然闯势实强,闯夥实众,何以死于九宫 山团练之手, 诚有其故。闯逆既死, 则宜留首级示信, 何以首级竟不可得, 亦 有其故。请为皇上陈之: 臣自遭左变, 投身江涛, 遇救得生。臣揣闯逆知左兵 南逞,势必窥楚,即飞檄道臣傅上瑞、章旷,推官赵廷璧、姚继舜,咸宁知县 陈鹤龄等,联络乡勇以待。闯果为清所逼,自秦、豫奔楚,霪雨连旬,闯逆困 于马上者逾月,此固天亡之也。闯逆居鄂两日,忽狂风骤起,对面不见,闯心 惊疑, 惧清之蹑其后也, 即拔贼营而上。然其意, 尚欲追臣盘踞湖南耳。天意 亡闯,以二十八骑登九宫山,为窥伺计。不意伏兵四起,截杀于乱刃之下。相 随伪参将张双喜, 系闯逆义勇, 仅得驰马先逸, 而闯逆之刘伴当飞骑追呼, 曰 : '李万岁爷被乡兵杀死马下,二十八骑无一存者。'一时贼党闻之,满营聚 哭。及臣抚刘体仁、郝摇旗于湘阴,抚袁宗第、蔺养成于长沙,抚王进才、牛 有勇于新墙, 无不众口同辞。营内有臣晋、豫旧治之子衿氓隶, 亦无不众口同 辞也。张参将久住湘阴,郝摇旗现在臣标,时时道臣逆闯之死状。嗣后大行剿 抚, 道阻音绝, 无复得其首级报验, 今日逆首已泥。误死于乡兵, 而乡兵初不 知也。使乡兵知其为闯,气反不壮,未必遂能剪灭,而致弩刃之交加,为千古 大快也。今而后逼君破都之气焰,遂成乌啄兽脔之肉饼,亦可以谢先帝矣。自 逆闯死, 而闯二十余万之众, 初为逆闯悲号, 既而自悔自艾亦自失, 遂就戎索 于臣。逆闯若不死,此二十余万之众,伪侯伪伯,不相上下,臣亦安能以空拳 徒手,操纵自如乎?伏乞皇上祭告九庙,祭告先帝,使天下后世,知数十年之 剧寇首逆,乃一旦天亡于九宫山,以慰二祖列宗之灵,以快普天率土之愿,臣 志足矣。至如明旨所云: '察实照诏格议赏。'是徒滋举朝之议,而重微臣之 - 116 -

罪,臣惟有洒血于先帝而已。回奏委无一毫欺饰,可胜惶悚待命之至。降武元 年月日奏。"